

KÙDI MUNTU MWABA EWU UDI MWÀ KUTEEMESHA BUKÊNKÊ



Twasàkidila mwanèètù. (Mulekelaayi ìmbè.) Twinyikàayi mitù yetù mpindyewu.

Taatù wetù wa mu Dyulu, tudi tuKusàkidila mu dindà emu bwà bwìmpè ne luse Lwèbè, bwà ditùpèèsha dyèsè dyà kudisangisha pàmwè kàbìdì, dìmwè ditùkù dyàmùnù dyà Cyendèlèèlè cinène, bwà kukuukwila mulenga Awu, Mukalenge Yesù Kilstò. Tudi tuKusàkidila bwalu Yèyè wàkalwa pa buloba bwà—bwà kutùpikula ku nsòmbelu wa—wa mpèkaatù, ne bwà kutùpèèsha bumpyànyì bunène ebu butùdì naabu kupìcila ku bwakàne Bwèndè. Nènku bu mutùdì, mu dindà emu, mwab'ewu bu mìlòpò Yèndè, bwà—bwà kucibwila disangisha dìdì dindila edi Dyàmpà dyà Mwoyi, Nyumà Mwìmpè àsonsolèku Dìyì dyònsò ne àditéèke mu myoyi yà bantu, bilondèshìla mutùdì ne dìjinga amu. Tudi tulòmba nùnkù mu Dìnà dyà Yesù. Amen.

Sòmbaayi.

² Ncyà bushùwà ne ndi mbala eci, ne ndyèsè dinène, cyàkàbìdì mu dindà emu, bwà kwikala mwimàne kaaba aka pàmwè neenù. Nwatùfwilaayikù luse mutùdì katùyì ne myaba yàbùngì kutàmba yitùdì nayì eyi, bwà kusòmbesha bantu. Tabernacle wetù kì mmutàmbe kwalabala to. Nènku tudi ne kusàkidila kuvule bwà kwikala kaaba aka, mu bikondo byà diikisha ebi, buumùkila—buumùkila kwètù mu. . . ku Tucson. Nènku kuulu kùvwa kumweka kunyanguke, kàdì tuvwa ne disànkà dyà kwikala kaaba aka bwà kwenza masangisha.

Mpindyewu, ndi muswè kumanyisha ne dilòlò edi nekwikalè mudimu wà dyondopa dilòlò edi, anyi disambila bwà babèèdì. Nènku ndi mfùma ku dyambila Billy mpindyewu mene. Wànkònkù ne: “Fè, newènzè cinyì?”

³ Mèmè ne: “Èè, pàmwàpa bwà kwenza bìmpè udi mwà kwabanya ndambù wa twartà dilòlò, lwà pa dìbà isambòmbò ne tusunsa makumi àsàtù, bwà bantu kabikadi. . .”

Nènku, nwamònu's, mwab'ewu mmupàte, tudi mwà kumanyaku mwà kubàtwala, ku umwe ku umwe, bwà nwamòna mwà kubìikidiibwa bilondèshìle nombà wa kartà kèèbè, nànkù awu kakwàkwikala cikùtākànyì nànsha. Tudi ànu mwà kubàbìikila, ku umwe ku umwe, kubàpìcishìla mu mulongo patùdì tubàsambidila apu.

⁴ Pa nànkù, wèwè, pawikalà usaama, anyì mwìkalè ne bananga bèèbè bàdì bàsaama, ne muswè kubàbweja, ulwe lwà pa

dìbà ìsambòmbò ne tusunsa makumi àsàtù, cintu bu nànkù, dìbà mwandamutekète jaajaaja, bwà kupeta kartà kàà disambila. Neikale ku ciibi, anyì nànsha mùshindù wònsò ùdiye ùtwàbanya awu, pànùdi nubwela apu.

⁵ Nènku, dìbà adi, eci pàmwäpa necìikalè bu musangu wà ndekeelu ùndì mwà kwalukila, bwà cikondo kampànda, bwalu ndi ne maalu à dyenza búngì kabùyì kwamba mpindyewu. Kwàka, nènku ncidi ànu mu États-Unis too ne ku movù wà bintu bitòloka ewu, ku shòò. Nànkù, twètù, netwikale pàmwäpa mwà kwalukila cyàkàbìdi pashìishe ndambù mu movù wa luuya ewu.

Bu Mukalenge mwà kwanyisha, ndi muswè bwà, twètù bapete ka—kaaba lwà mwab'ewu kwòkò kiikale ne byamu bifidi byà citaleela. Mvwa ne cyà kukonka Billy. Mvwa muswè kwakula pa Mpungi Mwandamutekète ayi, kwnza masang-...masangisha mwab'ewu bwà Mpungi Mwandamutekète, bu—bu Mukalenge mwà kwanyisha. Bwalu, aci, Bi—Bikondo Mwandamutekète byà Èkèleeziyà, ne Bitampì Mwandamutekète, nènku mpindyewu Mpungi Mwandamutekète. Ne tudi bafwànyine kupeta cikondo kampànda bu mùdì mu ngondo wa kabalàshipù mùtù bantu bàpeta diikisha dyàbò amu, kubàpèesha cikondo cyà bafwànyine kubwelamù.

⁶ Nènku ndi ne disànkà dyà kumòna Mwanèètù Shepherd mwab'ewu mu dindà emu, mufùmine ku lùpitaadi. Mvwa mukamumòne ditùkù adi. Ne Mwanèètù wa bakàji Shepherd, ncìvwà mwà kukubiikila makèelèlè to. Cilòòta cyùvwà muntùmine aci cìvwà cìmpè cyà menemene, menemene. Uvwa mumòne, bu ne cìvwà, Kilistò mu—pa...mu—mu maulu, pa kàbalù katòòke, kàdi mwikàle muswikìibwe, nudi numòna's. Kàdi, nànsha nànkù, kumpàla kwà kujiminaci, dìkù dyèbè dyònsò kufikadi ku dicimòna. Aci, dyumvwija dyà cilòòtà, didi ne dìkù dyèbè ndimòne mudimu Wèndè wà matùkù à ndekeelu aa kumpàla kwà kujiminawu, cìvwàCi. Pa nànkù, cidi, aci's cìvwà cyà nyumà bikolè, ne dibènesha dìmpè bikolè bwèbè wèwè, ne dìkù dyèbè. Dìkù adi ndipàtùkile mu dikengeshiibwa kampànda dinène, bwà kufika kùdìbo leelù ewu eku.

⁷ Nènku mpindyewu tudi ne cintu kampànda, cyà dibungama kakesè, mu dindà emu. Kacya ngàtuutakeena mwaba ewu... Umwe wa ku balundà bèètù bàà mushinga mukole, ne—ne balu bàà ku tabernacle eku, dìkù dyà Coats; batùdi, twètù bwònsò banange. Bàdi bàfùmina ku esètè, ne, anyì ku Chicago, pabwìpì apu. Ne Mwanèètù wa bakàji Billie Habib, ne—ne mwanààbò wa bakàji, Armstrong, ne nsongààkàji yònsò ayi. Bwòbò... Ngèela meeji ne bàvwa ba-Nazaréens kale wàwa, kàdi mbalwè kùdi Mukalenge, nènku mbalundà bèètù bàà mushinga mukolè bàà menemene.

Nènku Mwanèètù wa balùme ne Mwanèètù wa bakàji

Coats, tatwábò ne mamwábò, bàvwa mu njila batàngile kumbelu dikwábò ditùkù, bàfùmina lwà ku Wesètè kwàka, ki muntu kampànda kusenunuka mu njila kàdi—kàdi kushipayè Mwanèètù wa bakàji Coats awu, mu cita ne cita. Nènku—nènku pàakambiikilabo apu, mu—mu Tucson, ki mèmè kuumvwa bwalu abu, mvwa musòmbè ànu mwaba awu díbà adi ne kashèète kàà mbòmbò kavwàye ufùma ku dingenzela, mitèèka pa—pa mèèsà. Kàdi kanwèna bamanyè mwàkangenzaci to. Kàdi ndi—ndi ngèèla meeji ne, nsàkidila Mukalenge mu dindà emu, bwà ne kabyàkakèngela bwà yèyè kukenga to. Ùvwa wènda ùkola, ne kabívwa bikèngela bwà kukèngayè to. Nènku kwalukilaye Kumbelu bwà kusòmba ne Nzambi.

⁸ Mvwa ànu ngèèla meeji, ne nyiikila ne bânà bèndè bàà bakàji bàbìdì, mpindyewu mene, mu cibambalu mwàmwa. Mwanèètù wa balùme Coats ùdi kaaba aka mu dindà emu; ùdi ne mbadi micibùke. Ki mèmè kumubiikidila mu lùpitaadi muvwàye mulamina amu, mu Missouri mwàmwa, ne mbadi yèndè micibùke ne bikwábò, kàdi ùvwa bushùwà ne bukitù, mwena Kilistò mulelèlà; mumanyè ne mukalenge mukàji mukesè wèndè awu kí mmufwè nànsha, ùdi ne mwoyi bwà kashidi ne kashidi, pàmwè ne Kilistò, ne nekwikale cikondo cyà didìsanga.

⁹ Yobò wàkamba, musangu kampànda ne: “Kaa, bu Wèwè mwà kunsokoka mu lukita, ne kundamina mu kaaba kasokòme, too ne pààpità ciiji Cyèbè.”

¹⁰ Nukààdikù bamòne ne Nzambi, mu bufùki emu, ùtu wènda cintu cimwècimwè aci anyi? Byenze bu mùdì màyi àdi mu micì kuulu eku, malame mabèji; kàdi kumpàla kwà muvù wà mashika kulwawù, ciiji cicolè cìdì ciicikija pa buloba. . . Nwamònu’s, mu cikondo kampànda buloba kabwàkadi ne muvù wà mashika nànsha. Ne mu Bukalenge bwà bidimu cinunu kamwàkwikala kàbìdì mivù yà mashika nànsha, nudi numòna’s. Nànku’s nciiji cicolè pa buloba. Díbà adi pààkenzeka aci. . . Nwamònu’s, kumpàla kwà ciiji cicolè kulwaci, Nzambi mu luse Lwèndè ùdi ùpwekesha màyi awu kwinshi mu. . . mwinshi mwà buloba, mu miji yà mucì awu, ne uàlaminamù too ne pàdì ciiji cicolè cyà muvù wà mashika cìmana kupita, pashiishe ùàbandisha kàbìdì, nwamònu’s, mu muvù wà bintu bitòloka.

“Kaa, bu Wèwè mwà kunsokoka mu lukita, ne kundamina mu mwaba musokòme, too ne pààpità ciiji Cyèbè cicolè.” Ki cidiYe mwenzè bwà mwanèètù wa bakàji. Ki cidiYe wènda bwà mwena Kilistò yònsò.

¹¹ Mwanèètù Coats, Nzambi àkubènèshè. Ndi ne disànkà dyàbùngì dyà kumanya aci, ne Cítampi cyà Nzambi cidi cikwàta ne lulamatu mu díbà dyà lutàtù. Ndi mumanyè bwalu bùdiye ùpicilamu abu, bwalu ngakapìcila mu cintu cifwànàngane naaci, kukaadi bidimu. Kàdi ndi. . . Ku umwe ku umwe tudi ne cyà kusabuka musùlù munène ewu; nènku, mèmè, nènku neciikalè

cikondo cyànyì, òm̀wè d̀yà ku matùkù àdì panshi aa; ne cikondo cyèbè, òm̀wè d̀yà ku matùkù àdì panshi aa. Kàdì ànu bu mwàkambà Davìdì ne: “Ncyàkuciina bwalu bubì nànsha bùm̀wè; bwalu Wèwè udi naanyì. Dikombo Dyèbè ne mulangala Wèbè bidì binkànkamika.”

¹² Mpindyewu bwà kuvùluka Mwanèètù wa bakàjì Coats, mwanèètù wa bakàjì wa mushinga mukolè udi muyè kùdì Nzambì awu. Ndi. . . Bu civùlukilu cikesè bwèndè, mu dindà emu, ndi muswè bwà disangisha kwimanadì kuulu bwà katancì kakesè cyanààna.

Twìnyikàayi mitù yètù ne twelè meeji kùdì kampànda uvwa musangu kampànda, kùkaadi ndambù wa matùkù, wèndakana mu—mu tabernacle emu, ùbwela ùpàtuka munkaci mwètù, mulabùlàngàne neetù ku byanza, mwena Kilstò mulenga, ùdì mpindyewu mu mwaba wàkanganyishilà Mukalenge bwà kumòna matùkù mashààle aa, mwalùkile nsongààkàjì wa citende kàbidì, munkaci mwà dindila d̀kù dyèndè diikalà ne cyà kulwa.

¹³ Taatù wetù wa mu Dyulu, tudì tuKusàkidila bwà bivùlukilu byà Mwanèètù wa bakàjì Coats. Mwanèètù wa bakàjì, wa mushinga mukolè, ne munanga! Nènku mpindyewu cikondo cìlwalwa cìikalà mwoyi wètù mwà kwimana, cidì citùkòsela, tudì ne cyà kusabuka musùlù awu. Tudì tuKusàkidila bwalu bwà kabìvwa bikèngela bwà kukèngayè nànsha. Kakùvwa ne cyà kwikala cintu nànsha cìmwè mwab'ewu cyà cìmupìisha, cìvwaye ne cyà kukènga bwàcì to. Wàkaya buludì mu mabòkò à Nzambì, ànu mu katancì kakesè cyanààna.

¹⁴ Bàyèndè, bàna bèndè, bàdì mwaba ewu mu dindà emu, Mukalenge, baalùkile buludi ku kaaba kààbò kàà mudimu. Mùshindù mwinè utùdì tuKusàkidila bwà diitabuujà d̀yà bukitù adì's wè! “Diitabuujà d̀yà baataatù bèètù diciikàle ne mwoyi, mumpàla mwà nzùbu wa bùlokò, ndimì yà kapyà, ne mwelè wà mvità.” Tudì tuKusàkidila bwà bintu byònsò ebi.

¹⁵ Pèeshakù musùkà wèndè wà mushinga mukolè awu diikishà, Mukalenge. Yèyè ùvwa mwanèètù wa bakàjì. Dibungama dikolè, binsònji bidì bitumacila mu mwoyi, bwà dipangika dyèndè, kàdì disànkà didì dibwayikila pa mamata à binsònji awu, tùmányèku ne ditwishiihwa d̀yà Dìyì Dyèbè ne yèyè ùdì ne mwoyi mu mwoyi wà bumpàndààlùfù ùdì kawùyì mwà kufwà to. Nènku kakwàkwikala kàbidì ǹjìwu mwaba ùdiye mpindyewu awu nànsha, ùdì ànu munkaci mwà dindila aba bàlwalwà paanyimà bwà kudisanga nèndè.

¹⁶ Bèneshàku Mwanèètù wa balùme Coats, ne bèneshàku bàna bàà bakàjì abu ne d̀kù dyèndè, Mukalenge, ne bananga abu, ne bwònsò bàdì bamunange. Nènku d̀ngà ditùkù, Taatù, tudì tutèkemena bwà kutuutakeena nèndè kuulu kwaka mu Dyàmwàmwa dinène adì, mùdì kamùyì disaama,

tuninganyinga, anyi lufù. Too ne ku ciine cikondo aci, tùlame bônso ne makàndà à mubidi ne mubidi tumatuma, munkaci mwà kuKukwàcila mudimu, munkaci mwà kwindila ditùkù adi. Mu Dìna dyà Yesù Kilistò mmutùdi tulòmba nùnkù. Amen.

¹⁷ Swàkù bwà Nyumà Mwîmpè munène udi ukwàta neetù mudimu kaaba aka mu tabernacle emu, mu dibuulula dyà Dîyì Dyèndè, swàkù Ikishishè musùùkà wèndè wà bukitù awu mu ditalala too ne patwàtuutakeena nendè.

¹⁸ Mpindyewu kùdi luuyà mwaba ewu mu dindà emu, bwalu mmibidi, nudi bamanyè's, lùdi lùfùmina bikolè ku luuyà lwà mubidi wà muntu.

¹⁹ Mpindyewu, tudi baswè kufila dimanyisha mpindyewu. Misangu mikwàbò masangisha ètù kaaba aka, miikale male, àà—àà dindà, kabingilà nkàà ne . . . Kabyèna ànu bîmpè menemene bwà kwenza masangisha àà malemàle awu to, bwalu, dîbà, dîbà dimwè ne citùpà, anyi misangu mikwàbò mèbà àbidi. Kàdi cîndi ngenza, ndi nkwàta mukàbà wà mèyì paanyimà apa, nwamònu's, ne mukàbà wà mèyì ewu wùyaaya pa buloba bujimà. Nènku aci's ke cîndi . . . citùdi tudìsangishilamù, ntàntà mule, mu dindà nùnkù, mbwà—mbwalu ndi ndwa kaaba aka bwà kukwàta mikàbà yà mèyì eyi. Aci's mbwà . . . ndi . . . bàdi . . . Nwamònu's, nudi mwà kumòna mu cibambalu mwàmwa, mikàbà yà—yà mèyì yidibo munkaci mwà—mwà kukwàta. Mpindyewu . . . Nènku yìyaaya myaba yònsò pa buloba bujimà.

²⁰ Mpindyewu, dyàkàmwè, Mukalenge mwà kwanyisha, dilwalwà edi, ànu pàndi nguumuka kaaba aka . . . Nèngùumuke, Mukalenge mwà kwanyisha, mààlaba mu dindà, pa dîbà kampànda, bwà kwalukila ku Arizona, bwalu ndi ne masangisha kumpàla eku. Ne pashìishe bìdi ànu mu Sud mwònsò amu. Nènku nwènù beena ku sud bàà mu Georgie mwàmwa, ne mu Mississippi, ne Texas, ne mu Alabama, tulwàlwa ànu muntwamu, tuya too ne mu Floride, dyàkàmwè.

²¹ Kuumukila apa too ne ku Phoenix, pashìishe kuya ku Californie, ne kwalukila buludì ku Dallas, ne—ne pàmwàpa kulwa kupweka ne mu San Antonio, ngèèla meeji ne mmwòmò, ne kwalukila lwà mu Alabama, ne mu Floride, ne kwònsò aku. Nànku netwikale mwà kunùmòna muntwamu, bu Mukalenge mwà kwanyisha, dyàkàmwè.

²² Nènku nwátùngunuka ne kutùsambidila, nènku netùnùmanyishe ne ndîbà kaayi, bu twètù . . . Mukalenge mmutwambike pa mwoyi wètù mpindyewu bwà kwenzakù n—ndambù wa matùkù mwab'ewu, mu muvù wà luuyà ùlwalwà ewu.

²³ Mwà ne musùmbà wà masangisha mamana kulongolola. Nènku bààbùngì bèènù mu New York mbamanye pàakalwa cikèèna—kumòna, cyàkamba ne masangisha awu mu ditùnga dyà Scandinavie . . . Nudi nuvùluka mùvwàwu malongolola

muntwamu anyi? Ne pashiishe, pâmvwà nsanganyibwa mu New York mwàmwa, cikèènà-kumòna eci pwàà, cyà ne dyònsò dyà ku masangisha awu kaàvwa ne cyà kwenzeka to, bwà kabingilà kampànda. Nènku ndi mvùluka ne mvwa mwámBILE bàmwè bàà kunùdi kaaba aka, patùvwà mu New York. Aci's ke cyàkenzeka ànu menemene, bwalu bwònsò bàvwa baswè ditùkù dimwèdimwè adi kàdi kabàvwa mwà kupeta nzùbu awu nànsha.

Nànku, pashiishe, aci ncifwànyine kushiya mpùngà mukesè mu ngondo wa kabàlànshipù. Ncifwànyine kwikala diswa dyà Mukalenge, Mvwa ndyàmbidila ne, pàmwàpa bwà kwalukila ànu mwab'ewu bwà Mpungi ayi, kumpàla kwà díbà kwikaladi dimané kupita. Nwamònu anyi? Pa nànku tudi bamanyè ne bintu byònsò bidi byènda ànu mu byòbi. Nànku aci ke civwà pa mwoyi wànyì, nànku ncifwànyine kwikala cìdiYe muswè bwà twètù kwenza.

²⁴ Mpindyewu ndi mumòne munùdi nushintakajangana nkwasà muntu ne mukwèndè amu, ne—ne pambèlù mu bibweledi, ne bikwàbò. Tudi tujinga ne twíkalakù ànu ne mwaba wà kusòmba.

Nènku mpindyewu patùdi twakula pa Mpungi ayi, aci's. . . tudi baswè kwangata cibambalu cyà manayi cyà cilongelu citùmbùke aci. Ngèèla meeji ne cìdi ne myaba yà bantu binunu bitaanu ne nkàmà yìtaanu, nènku díbà adi netùpetè mpùngà, kàbìdi, bwà muntu yònsò kupeta mwaba wà kusòmba, ne kusòmba panshi ne kutèeleja mu ditalala patùdi—patùdi munkaci mwà kuyiisha.

²⁵ Anyi, eci, Mpungi eyi, mmìmpè bikolè, bikolè be. Mvwa mwòshekù dísù ditùkù adi. Nwamònu's, ku Cítampì Ciisambòmbò, Mpungi Mwandamutekète yònsò yìdi yèdiibwa ànu mwaba awu mu Cítampì Ciisambòmbò aci, nwamònu's, ànu kumpàla kwà Cítampì cyà Mwandamutekète cìdi cikàngula Dilwa dyà Kilistò.

²⁶ Nènku, dilòlò edi, ndi ne Mukenji wà musinga mukolè menemene úndi muswè kwakula ànu kumpàla kwà—kwà—mudimu wà dyondopa. Nènku nwènù mwab'ewu, ne biikale mwà kushààla ntàntà, èè, netùteetè, byòbi bikùmbane bwà kubangakù ànu ndambù kumpàla kwà díbà, bwalu nekwikalè mulongo wà babèèdi. Ncyàkuyiisha ntàntà mule to, kàdi kùdi cintu kampànda cìmvwa muswè kwambila èkèleeziyà, bwà cikondo kampànda, ne kunumanyishakù bwà—bwà—bwà. . . mùshindù ùdi bintu biya ne mu cikondo eci, ne ànu mwaba utùdi biimànyine, ne ku dyànyì pàànyì dimanya dyònsò mu Mifùndu.

²⁷ Mpindyewu, ndi muswè bwà nùbuululè mu dindà emu pàmwè naanyì, panwikala bàswè kufùnda anyì kushààla bakwàte mwaba utùdi tubadila, Mukàndà wà Yeshàayi. Nènku ndi njinga kubadila mu Yeshàayi, nshapità wa 42 wa Yeshàayi.

28 Tudi ne disànkà dyàbûngì mu dindà emu, kàbìdì, bwà kwikala ne Mwanèètù Dauch musòmbe neetù kaaba aka. Panùdì munkaci mwà kubuulula apu. . . Nudi bamanyè's, bàvwa bèèla meeji ne kàvwa ne cyà kwikala ne mwoyi to, munwemu mu Shreveport ditùkù adi. Kàdì's yèyè ùdì bushùwà ne diitabuuja. Èyowà's, mukalenge, wàkadyàmpukakù buludi; Mukalenge ùdì ànu ùtùngunuka ne kumubènesha, èyo. Nwamònu's, Mwanèètù Dauch ùdì ne mvùla makumi citèèmà ne umwe, kàdì ùvwa ne disaama dikolè dyà mwoyi wìmana; ne dyà mwoyi, mu cipidì cyà ndekeelu. Nènku ke ngàngàbukà mene awu kwambayè ne kabàvwa bamòne ne kùvwakù mùshindù nànsha ùmwè wà yèyè kwikala ne mwoyi to. Mwanèètù Dauch nyèyè ewu ne mwoyi, kàdì ngàngàbukà awu's mmufwè. Nwamònu anyi? Bwalu, yèyè. . . Nwamònu's, Mwanèètù Dauch mmusòmbe kaaba aka.

29 Nènku dîbà adi, mu—muntu wa mvùla makumi citèèmà ne umwe, ne mwoyi wìmana ne disaama dyà mwoyi. Nànku mwaba awu, pâmvwà nya mubande kuntwaku, mèmè kumumòna wènda ùpweka ne mùsèèsù; mèmè kumumòna mu èkèleeziyà. Ke mèmè kuya kamwambila, yèyè ku mbòmboonè ne: “Mu Dîna dyà Mukalenge, ndi nkulabula ku cyanza mu. . . Nènkumònè mu èkèleeziyà, ne nènkulabùlè ku cyanza mu mùsèèsù.”

Mu masangisha mene àkalondà awu, s'ki yèyè ewu, musòmbele ànu lwà paanyimà apa mu èkèleeziyà. Ki mèmè kuya ku Louisville, kutùtù tudya ku Blue Boar kwàka, bwà kudya, nènku ndi mwenze ànu mpàtuka mu kàshinyi kàànyi, ntwàdija kubànda ne mùsèèsù, s'ki Mwanèètù Dauch ulwàlwa wènda ùpweka ne mùsèèsù ewu. Ki cyòci aci, ànu menemene. Ne mùshindù mene wùdì Mukalenge mumubènshè's!

30 Mpindyewu netwikalè mwà kwakula pa dyondopa, dilòòlò edi, ne bikwàbò, ne ndi ne bimwè bintu byà dikèmà byà kunùlondela dilòòlò edi.

31 Kàdì mpindyewu, bwà ngaamòna mwà kupeta mikàbà yà mēyi mpindyewu, dîbà adi kudìlongolola bwà kuyìkwàtabo, Ndi muswè kubangila kubala mu Yeshàayi nshapità wa 42, mvensà wa 1 too ne ku wa 7. Ne Maatàayi nshapità mwi4, kubangila, ngèèla meeji, ku mvensà wa 15 ne wa 16.

32 Mpindyewu, mu—mu nshapità wa 42 wa—wa Yeshàayi, netwikale mwà kubala.

Mónaayi musadidi wanyi, ungàatwà nyama ku mikòlò; musungula wanyi, mu yèyè mùdì musùukà wànyi ùsànkila; Ndi mutèèke nyumà wanyi pambidi pèndè: neàtwalè cilumbulwidi kùdì bàà Bisàmbà byà bendè.

Kàakwela mbilà nànsha, anyi kubandisha, anyi kwenza bwà dīyi dyèndè kuumvwikadi mu mùsèèsù nànsha.

Kààkuzaaza dilèngà dicibula to, ne kààkujima mukàbà ùcidi uteema kapyà nànsha: neàtwale cilumbulwidi mu bulelèlà.

Kààkupangila anyi kutekeshiibwa mu manungu nànsha, too ne piikalaye ne...pàashikikaye cilumbulwidi pa buloba: nènku bisanga nebìndile mikenji yèndè.

Emu mmwambambabu...kùdì MUKALENGE, yèyè wakafuka maulu, ne wakawòlòlola awu; yèyè wakaalabaja buloba, ne bìdì bipàtukamu awu; Yèyè wakapèèsha bantu bàdìpu mupuuyakeenu, ne nyumà kùdì aba bàdì bendelamu abu:

Mèmè MUKALENGE ndi mukubùikile mu bwakàne, ne nènkuwàte ku cyanza cyèbè, ne nènkulamè, ne nènkupèèshè cipungidi cyà bantu, bwà kwikala bukènkè bwà bàà Bisàmbà byà bendè;

Bwà kukangula mèsù mafomija, bwà kupatula beena bùlokò mu nzùbu wa bùlokò, nènku aba bàdì basòmbèle mu mîdimà kubàpàtula mu nzùbu wa buloko.

³³ Mpindyewu mu Èvànjeeliyò wa Maatàayi, nshapità mwi4, ndi njinga kubala dikumbana dyà dîyi dyà cipròfetà dyàkafidiibwà kùdì Yeshàayi adi. Mu nshapità mwi4 wa Maatàayi, ndi—ndi muswè kwanga kubala. Bu byòbi mwà kwenzeka, tubangilàayi ku mvensà wa 12 pamutù pàà wa 15.

Mpindyewu pààkumvwa Yesù ne Yone ùvwa mwediibwe mu bùlokò, wàkaya mu Ngaalèlà;

...kumuka mu Nazalèetà, kulwayè kusòmbela mu Kapeenùmà, udi luseke lukwàbò lwà mbù alu, mu mikàlù yà Zabùlòònà ne Nefàtâlè:

Bwà cyàkaakulabo kùdì Yeshàayi mupròfetà cyàmòna mwà kukumbana, cyàkambàye ne:

Mònaayi, buloba bwà Zabùlòònà, ne buloba bwà Nefàtâlè, lwà ku luseke lwà mbù, dyàmwàmwà dyà Yadenà, mu Ngaalèlà wa bàà Bisàmbà byà bendè;

Bantu...bàvwà basòmbè mu mîdimà bàakamòna bukènkè bunène; ne kùdì aba bàvwà basòmbè mu myaba yà mindidimbi yà lufù bukènkè mbubàteemène.

Nènku kubangila ànu ku cikondo aci Yesù wàkabanga kuyiisha, ne kwamba ne: Nyingàlalaayi: bwalu bukàlengè bwà mu dyulu bìdì pabwìpì.

³⁴ Mukalenge àsàkidilèku mabènesha Èndè ku dibala dyà Dîyi Dyèndè! Nènku mpindyewu, cyena-bwalu cikesè cyà pabwàci cìmwà muumvwe muntu kampànda wàkula, wàmba eci, kàdi ndi muswè kwangata eci bu cyena-bwalu ne: *Kùdì Muntu*

Mwaba Ewu Udi Mwà Kuteemesha Bukènkè. Nènku mpindyewu netwàkulè pa cyena-bwalu cyà bukènkè.

³⁵ Eci's cidi cilonda byena-bwalu bisàtù bitùvwà ànu munkaci mwà kwakula.

Cimwè cyà ku byòbì, ku Tucson kwàka, anyi ku Phoenix, mpa bwà cinyi Yesù wàkalwila ku Betèlèhèmà. Bwà ne, Udi ne cyà kulwilakù, bwalu Yèyè udi Betèlèhèmà. Bethlehem! *B-e-t-h* mbwena kwamba ne “nzùbu”; *e-l*, “Nzambi”; *e-h-e-m* mbwena kwamba ne “dyâmpà,” dyâmpà. “Nzùbu wa Dyâmpà dyà Nzambi.” Nènku mwena Kilistò udi mulediibwe mu Kilistò mmulediibwe mu Betèlèhèmà, nzùbu wa dyâmpà dyà Nzambi.

³⁶ Dìbà adi, mwômò amu, cifwànyikijilu cyà Davidi, uvwa munyeemakanyi mu cikondo cyà diipaciibwa dyèndè kùdi cisàmbà cyèndè. Wàkapidiibwa. Ne Betèlèhèmà ùvwa mujìngila kùdi bilwilu, ne beena Pelèshètè bàvwa baase bitùùdilu banyùngulukile Betèlèhèmà. Nènku Davidi, munyeemakanyi, cifwànyikijilu cyà èkèleeziyà leelù ewu, wa Kilistò. Nwamònu's, Kilistò udi Munyeemakanyi kùdi èkèleeziyà Wendè Sungasunga leelù ewu. Bàdi ne... *Munyeemakanyi* “ncintu kampànda cidi cibèngiibwe.” Ne Davidi wàkadi mubèngiibwe, kàdi ùvwa mwela maanyi bwà kwikalayè mfùmù; kàdi mupròfètà ùvwa mumwele maanyi.

³⁷ Nènku mu cikondo eci, mwikale mu—munyeemakanyi kùdi cisàmbà cyèndè, ùvwa mwangate bantu bàà Bisàmbà byà bendè bààbùngì bàà bukitù. Umwe wà kùdibu wàkashipa bantu nkàmà mwandamukùlù, dīngà ditùkù, ne difùmà, anyi mwelè wà mvità. Ne mukwàbò kutùmpikayè ne mu ciinà ne kushipa ntambwe, mu ditùkù dyà nêjè. Nènku—nènku bàvwa munkaci mwà kungwija ntete, cidi ciikàle nkùnde yà nzengu anyi nkùnde, anyi cintu kampànda, ne—ne bwònsò bwàbò kuyabo lubilu, kàdi yèyè kwimana ne kushipa bantu too ne mwàkamushiihilà dibòko. Bààkashipa kàbidi bânà bààbò ne Goliyàtà bàà mfyondo abu.

Bantu bàà bukitù, balamàte Davidi, bwalu bàvwa bamanyè ne yèyè ùvwa ne cyà kùshààla kukòòkesha. Bàvwa bamanyè, nànsha civwa muntu kanà yònsò mwà kwamba. Nzambi ùvwa mulaabe Davidi maanyi, ne bwòbò bàvwa bacimanyè. Bàvwa bàà Bisàmbà byà bendè. Nànsha mùvwabo bamwipàte amu, bòbò bàvwa ànu bamanyè ne yèyè nguvwa ne cyà kukòòkesha. Nènku dīngà ditùkù kuntwaku... .

³⁸ Ncimfwànyì kaayi aci leelù, cyà—cyà Kilistò, Munyeemakanyi! Wèwè udi wamba ne: “Kilistò, Munyeemakanyi?” Bilondèshile Bible, utùdi twètù... Nzambi mmutùlongèshile ne bukitù bwònsò mu Bikondo Mwandamutekète byà Èkèleeziyà abi. Èkèleeziyà wa Laòdikiyà ewu, Kilistò ùvwa Munyeemakanyi pambèlu pàà èkèleeziyà Wendè, mubèngiibwe, ùteeta bwà kwalukilamù cyàkàbidi. Nwamònu anyi? Yèyè's m'Munyeemakanyi, kùdi èkèleeziyà

Wendè Sungasunga. Nènku cidi cyenza ne Yèyè ikale Munyeemakanyi, mbwalu Yèyè ùdi Dìyi, ne kabèena biitabila Dìyi bwà kubweladi to. Mbiitabe twitabàayi, pamutù pàaDì.

³⁹ Nènku tudi tujandula, díbà adi, ne mu mvità minène eyi, bantu bàà bukitù bàvwa banyùngùlùkile—banyùngùlùkile Davidi abu, mbantu bàà Bisàmbà byà bendè.

⁴⁰ Bu nwènù mwà kumòna mùvwà Betèlèhèmà mwashiibwe. Ncyènà muswè kulenga aci cyena—bwalu to, kàdi mùshindù ùvwà Betèlèhèmà. . . Mu bulelèlè, Lahàbà, ndumbà awu, mwanèndè wa balùme ke yèyè wàkaasa Betèlèhèmà. Cìvwa mpwilàmàmbù wa blé, ne mùvwà màyi àbùngì malenga muntwamu. Nènku yèyè ke wakaasa kààcimenga kakesè aku. Kàdi kàvwa katàmbe bukesè kàà ku bimenga byònsò, bwalu mupròfètà mmmwambe ne: “Wèwè. . . Betèlèhèmà wa Yudà, kwenakù kashààdile munkaci mwà bimenga binène byà Yelusàlèmà. . . anyi Yudà anyi? Kàdi mu wèwè nemùfùmine Nguvènà wíkala mwà kukòokesha cisàmbà Cyànyi.” Mu kàà kakesè aku.

⁴¹ Davidi, pàakasungudiibwàye kuntwaku. Bànà bààbò banène, balenga abu, pàakabàndaku mupròfètà Samwelà, bwà kwela maanyi, bwònsò bwàbò bàwa biimàne kuntwaku. Bantu banène, bàà bukitù, bàmwèka bu ne ki bàvwà mwà kwikala, kumweka, bamfùmù bimpè kumòna. Kàdi ùvwabo babènge awu ki yèyè mwena bwalu, Davidi, ùvwa ne maanyi mamupòngolwela pa mutù awu. Cimenga cyàkabèngiibwa aci ke cìvwa Kilistò. . .

Babèngiibwe ke bàdi Kilistò wàngata, nwamònu’s, bàdi babèngiibwe abu.

⁴² Pashiishe tudi tusangana ne, paanyimà kulwakù Obedè. Ne paanyimà pèndè kulwaku Boazà. Ke kubwelaku mukwàbò muntu wa Bisàmbà byà bendè, wàkabwelela ku Luutà. Nènku kwòkò aku kupàtukakù Yishàayi. Ne ku Yishàayi kulwaku Davidi. Ne kaacikùmbi kakesè kàà ku luseke lwà kakùnà aku kutwàlakù Mfùmù wa bamfùmù, Yesù Kilistò, Mwànà wa Davidi, Mwànà wèndè wa nyumà.

⁴³ Mpindyeuwu díbà adi, yèyè ùvwa, Davidi mwinè mwikale mulediibwe mu cimenga eci, bìvwa bikèngela bwà kulwayè pa kaaba kakesè aka. Nènku kàvwa kàbìikidiibwa ne Betèlèhèmà, cidi cyùmvwija ne “n—nzùbu wa dyàmpà dyà Nzambi.” Ne Yèyè ùdi Nzùbu wa Dyàmpà dyà Nzambi.

⁴⁴ Davidi, mulààle mwaba awu pa kakùnà apu ditùkù adi, ke kupwekeshayè mèsù paanshi ne kumòna beena Pelèshètè bakàjingile mùshindù awu, ùvwa ne cyà kwikala muumvwe luuyà ne nyotà. Kwambayè ne: “Kaa, ngikalapu mwà kunwa màyi à ku ciinà aci, kàbìdi’s wè!” Mòna’s, dishààdile dyà ku meeji èndè divwa diyi dituma kùdi bèndè, aba bàvwa bamunange.

⁴⁵ Ke mùdìbi kàbìdi leelù ewu, dishààdile dyà ku meeji à Yesù, anyi mùshindù ùdìbi bwà Dìyi Dyèndè, didi ne cyà kwikala díyi

ditùma kutùdi twétù bàà Bisàmbà byà bendè bàdi baMunangè. Bwalu tudi bamanyè ne Yèyè ùdi ùshààla mukòòkeshi, nànsha Yèyè mubèngiibwe bìshi. Maulu ne buloba nebijiminè, kàdi Eci necitùngunuke ànu ne kukòòkeshi ànu mùshindù ùmwèùmwe awu piikala maulu wònsò ne buloba kabiciyiku to. Ne tudi bamanyè ne Yèyè ùdi ùshààla mukòòkeshi, bwalu cintu nànsha cimwè kacyakucipangisha bwà kwenzeka to. *Eci's* n'Kilistò, dibuulula Dyèndè, nènku eci necyènzeke ànu mùshindù ùdi Dìyì dyàmba ne ke ùdibi, bwalu Yèyè ùdi Dìyì. Nènku dishààdilé dyà ku méyì Èndè matùma kuntwaku, nànsha dyòdi diikale dikesè dyà bìshi, piikalàbi ne mbwà “kwikala mubàtijiibùlùle,” anyì ní ncinyi cyònsò cidiku aci, netùcyenzè, nànsha bìshi. Ndìyì Dyèndè ditùma.

⁴⁶ Nènku dishààdilé dyà ku meeji à Davidi divwa dìyì ditùma kùdi bantu bàà Bisàmbà byà bendè abu, bwalu, bwòbò, ncimfwànyì cyà Èkèleeziyà wa Bisàmbà byà bendè leelù ewu. Balùme bàà bukitù! Nwamònu's, bantu bàvwà biimàne ku luseke kwà Davidi abu bàvwà bàà Bisàmbà byà bendè, kàdi, bantu bàà bukitù. Kabàvwa ne bwòwà nànsha. Kabàvwa nànsha bamanyè ne bwòwà ncinyi to.

⁴⁷ Muntu umwe kwangata mwele wà mvita kàdi kushipayè bantu nkàmà mwandamukùlù, wa bwalu bwònsò abu bamunyùngùlùkile. Úvwa mmuntu kaayi's wè! Umwe wa ku bwòbò, kùdi . . .

Muntu mukwàbò. Kùvwa mulwanganyi wa mvità wa cyena Èjiipitù mulwe lubilu, ne difùma mòna bule. Yèyè ewu ùvwa ànu ne mucì mu cyanza. Kwangataye mucì awu ne kutòndola nawù difùma adi mu cyanza cyèndè; kwangata difùma adi ne kumushipa, yèyè mwinè. Nwamònu anyi?

⁴⁸ Umwe wa bantu bàà mfyondo abu ùvwa ne minu bule bwà byàlà dikumi ne binaayi, mùshindù awu. Mpindyewu, byàlà dikumi ne binaayi, wèbè munu awu's ùdi ànu bule bwà cyanza cyèbè, pàdici cikànga; paùdi ucibuulula, s'ncifwànyine kwikala cyanza cyà bule bwà byàlà makumi àbidi ne mwandamukùlù. Kàdi mwikale ne difùmà! Nènku kutumpika kudyèlaye muntwamu ne kumushipayè. Nwamònu anyi? Bwà cinyi? Yèyè ùvwa muntu wa bukitù, muntu wa bisàmbà byà bendè ùtàbaleela mwela maanyì uvwaye mumanyè ne ùvwa ne cyà kushààla mukòòkeshi awu.

⁴⁹ Nuvwakù bamòne ne, mùvwàbo bàà bukitù mùshindù awu kùdi Davidi, ndekeelu wa byònsò pàakangatà Davidi bukalenge, wàkabenza bakòòkeshi bàà bimenga anyi? Yesù kàakalaya cintu cimwècimwè aci anyi? Cintu cimwècimwè aci, kubàvwija bakòòkeshi.

⁵⁰ Pashiishe, mwòmò amu, pàakapetà Davidi dijinga dyà kupeta màyì matalàle. Úvwa pàmwàpa ne màyì à kale, à luuyà à malèngàma kuntwaku, àvwaye ùnwa. Kàdi kumufikilabi bwà

kwela meeji ku mâyi matalàle à kuntu kwàka ku Betèlèhèmà awu, nzùbu wa dyàmpà dyà Nzambi. Ke kwambaye ne: “Ngíkalapu mwà kunwà mâyi à ku ciinà aci’s wè!” Ke bantu abu kupàtulabò mwelè wàbò wà mvità ne kulwangana ne beena Pelèshètè mu ntàntà wa kilòmèètà makumi àbìdì ne yinaayi, kî ne mbwalu ùvwa mubàlòmbe to, kàdì bwalu bàvwa bamanyè ne yèyè ùvwa naawù dijinga. Kî kushipabò beena Pelèshètè abu, njila mujimà too ne ku ciinà cyà mâyi. Pàvwà bàbìdì bààbò bàlwàngana, mukwàbò yèyè ùvwa mwambule—mbekeci wendè wa mâyi; ne kulwanganabo mu dyalukila dyàbò, ne kuàpèèshabo Davidi. Nwènù bàmbambà bwà beena bukitù’s!

⁵¹ Davidi, muntu wa difwàna dyà Nzambi awu, kwambaye ne: “Nzambi ankàndeku bwà ncìyiku kunwà mâyi à kùdì balunda bàdì batèèke mwoyi wàbò mu njiwù aba to.” Kàdì kwenzayè mulàmbù wà dinwà; kuicikijayè paanshì, kuàfila kùdì Mukalenge. “Àfilayì kùdì Mukalenge. Yèyè Ngudi muàkùmbànyìne, kî mmémè nànsha.” Kutèèkabo . . .

⁵² Cifwànyikijilu cilelèlà cyà Kilistò Yèyè mwìnè, ne Mwoyi Wèndè Sungasunga wa Cyendèlèlè munda Mwèndè; Lubwebwe lutuuta alu, kupòngololayè Mwoyi Wèndè paanshì pa buloba, bu mulàmbù wa mpèkaatù bwètù twètù, bwà Dìyì edì dyàmòna mwà kwikala ne mwoyi.

⁵³ Kaa, bàà Bisàmbà byà bendè wetù, bu mungàmbì, nganyi wapàtula naanyi mwelè wà mvità pàmwè? Yèyè ùdì dijinga ne mâyi matalàle, mu dindà emu, kî ntwitàbàayi yà kale yà milèngàme yà èkèleeziyà ne bikwàbò bitùdì tukutakana naabi abi to. Yèyè mmuswè diitabuuja dishùwashùwàlè mu Dìyì Dyèndè, muntu wíkala mwà kwitabuuja Dìyì dyònsò dyà ku Dyòdì adi. Tùyaayi ku ciinà bwà kutwàla mâyi, cyashima; dikuukwila didì kadìyì diibakila pa twitàbàayi ne dingumba nànsha. Kàdì dikuukwila dyà Nyumà mushùwashùwàlè, ne Kilistò munkaci mwètù, mwikale ne Mwoyi Wèndè mùshindù ùdìYe muswè awu, munkaci mwètù, aci—aci kî nne twitàbàayi ne bintu bishiilàngàne to. Twikalàayi ànu—ànu Nèndè mùshindù awu.

⁵⁴ Mpindyewu, cìvwà cilondà cìvwa mmùshindù ùvwa Nzambi ùkwàta mudimu ne bantu mu cilòòtà, mu matùkù à—à Yòzefù. Nuvwaku bacimòne anyi? Cilòòtà cìlwalwa mwaba mwibìdì. Mmùshindù mwibìdì ùtu Nzambi ùkwàta mudimu. Bàmwè bantu bàdì mwà kupeta bilòòtà, kabiyì ne cidibi byumvwija nànsha. Udi mwà kudya kupicisha kàdì kupeta bilòòtàlòòtà. Nènku cilòòtà’s mmùshindù mwibìdì. Nwamònu anyi? Kàdì mbwà cinyi bùvwà Nzambi mwà kukùbila Mwan’Èndè Sungasunga ku mùshindù mwibìdì? Wàkamwenekela Yòzefù. Dyàkalenga dyà Wèndè Mwànà Sungasunga, Wàkaditùmina mu mùshindù mwibìdì. Nukàatukù kacya bacyelèlekù meeji anyi? Bwalu, kakùvwa mupròfetà mu ditùnga to. Byàkakèngela bwà kukwàcilaYe mudimu ku bilòòtà. Nènku kacivwa cilòòtà cyà

cikèngela kucyùmvwija nànsha. Mwanjèlò wa Mukalenge wàkamba ne: “Yözefù, kuciinyi bwà kwangata Màriyà mukàjèèbè nànsha, bwalu cidi ciimicibwe munda mwèndè aci ncyà kùdi Nyumà Mwímpè.”

⁵⁵ Cìvwa ncintu cyà pabwàcì bwà aci kwenzeka. Yözefù mwikàle ànu muntu mwakàne, yèyè... Cìvwa cyà pabwàcì. Nzambi kàtu wa ciibidilu to. Nènku cyà kacyi cyà ciibidilu aci mbikolè bwà kucyùmvwà. Ki bwà cinyi mbitàmbe bukolè bwà kuumvwà Bulelèlà leelù ewu; Kabùtu bwà ciibidilu nànsha. Mukàji wetù ewu wimita kàyì mumanye mulùme, aci cìvwa cyà pabwàcì menemene.

Kàdi wèwè mwikale wa kweyemena ne meeji matòòke, Nzambi ùdi mwà kukumwènekela mu cilòòtà. Bidi bileeja ne cintu kanà cyònsò cyùdi naaci, nànsha ciikàle meeji èbè, ní udi mwà kwela kashibà, kwimba, kufila bujaadiki, anyi ní ncinyi cyònsò cyùdi mwà kwenza aci, pìikala buumuntu bwèbè bujimà bulàmbula Nzambi, Nzambi ùdi mwà kukwàta naabù mudimu wèwè mwà kuMulekela wènza nànkù.

⁵⁶ Dìbà adi, dilòòlò dyàkalonda mwab'ewu, Mwanèètù Neville wàkayiisha pa cyena-bwalu cyà ne “kupànduka,” mùshindù wàkapàndukà muntu awu—awu. Nènku mèmè kudyàmbidila ne cìvwa mu mùshindù kampànda cyà pabwàcì.

Ne mu dindà emu Nyumà Mwímpè ùdi ùmwèka bu muswè bwà mèmè kwangata cyena-bwalu cyà bukènkè, cidi cilonda mene. Kutùngunuka ànu, kuya ku cibangidilu, mwàkatwàdijila mwoyi wà Kìlistò mu cidilù cyà nyama, tudì munkaci mwà kwenda kwalukilakù cyàkàbìdì mu cyena-bwalu cyètù eci. Nènku kàvwa mucimanyè nànsha; mèmè ncìvwa mucimanyè nànsha; ne mwab'ewu cidi ku cintu cimwècimwè aci. Nwamònu's, batùngùnùke, cintu cidi cilonda mmwaba ùdiYe ùditwa mu mudimu Wèndè wa bwambi. Nènku dilòòlò edi tudì ne cintu kampànda ciikalà mwà kunwàngana ne cyòci aci, bwà kutùngunuka, dilòòlò edi, bu Mukalenge mwà kwanyisha.

⁵⁷ Mpindyewu, Bukènkè bunène's! “Bàà Bisàmbà byà bendè bàvwà basòmbe mu myaba yà mindidimbì yà lufù, Bukènkè bunène mbuteeme munkaci mwàbò. Mu Zabùlòònà, ne Nefàtále, mu...lwà ku Ngaalèlà wa bàà Bisàmbà byà bendè, Bukènkè bunène, bàakamòna Bukènkè bunène.”

⁵⁸ Mpindyewu bukènkè, bukènkè bwà musangu wà kumpàla, tudì tubùsangana mu Bible, mbusanganyiibwa mu Genèsè 1:3. Cìvwa, Dìyi dyakula dyà Nzambi divwijibwe bukènkè. Nzambi wàkamba ne: “Bukènkè bwikalèku,” Genèsè 1:3, ne kwàkiikala bukènkè.

⁵⁹ Mpindyewu vùlukàayi ne, dìbà adi, bukènkè bùlwalwa ku Dìyi dyakula dyà Nzambi. Ne bukènkè bùdi dishindikà, anyi cyena-bwalu cidiYe mwambè, mbukènkè, pàdi bukènkè bùbùuka, mbileeja ne (Nzambi mmwambè ne: “Bukènkè

bwikalèku.” Kakùvwa bukênkè to, ne Yèyè wàkamba ne: “Bukênkè bwikalèku,” ne bukênkè bwàkiikalaku. Acì’s ncijaadiki.) bukênkè ndishindika dyà Díyi Dyèndè dyakula, cintu cìmwècìmwè aci leelù ewu, dishindika dyà Díyi Dyèndè dyakula.

⁶⁰ Mpindyewu panùdi numòna Díyi Dyèndè diikàle dishindikiiibwe, anyi, mu ngaakwilù mukwàbò, dimanyishiibwe, dijaadikiibwe, aci’s m—Bukênkè bwà Díyi Dyèndè dyakula. Nènku, kakùyi bukênkè to, cintu nànsha cìmwè kacýèna mwà kwikala ne mwoyi kakùyi bukênkè to. Kakwènaku mwoyi pa buloba leelù ewu pàdiwù kawùyi ewu ùdi ne cyà kulwila ku—ku bukênkè bwà díbà nànsha, mu mwoyi wà bukwàmici, ne bikwàbò. Ne kakwènaku Mwoyi wà Cyendèlèlèlè pambèlù pàà Mwànà wa Nzambi to. Nwamònu anyi? Yèyè’s ki Bukênkè.

⁶¹ Mpindyewu tudi tujandula ne, ngèèla meeji, patùdi tulonga mpindyewu apa, ne bukênkè ebu. . . “Buloba bùvwa kabùyi ne mbùngakeenu to.”

⁶² Mpindyewu, bàmwè bantu bàdi bàlàbakana leelù ewu mu bilongelu byètù, ne bikwàbò, bwà mùdi buloba ebu bwikale ne miliyò mipite búngi yà bidimu, kàdi bàteeta kupiisha Bible ne bamba mùdiYe ùdinga. Kabèènakù, kabàtukù banji kubala Bible to. S’kwajiki. Bwalu, Bible kènà út wàmbila ne buloba bùdi bukolè kaayi nànsha. Bible mmwambè ne: “Ku cibangidilu Nzambi wàkafùka maulu ne buloba.” Cìtùùdilu! Díbà kaayi, mùshindù kaayi, aci kaayi, katwèna bacimanyè to. Mpindyewu, aci’s ke cyàkumpàla. Nènku, aci’s ncitùùdilu, aci’s ndekeelu wa cyambilu aci.

⁶³ “Ku cibangidilu Nzambi wàkafùka maulu ne buloba.” Cìvwa cìfwànyìne kwikala miliyò lukàmà, anyi mùliyaalà, anyi cyònsò cìvwàku aci. Nènku mùshindù wàkacyènaYe, abu’s mbuMutàngile bwà kumanya, nwamònu’s, kì mbuntàngile to.

Kàdi buloba, èè: “Buloba kabùvwa ne mbùngakeenu to, ne bùvwa munda mutupù; ne màyi àvwa pa mpalà pàà—pàà buloba. Ne Nzambi,” kwambayè: “ùnyunguluka pa mpalà pàà buloba.” Ke kwambayè ne: “Bukênkè bwikalèku.”

⁶⁴ Mpindyewu, ndi ngèèla meeji ne díbà, ne bikwàbò, bikaavwa bimane kwikalaku, ndi ngèèla meeji ne, ngondo. Bu mùdi ntùngunukilu wàmba, mu Genèsè 3, bwà kucyumvwija. . . Kàdi ndi ngèèla meeji ne, cìvwaku kaaba aka, ncyà ne buloba, tuvwa ne cyà kukwàta naabu mudimu, nènku ki bwà cinyi. . . Ke kubwelacimu; kùvwa dibungì ne maciima pa buloba bujìmà, àbùvwija ne mîdimà. Ki Nzambi kwambayè ne: “Bukênkè bwikalèku,” ne mîdimà kuyayi mwamwamwa, ne kùvwa maulu kaayi mavuba to.

⁶⁵ Nènku ndi ngiitabuuja ne ke mùshindù wà Nzambi wà dýenza maalu. Yèyè. . . mu Bible, mvensà udi ulonda awu ùdi wàmba, mvensà mwi4 ùdi wàmba ne: “Ne Yèyè kutàpulula

bukènkè ne mîdimà. Ne kubîikilaYe bukènkè ne ‘ditùkù,’ ne kubîikilaYe mîdimà ne ‘butuku.’” Ne Dîyi dyà Nzambi ditu misangu yònsò ànu ditàpulula Bukènkè ne mîdimà. Nwamònu anyi? N’Dîyi didi ditàpulula, nwamònu’s, Bukènkè ne mîdimà.

⁶⁶ Nzambi ùtu ànu wènza cintu cîmwècîmwè aci, pàdîYe ùdîlongolola bwà kukwàta mudimu ne cintu kanà cyònsò. Bu mwàkadîlongololàYe bwà kukwàta mudimu ne mùtootò wà kale ewu, anyi ní ncinyi cyònsò cyàkadîku aci, buloba ebu, byàkakèngela bwà kutàpululaYe bukènkè ne mîdimà. PàdîYe ùdîlongolola bwà—bwà kukwàta mudimu ne—ne kasùmbù kàà bantu, Yèyè ùdi ne cyà kutàpuluka Bukènkè ne mîdimà. PàdîYe ùdîlongolola bwà kukwàta mudimu ne muntu-nkààya, Ùdi ùtàpulula Bukènkè ne mîdimà. Nwamònu anyi?

⁶⁷ Bukènkè bùdi bùlwila kùdî Nzambi. Nènku. . . Vùlukàayi ne, bukènkè bùdi bùlwila ku Dîyi Dyèndè dyakula. Dîyi dyà Nzambi ndyambè ne: “Bukènkè bwikalèku,” pàvwàku kakùyì bukènkè to, nènku kutùmaYe bukènkè bwà kutàpulula mîdimà ne bukènkè.

⁶⁸ Dîyi dyà cikemu edi kutòokeshadi dyulu bwà dîbà dyàmòna mwà kukenkeshamù. Nènku Dîyi Dyèndè leelù ewu ke didi ditòokeshà dyùmusha byuluulu byònsò byà bupidyà.

⁶⁹ Mwva nyiikilangana, mwikale ne—mwikale ne, ngèèla meeji ne, miyiiki yà bàbìdì ànu kumpàla kwà mèmè kufika ku cyambilu mu dindà emu, mwòmò amu. Bibi be. . .

⁷⁰ Dîngà ditùkù mulunda wanyi mukesè, Jim Poole, mwanèndè wa balùme mutekète, bàvwa bèèla meeji ne ùvwa ne disaamà dyà mwoyi, kuvùkutabo nendè lubilu ku lùpitaadi. Cîvwa ndukosò lwà mfwènke, lùvwà lukùlùle kakwàcikwètù. . . Kàvwa mwà. . . Mwoyi wèndè mukesè ùtumpika, ne wèyela, ne—ne yèyè wèla mikunda kàdi kàyì mwà kupeta mweyelu nànsha, nènku kakwàcikwètù kakesè kumweka bu kàvwa kàpunga ne lufù, pààkalwàbo nendè kaaba aka. Kàdi nkaavwa ndîlongolola bwà kuya ku lùpitaadi; bwòbò kulwa nendè kaaba aka. Ke mèmè kumukwàta ku cyanza cyèndè cikesè aci; mèmè kwamba ne: “Cidì cicyenzeje ncyà ne, kàntèbelele nkakwàte mwànà’s. Nènku, kàntèbelele, mubidi kapyà mmukwàte kakwàcikwètù kakesè aka. Mutàngilaayi. Mu matùkù makesè ndi muswè kumumòna cyàkàbìdì. Kàntèbelele nekàmupàtùke mubidi mujimà.” Kàdi’s ki yèyè ewu ne kàntèbelele mubidi mujimà, nudi numòna’s. Nwamònu anyi?

⁷¹ Mpindyewu, ncinyi aci? Nzambi ùtàpulula mîdimà ne bukènkè, anyi bukènkè ne mîdimà. Nènku Ùdi ùtàpulula lufù ne Mwoyi, ne Ùdi wènza nàнку ku Dîyi Dyèndè. Dîyi Dyèndè ke ditù misangu yònsò dipàtula eci.

⁷² Mpindyewu, bukènkè! Èè, mpindyewu, dimiinu dikaavwa dimanè kwikala pa buloba. Ndi ngítabuujà ne Nzambi ùkaavwa mukùne dimiinu. Nènku mu ntàntà yònsò uvwa dîbà mwà kufika

ku dimiinu adi, divwa ditwàdija kukola. Nènku ke bwà cinyi bidi bidikèngela ndambù wa matùkù bwà kutwàla bintu ebi, bwalu dimiinu dikaavwa mu buloba. Cyònsò cìvwa cidikèngela cìvwa m bukènkè.

⁷³ Nènku mùshindù awu ngùdi Nzambì naawu leelù ewu. Dimiinu Dyèndè dikaadi dimanè kwikala mwaba ewu, Dìyì Dyèndè. Cintu cìmwèpelè cìdì cìDikèngela m'Bukènkè pa Dyòdì adi. Ne Yèyè ki Bukènkè abu, bwalu Yèyè ùdi Dìyì. Dìyì ne Bukènkè ncintu cìmwècìmwè aci. Mwoyi ùdi munda amu awu ki Bukènkè bwà Dìyì, nwamònu's, ki Mwoyi. Mùtòlokù wà mwoyi wùdi wùsanganyibwa mu lutete, ne lutete. . . mwoyi ke wùdi wùpàtuka bwà kutwàla mwoyi pambèlù pàà lutete alu. Mùshindù awu ki ùdi Kilstò, mu Dìyì, ùfikisha Dìyì ku dyenza cìdìDi ne cyà kwenza. Ànu mùdi mwoyi mu lutete lwà blé amu, anyì ní ncinyì cyònsò; ùdi ùfikisha blé ku dyenza cìdiye ne cyà kwenza, bwalu mmwoyi ùdi munda mwàbù awu. Mwoyi wònsò's!

⁷⁴ Pa nàнку, Mwoyi wùdi ànu ku Dìyì dyà Nzambì dimwènèshìibwe. Mwoyi wùdi wùlwila ànu ku Dìyì dyà Nzambì dimwènèshìibwe. Pàcidici ànu cìsanganyibwa mu Mukàndà, mùshindù ewu, cìdì ànu mwà kwediibwa mpatà. Kàdi pàdici cìmwèneshiibwa, dìbà adi nudi numòna cipeta cyà cìdìDi dyakùle aci, munkaci mwà kumwèneshiibwa, dìbà adi ki Bukènkè pa—pa Dìyì. Nwamònu anyì? Ki cìdì citwàla. . . Dìyì didi dyàmba nàнку, ne, dìbà adi, pàdìbi byenzeka, s'ke Mwoyi mu Bukènkè, Bukènkè munkaci mwà kutwàla Mwoyi. Bukènkè bùdi bùtwàla Mwoyi.

⁷⁵ Kunabi blé mwaba wàwa, nebwikale. . . ne ùbùtèèke mu nzùbu wa mwishì mwà buloba, ùbùwikidijè bwònsò, nènku kabwà—kabwàkutwàla cintu nànsha cìmwè to, bwalu kabwèna mwà kutwàla to. Muntwamu kamwèna bukènkè to. Kàdi pàdì ànu bukènkè bùbùlenga, dìbà adi nebùtwalè mwoyi pìikalàbù dimiinu ne mùtòlokù munda.

Ki cintu cìmwècìmwè aci cìdì mu Dìyì. Nwamònu's, Dìyì ke Nzambì, nènku pàdì Mwoyi ùDilenga, cìdì cìDìtwàla. . . Bukènkè bùDilenga, bidi bitwàla Dìyì ku mwoyi cyàkàbìdì. Cikondo cyònsò cìtu misangu yònsò ànu nàнку. Kaa, mùshindù mene utùdi twanyisha bintu binène ebi, mùshindù mene wùdi Dìyì dishindikiibwe diikàle Bukènkè bwà Dìyì dyakula. Nwamònu anyì?

Nzambì wàkamba ne: “Bukènkè bwikalèku.”

⁷⁶ Mpindyewu, ambààyìbì tǔng bu Wikala mucyàmbe kàdi bukènkè kubènga kulwa? Dìbà adi katwèna tumanya ne mbulelèlè anyì kì m'bulelèlè to. Katwèna tumanya ne Yèyè mmulelèlè to. Katwèna tumanya ne Yèyè ùdi Nzambì anyì to, bwalu Wàkamba ànu ne: “Kwikalè,” kàdi kakwàkila cintu to. Nwamònu anyì?

Nàнку dîbà adi pàdì Nzambi wàkula ne tumòna ne ncyôci eci, dîbà adi ki Bukênkè bùdì bùkenka abu, Bulelèlè bwà Dîyi. Nwamònu anyi? Kùdi Bukênkè ne Mwoyi.

⁷⁷ Mwoyi wònsò wà mu bufùki wùdi wùlwila ku Dîyi Dyèndè dyakula. Nènku dîbà dìdì Dîyi Dyèndè dyakula. Yêyè wàkamba ne Wàkafùka bukênkè bunène mu maulu, bwà ditùkù, ne bukênkè bushààdile bwà bufùku. Nwamònu anyi? Ne mwoyi wònsò wà mu bufùki wùdi ne cyà kulwila ku Dîyi dyakula dyà Nzambi. Cilòngò kacyèna mwà kukola kakùyì bukênkè bwà Dîyi dyakula dyà Nzambi bucikenkèshile to, bwalu dîbà dìdì, d-î-b-à, n'Dîyi dyakula dyà Nzambi, pàkambàYe ne: “Bukênkè bwikalèku.” Nwamònu anyi? Mmwoyi mwakula wà Nzambi. Nànsha bantu bateeta kwa—kwamba *cikampànda*, *cikansanga*, anyi *cikankènga*, bìdì bishààla ànu byà mwomùmwe. Bikèngela wikale ne dîbà adi, nàнку mwoyi, wà mu bufùki, ùdi mwà kulwila ànu ku Dîyi dyakula dyà Nzambi.

⁷⁸ Ne Mwoyi wà nyumà, Mwoyi wà Cyendèlèlèlè, ùdi mwà kulwila ànu ku Dîyi dyà Mwoyi dyakula dyà Nzambi. Mwoyi ùvwa M-w-â-n-à cikondo aci. Mu Yêyè mmùdi Bukênkè, ne munda Mwèndè kamwèna mîdimà nànsha; ne Yêyè's ke Bukênkè bwakula bwà Nzambi. Ncyà bushùwà anyi? Dîyi dyakula dyà Nzambi, bwalu: “Ku cibangidilu kwàkadi Dîyi, ne Dîyi dyàkadi ne Nzambi, ne Dîyi dyàkadi Nzambi.” Ne Dìdì Nzambi kashidi. Nwamònu anyi?

Ne bìdì bikèngela Bukênkè bwà Nzambi bwà kulengabù Dîyi adi, bwà kuDìvwija ne mwoyi. Ki cyàkambaYe eci, mpindyewu Bukênkè bùkenkeshè's! Amen! Bukênkè bùkenkeshè, nènku Bukênkè nebùfikishe Dîyi dyònsò pa kaaba kààDi menemene, mu movù wàDi. Amen! Kaa! Nudi numòna's, pààlwà dîbà!

⁷⁹ Misangu mikwàbò lutete alu lùdi lùshààla mu buloba, lulààle, mu movù wònsò wà—wà mashìka, bu dimiinu, blé bwà mu movù wà mashìkà bukùna mu buloba. Kàdi pàdì ànu dîbà adi dîjaalama, kaa, dìdì ne cyà kwikala ne mwoyi. Nwamònu anyi? Nènku kadyèna mwà kwikala ne mwoyi dîbà kadiyiku nànsha.

Nènku Nzambi mmwenze milayì bwà cikondo cyònsò ne ditùkù dyònsò. Nènku pàdì Bukênkè bùjaalama, ne bukenka pa cyôci aci, necitwale ànu menemene cidì Dîyi adi dyambe, bwalu Yêyè ùdi Bukênkè ne Mwoyi.

⁸⁰ Dîyi dyà Nzambi dìdì dilwila ànu ku Bible. Bible wa Nzambi ùdi mmwenekelu mutuuta pa mabèji wa Mwànà wa Nzambi, bwalu Bible mmwambe ne Yêyè ke dibuulula dyà Yesù Kilstò. N'Nzambi ùDibuulula ku Kilstò, ne Kilstò ùdi Dîyi. Nènku bìdì bikèngela Bukênkè bwà Nzambi kukenkesha pa Dîyi adi, bwà kuDìshindikà, bwà kujaadika ne Nzambi ùcìdì ànu wàkula Mwoyi, Mwoyi wà Cyendèlèlèlè. Yêyè ùdi wàkula bukênkè bwà mu bufùki, ùtwàla mwoyi. Mwoyi wùdi wùlwila ànu ku Bukênkè, Dîyi dimwènèshìlbwe, anyi divwijìlbwe mubidi. Pàdì

milayi yònsò yilwa, mu Bible, yilwa mimwènèshùbwe, ke díbà divwà Yesù Kilistò, Díyì, muvwijìibwe mubidi munkaci mwètù. Nzambì ùtu misangu yònsò ànu ùkwàcila mudimu mu muntu. Muntu mmwena mudimu wa Nzambì.

⁸¹ Mpindyewu, wèwè muumvwe ndambù wa luuya munda emu, udi mwà kupwekesha màdidiishì, anyì cyònsò cyùdì uringa kwenza aci, kupwekesha bifidi byà luuyà abi. Pàmwápa mulami wa ntempèlo ùdi mwà kupwekesha ndambù cifidì cyà luuyà. Ndi mmòna bààbùngì buumvwa luuyà. Ne wèwè mwimane apa kùdi luuyà, kàbidì, nàнку—nàнку nwavùlukaayi aci. Ndi ne disànkà bwà mùdiku luuyà pamutù pàà mashika, bwalu ntu—ntu munange luuyà. Ndi. . . Luuyà lùtu misangu yònsò lùtwàla bukènkè, mwoyi, bikèngela kapyà.

⁸² Mònaayi mpindyewu ne: “muvwijìibwe mubidi.” Pàdì Díyì dishààla mubidi, Dídi dílwa dimwènèshùbwe. Bu mùdì, angàtà Díyì ùDitèkè mu mwaba mujaalàme ne mùshindù mujaalàme wà buloba, neDìkwamè mamuma. Di—dimiinu nedìkwamè mamuma à ngiikàdìlù wadi. Ne Díyì pààdì, ditwàla mu mwoyi wà mùshindù mujaalàme, neDìdimwènèshè. NeDìtwalè bukènkè. NeBùdikenkèlè. Èyo.

⁸³ Cintu nànsha cimwè cyà mu bufùki, cintu nànsha cimwè cyà mu bufùki anyì cyà nyumà, kacyèna mwà kwikala ne mwoyi kakùyì Bukènkè bwà Nzambì to. Mwoyi ùdi mwà kulwa díbà adi ànu ku Bukènkè. Cintu nànsha cimwè cyà mu bufùki anyì cintu nànsha cimwè kacyèna mwà kwikala ne mwoyi kakùyì Bukènkè bwà Nzambì to. Elààyibi meeji ku cyòci aci. Èyo. Kàdi pàdìYe ùtùtùmina Bukènkè, nwamònu’s, ne wènzà bintu byònsò ebi, ne pashìshe tuCibènga; mpindyewu aci’s ki citùpà cyà cyenza luse, mpàdì Bukènkè bubèngìbwe pàdìBu butùtùmina.

⁸⁴ Mpindyewu nudikù mwà kudifwànyikijila muntu kampànda leelù ewu wàmba ne: “Ndi mèmè ànu mbènga kwamba ne kùdi cintu pààci ne ndìbà. Ncyèna ngiitabuuja ne kùtu díbà nànsha”? Ne ùnyeema lubilu ùkabwela mu nzùbu wa mwinshì mwà buloba, ne—ne winjila biibi, kàdi ùsòmba lwà mu mìdimà amu, ne wàmba ne: “Cintu pààci ne ndìbà kacitukù nànsha. Cintu pààci ne mbukènkè kacitukù nànsha.” Udi mufwànyine kumanya, buludi, ne kùvwa cintu cipampàlámùke mu byeledi byà meeji byà muntu awu. Nwamònu anyì? Kùdi cintu cimpampàlámùke, pàdiye ùya lubilu ùkabwela mu nzùbu wa mwinshì mwà buloba ne ùpidya kwitaba bilenga byà bukènkè bufilà kùdi Nzambì. Kùdi cintu kampànda cimpampàlámùke kùdiye. Kènà muswè nsèsè yàdì yà luuyà ayi to. Kènà muswè cifidì cyàdì cyà makàndà à mubidi aci to. Kí mmuswè bukènkè bwàdì, bwà kwendelamù to. Ùdi mene mwà kuswà mwà kusòmba mu mìdimà. Bidi bileeja ne, mu byeledi byèndè byà meeji, kùdi cintu kampànda cimpampàlámùke, mu bufùki, kùdi muntu awu’s.

⁸⁵ Ne ndi ngamba eci ne dinanga dyònsò ne kaneemu. Ki mùdiku cintu kampànda mu nyumà cimpampàlámùke kùdi muntu ùdi unyeema lubilu wàlukila mu màngumba èndè à twitabàayi ne ùpidya bwà kumòna Bukènkè bwà Bible pàdiBu bukenkesha ànu kumpàla kwèndè apu. Kùdi cintu kampànda cipampàlámùke kùdiye. Nwamònu's, wàlukila mu twitabàayi yèndè ne mmwènekèlu yà kwisù, ne winjila ciibi wàmba ne: "Cintu pàaci ne n'Cyôci aci kacitukù to. Matùkù à bishimà àkaadi mapite. Kakwènakù cintu pàaci ne ndyondopa dyà kùdi Nzambì to, kakùtuku bintu bu ebi to. Aci's cìvwa mbwa mùpostòlò kampànda." Muntu awu's mmupàle mu nyumà. Nwamònu anyi? Kùdi cintu kampànda cipampàlámùke kùdiye. Yèyè—yèyè—yèyè mmupwekèshe ridò ne mubènge Nyumà Mwímpè udi mwà kulwa pambidi pèndè awu. Bu yèyè mwà . . .

"Nwènù bashààle munda Mwànyì, ne Mèyì Àanyì munda mwènù, dîbà adi, Bukènkè bùdi bùteema pa Dîyì edi abu, nùlombè cinùdi baswè." Nwamònu anyi? Nwamònu anyi?

⁸⁶ Kùdi cintu kampànda cipampàlámùke, bwà mùdiye mwà kubènga mishimì mifila kùdi Nzambì yidi Nzambì mutùpèeshe bwà kwikadilakù ne mwoyi, Dîyì Dyèndè. "Mwakàne neikale ne mwoyi ku diitabuuja."

"Ne muntu kààkwikala ne mwoyi ànu ku dyàmpà nkààyaadi to, kàdi ku Dîyì dyònsò," kî nciitùpà cyà Dîyì to: "Dîyì dyònsò didi dipàtukà mukana mwà Nzambì." Kàdi pìikala muntu mwà kubènga ànu Aci, kùdi cintu kampànda cipampàlámùke kùdi muntu awu; cintu kampànda cipampàlámùke ne dilabula dyèndè, bwà mùdiye wàmba ne mmunange Nzambì kàdi pashìishe ùpidya Nzambì. Kùdi cintu kampànda cidì cipampàlámùke kùdi muntu awu. Tudi bamanyè aci, kakùyì mundidimbì wa mpatà to. Ùdi ùCibènga, ùbwela lubilu mu mwaba ewu, wàmba ne: "Mpindyewu ndi ànu. . . Ncyèna muswè kumanya kantu nànsha kàmwè pa Cyôci aci to. Kùngambidiku cintu nànsha cimwè pa Bintu ebi to. Mèmè, ncyèna ngiitabuuja cintu nànsha cimwè pa Bwalu abu to. Wèwè, cyùdi wamba nànsha ciikàle cinyi!"

⁸⁷ Muntu kampànda kwamba nànkù, matùkù mashààle aa. Mvwa nmulondela bwalu abu. Kwambaye ne: "Ncyèna ncyùka nànsha wèwè mulwe ne beena kànsèrè makumi àtaanu, mulwe ne ngàngàbukà makumi àtaanu bwà kubijaadika, ncyèna ngiitabuujuaku to. Kabyèna bingambila bwalu to nànsha wèwè mubiishe bafwè, mwisù mwànyì mene, ncyèna mwà kuciitabuujuaku to." Nwamònu's, kùdi cintu kampànda cipampàlámùke kùdi muntu awu. Kùdi—kùdi—cidikù. Nènku—nènku, nànsha nànkù, muntu awu ùvwa mwambi, nwamònu's, nwamònu's, udi ne cyà kwikala mwambi.

Kàdi ànu bwalu bulongolodi abu kabwèna bwitabuuja mu—mu makolè à Nzambì to, kabwèna bwitabuuja ne Dîyì adi, Didi

dyùmwija ànu cidiDi dyambè to, muntu nyèwù ùya lubilu mu nzùbu wa mwinshì mwà buloba ewu, nzùbu wa mwinshì mwà buloba wa kale wa mutaleela, wa manyaanu, wa bukooyà wa bulongolodi awu, kàdi ùbènga luuyà ne nsèsè mifidì yà Mwoyi yà Nyumà Mwimpè, Yesù Kilstò, udi umwèumwè awu makèèlèlè, leelù, too ne kashidi awu. Dìbà adi kùdi cintu kampànda cipampàlámùke kùdi muntu awu. Nwamònu anyi?

Ùdi ànu mene mwà kusòmbela mu mutaleela awu, mîdimà, ne bikwàbò, kutàmba kusòmbela mu Bukènkè bwà Nzambi ne bwà Bible bùdi bwambe, ne: “Yesù Kilstò ùdi umwèumwè awu makèèlèlè, leelù, too ne kashidi. Byenzedi bìndi Mèmè ngenza nenùbyènzè pèènu. Mene nenwènzè binène bipite ebi, bwalu Ndi nya ku Taatù Wanyi.” Kùdi cintu kampànda cipampàlámùke kùdi muntu awu. Kakùyì mpatà to, nànsha kakesè, kùdi cintu kampànda cipampàlámùke.

⁸⁸ Ne wèwè muntu udi munkaci mwà kutèeleja eci, mu buloba bujimà, nànsha wèwè penyì, kùdi cintu kampànda cipampàlámùke mu dilabula dyèbè, paùdi wamba ne udi munangè Nzambi kàdi ubènga Dìyì Dyèndè. Kùdi cintu kampànda . . . Udi ubènga cinè. . . Kabyèna bikèmesha bwà pàdi bintu kabiyìku mwà, èkèleeziyà ùdi mu ngiikàdìlù wendè, ne bintu kabiyì mwà kwenzeka mùdi Nzambi mulaye nànsha, mbwalu kwèna nànsha wakidila Dìyì anyi wendela mu Bukènkè to. Bible mmwambè ne: “Twèndelàayi mu Bukènkè, bu mùdiYe mu Bukènkè, dìbà adi Mashì à Yesù Kilstò, Mwànà wa Nzambi, àdi àtùkezula ku mpèkaatù yònsò.” Mpèkaatù’s “mbupidyà.”

⁸⁹ Dìbà adi twètù twendela mu Bukènkè bufila kùdi Nzambi bwà dìbà edi abu, nànkù Nzambi ùdi wàngata Dìyì dìdi difila bwà dìbà edi adi ne ùDishindika.

Ànu mwàkenzàYe mu Genèsè 1:3, wàkamba ne: “Bukènkè bwikalèku,” ne bukènkè kupàtuka. Dìyì Dyèndè dyàkapàtuka, ne bukènkè kuDìlonda, ne kukenkesha mabungi. Nènku mîdimà kuya ku ditumba kampànda, ne bukènkè kukenkeshabù ku luseke lukwàbò.

⁹⁰ Mùshindù awu ngùdi Nzambi wènza leelù ewu. Ùdi ùtuma Dìyì Dyèndè bwà dìbà edi, ne Nyumà Mwimpè ùdi ùlwa ne ùvwija Dìyì adi ne mwoyi. Ne mîdimà yitùngunuka too ne ku twitabàayi yàbò ne màngumba, kàdi Bukènkè bùdi bùkenka bwalu n’Dìyì dyà Nzambi munkaci mwà kushindikiibwa ne Dìyì Dyèndè ndilelèlè. Mpindyewu, kakwèna cintu nànsha cìmwè cyà cifwìkakaja pa bwalu abu to, aci’s ncyà mu Mifundu menemene. Èyo.

⁹¹ Mpindyewu, tudi tusangana ne beena—beena meeji abu, beena meeji bàà Kale abu, bààkalonda cintu cìfila kùdi Nzambi aci. Bààkalonda Dìyì dyà Nzambi, ne ku Bukènkè, bwalu cìvwa n’Dìyì dyàkatwàlà Mwoyi. Mpindyewu wèwè udi wamba

ne: “Mmunyi mwàkalondabo?” Èè, bàvwa, bu, balongi bàà mabùlùnga, mutùdi tuumvwa.

⁹² Ne pashiishe tudi tusangana ne Baalàmà, mupròfetà awu, mwàmwa mu Nombà 24:17, Baalàmà ùvwa mulongi wa mabùlùnga. Yèyè wàkadi mupròfetà, mu bulelèlè, ne wàkafila cipròfetà mwaba ewu ne kwamba ne Mùtootò kampànda neupàtukile mu Yakòbò.

Nènku pààkamòna beena meeji aba ne Dîyi dyà Nzambi ndyambe ne Mùtootò kampànda neupàtukile mu Yakòbò, bààkalonda cimanyinu cikesè cifila kùdi Nzambi aci too ne ku mushimi wà Bukènkè bwà Cyendèlèlè.

Ke mwikala beena meeji leelù ewu, bàdi kabàyi bafofomija kùdi twitabàayi abu, nebàlonde Dîyi dyakula, difilà dyà Nzambi adi too ne mwàmònabo dyùla dyà Bukolè bwà Nzambi bwèla bilòngò mu díbà edi. Bwòbò, bàdi bàcimòna, ne mbamanyè ne cìdi kaaba aka mu Mifùndu. Nzambi mmucilayè bwà ditùkù edi.

⁹³ Nànsha mùvwa nzùbu yà dijoojela yàbùngì, nànsha mùvwà bìngà bintu, byàmbila beena meeji abu ne: “Mòna’s, nudi bajimije lungenyi!” Bàvwa munkaci mwà lwendu bidimu bibìdi bulubulu. Bààkápìcila mu matùnga àbùngì, ne bàvwà mwà kwamba ne: “Nuyàaya penyì?”

⁹⁴ “Kaa, tudi bamòne Mùtootò Wèndè mu Esètè, ne tudi balwè bwà kuMukuukwila.”

Nènku pààkatwàbo makàsà mu Yelusàlèmà, ciimamwèndè wa bukalenge cyà cyena-màngumba, kabàvwa ne dyandamuna to. Bààkabànda ne kupweka ne misèèsù, bèèla mbilà ne: “Yèyè ùdi penyì, udi muledibwe Mfùmù wa beena Yudà awu?” Kabàvwa bamanyè kantu nànsha kàmwè pa bwalu abu to.

Pa nànkù, bààkabiikidisha Dîyi, bwà kujandulabo. Bàvwa balonda, bamanyè ne Mùtootò awu ùvwa ùbàlombola too ne ku Bukènkè bwà Cyendèlèlè. “Tùlombòlèku ku Bukènkè Bwèbè bupwàngàne.” Nènku Dîyi ke didi dìnùlombola ku Bukènkè, ne Bukènkè ke bùdi bùshìndika Dîyi. Mònaayi ne, bàvwa beena meeji.

⁹⁵ Nènku beena meeji abu leelù ewu, kí mbeena mee-... “Lungènyi lwà buloba ebu ndikùtakana kùdi Nzambi.” Beena maalù à mamanya bèènù bwònsò, ne nwènu bàdi beeyèmène dilonga dinène kampànda dyà dibàla, anyì cintu kampànda cikwàbò, dinwàmbila mwàkusùsululà kapwishipwishì; kabyèna mwà kunùpèèsha Mwoyi nànsha. Kakwèna cintu nànsha cimwè cìdi mwà kukupèèsha Mwoyi to pakuumusha Dîyi dyakula dyà Nzambi. Ki mwaba wùmwèpelè wùdi Mwoyi awu mwà kulwa, nku Dîyi Dyèndè dyakula.

⁹⁶ Nènku aci’s ncìmpè, bwà kumanya mùshindù wà kusùsululà kapwishipwishì. Ndi ntèkemena ne kabààkukàpeta mwaba nànsha ùmwè to. Kàdi bu bwòbò... Bikèngela bàcyènzè,

bwalu buloba ebu mbulembèlèle leelù ewu...Bikèngela cyenzekè, bwà kutaayisha masòsò manène àdì mu buloba aa, bwà kupàtula musàbùsàbù wà buloba ne kubwàluja nsonga kàbìdì, bwà kwenza buloba bupyabùpyà; mwikalà baakàne mwà kupatukila mu lupwishi lwà beena lwonji, mwikalà mpèkaatù mwà kupwibwa mwoyi. Cintu cyònsò eci cidi ne mùshindù wà kudivwija cipyacipyà. Nènku muntu, wàkapèèshiiibwa bwà kusòmbela pa buloba ebu, ku lungenyi lwèndè sungasunga, kwangata mucì wà dimanya pamutù pàà Mucì wà Mwoyi, yéyè neàbùtulè buloba bùdì Nzambì mumupe bwà kusòmbelamù. Kàdì aba bàcìdì ànu pa Mucì wà Mwoyi abu, nebàlwe ku mauulu mapyamàpyà ne buloba bupyabùpyà, mùdì kamùyì ní ndisaama anyì lufù to. Bukènkè! Bukènkè, Mukalenge, tütùmine Bukènkè.

⁹⁷ Bàvwa mBanjèlò bàà Nzambì bààkaleeja bukènkè pa kakùnà, bwà kulombola balami bàà mìkòòkò ku Bukènkè bwà Cyendèlèlè. Nwamònu's, cidi ànu cilwila ku Bukènkè. Mwoyi ùdì mwà kulwila ànu ku Bukènkè. Balami bàà mìkòòkò, bàjinga kumanya. Nudi bamanye's, pàtù mfùmù ùlediibwa, bàtu bimba misambu, masànkà manène, pàtù mfùmù ùlediibwa. Mpindyewu, Yéyè wàkaleejiibwa mu musokoko wà menemene, ne mulediibwe mu cikùmbì, mu ci—cidiilù mùvwà ngombe ne túbalù munkaci mwà kudiila, kàdì nànsha nàнку Yéyè ùvwa Mfùmù. Nènku Ba—Banjèlò kutùulukabo ne kwimbilabo balami bàà mìkòòkò miyengà, mu Bukènkè.

Banjèlò, bòbò mene, bàvwa makènkè àkaleejiibwà ne Dìyì dyà Nzambì. Bààkadi ne Dìyì dyà Nzambì, ne kubàmbila ne: “Leelù ewu, mu cimenga cyà Davìdì, mu Betèlèhemà, mmulediibwe Kilistò Musùngidi.” Banjèlò bàvwa ne Dìyì, ne Dìyì dyàkalwila ku Bukènkè, bwà kulombola. Ki kulondabo Dìyì dyà Banjèlò, ne ku Bukènkè bwà Cyendèlèlè. Kusanganabo Mwàna kuntwaku, mùjingila mu mìkùsù, ànu mùvwàBo bambe amu. Bwalu, nudi numòna, Mwoyi ùtu ùlwila ànu ku Bukènkè.

⁹⁸ Mònaayi ne, Yéyè ùvwa Dìyì divwijiiibwe Bukènkè, anyì dyàkalwà Bukènkè. Dìyì mu lukongo alu, Yéyè ùvwa Dìyì Bukènkè bwà lukongo alu, bwalu bapròfetà bàà kale bààkaakula Bwèndè, nènku ki Yéyè ùlwàlwa ewu ne ùshindika ne Ùvwa Bukènkè bwà Dìyì dyakula dyà Nzambì. Nwamònu anyi? Byònsò bìvwà—bìvwà bapròfetà bambe, byàkakumbanyina mu Yéyè, nwamònu's, bapròfetà bàà kale abu ne Dìyì.

Ànu mwàkadì Nzambì ku cibangidilu amu, pàakambaYe ne: “Bukènkè bwìkalèku,” ki bukènkè kulwabù.

Mpindyewu mupròfetà wàkamba ne: “Virgò neimite difù, neàlèlè Mwàna wa balùme. Nebàmwinyikè Dìna Dyèndè ne Emanùwèlè, bwalu Yéyè neikalè Nzambì neetù.” Mpindyewu, bàvwa badyakùle, Dìyì dyàkapàtuka; kàdì Yéyè ùvwa Bukènkè. Yéyè ùvwa cinyi? Dikùmbana. Alèluuyàh! Yéyè ùvwa dikùmbana dyà Dìyì adi. Yéyè ùvwa dimwèneshiiibwa dyà Dìyì adi.

⁹⁹ Ke mùdibi leelù ewu, Díyì dyà Nzambì ndyúle pa díbà! Ki Bukènkè mbwòbù abu. N'Nzambì ùDimwènesha. Yèyè nguvwa Bukènkè bwà bàà pa buloba.

¹⁰⁰ Nènku pàvwà bapròfetà abu, basonsòdiibwe kùdi Nyumà Mwímpè, kwambabò ne: “Mbatùlelèle Mwànà, mbatùpèeshe Mwànà wa—wa balùme, anyì Mwànà mmufidiibwe; ne nebàmwinyike Dìnà Dyèndè ne ‘Mubedyanganyi, Mfùmù wa Ditalala, Nzambì wa Bukolè, Taatù wa Kashidi,” ki cyòci aci. Yèyè ùvwa cinyì? Bukènkè bwàkākùmbaja Díyì adi, amen, Bukènkè bwàkākùmbajà Díyì adi.

¹⁰¹ Mu Maatàayi, mu Maatàayi Munsantu nshapità wa 28, tudi tusangana. Nènku pàākabiikà Yesù ku bafwè, Yèyè ùvwa kàbìdì Bukènkè bwà Díyì dyakula dyà Davidi, dyākambà ne: “Ncyàkulekela musùukà Wèndè mu ifèrnò to; anyì ncyàkwitaba bwà Wa Cijila Wanyì àmonè dibola nànsha.” Lufù lùvwa mu mîdimà. Kàdi Yèyè wàkacibula bìtampì byà lufù, ne wàkabwelamù, ne kupátuka cyàkàbìdì. Yèyè ùvwa Bukènkè, Díyì dishindika, dyà ne bafwè bàdi mwà kwikala ne mwoyi paanyimà pàà bòbò bamanè kufwà. Ke cìvwàYe.

¹⁰² Mu Ditùkù dyà Mpenta, aci's cìvwa Bukènkè bwàkaleejibwà pàākālwa Nyumà Mwímpè.

Yeshàayi mmwambè, mu nshapità wa 28 wa Yeshàayi, Yeshàayi wàkamba ne, biikàle ne: “Kanungu kàdi ne cyà kwikala pa kanungu; mulongo ùdi ne cyà kwikala pa mulongo; apa ndambù, ne pàpa ndambù.” “Kwàtaayi bikolè ku cidì cimpè aci.” “Bwalu ku mishìkù yìdì yìkukuminà ne mu mikwàbò myakulu nkuNgààkwilà ne cisàmbà eci. Nènku s'ki dikisha edi, s'ki Nsabatu uNgààpèèshà. . . Nànsha byònsò abi kabàyiku mwà kutèeleja to; kukwàta njila kuya, bàkùpa mitù yàbò.”

Nènku pàvwà mu Ditùkù dyà Mpenta, pàvwà Nyumà Mwímpè mumacile bantu abu, kàdi's bààkenza maalù bu balùme ne bakàjì bakwàcike maluvu, bàtètuka ku bwenzeji bwà Nyumà Mwímpè. Kàdi bàākakwàta njila kuya bàkùpa mitù yàbò, bamba ne: “Bantu aba mbakwàcike maluvu, mbùle tètè ne mvinyò mupyamùpyà,” ne bikwàbò. Kakùyì mpatà to Cìvwa Bukènkè, Díyì dyàkambiibwa mu cipròfetà adi, dyàkamwèneshiibwa adi.

¹⁰³ Ki mùdibi mu cikondo ne cikondo cyònsò, Díyì dimwènèshìibwe, dilwè ku Mwoyi, ke Bukènkè bwà cikondo aci, s'ke Díyì dimwènèshìibwe adi. Ànu mwàkadibi mu Genèsè 1, pàākambà Nzambì ne: “Bukènkè bwikalèku,” ne ke bukènkè kwikalaku. Pàākambà Nzambì ne nekwikalè Mwànà wa balùme; ne kulwaku Mwànà wa balùme.

¹⁰⁴ Pàākambà Nzambì, mu Yowèlà 2:28 ne: “Nebyènzekè mu matùkù a ndekeelu ne, Nèngiìcikijè Nyumà Wanyì pa mubidi wònsò; bàna bèènù balela balùme ne bakàjì nebàmbè bipròfetà; pa basadidi Bàànyì balùme ne bakàjì Nèngiìcikijè Nyumà Wanyì; bansongàlùmè bèènù nebàmonè bikeènà-kumòna;

banunu bèènú balùme nebàmonè bilòòtà.” Nènku bintu byònsò byàkalayàYè, pàdiYe, Nyumà Mwímpè upòna, cìvwa Bukênkè pa Dìyì adi. Pààkamwèneshiibwa Dìyì, pashiishe kulwaDì Bukênkè.

Yèyè ùdi Bukênkè. Yèyè ke Bukênkè butùdi ne cyà kulonda. Yèyè ke Bukênkè bumwèpelè. Banjèlò bàakasangana Bukênkè, ne kuBùlondabò too ne kùdiYe.

¹⁰⁵ Mpindyewu, mu bikondo byònsò, Nzambì mmutèèke Dìyì Dyèndè búngi kampànda bwà cikondo cyònsò. Nzambì ùtu misangu yònsò ànu ùtuma muntu kampànda udi Dìyì adi mwà kubwela munda mwèndè bwà kuleeja Bukênkè bwàDì. Aci, cikondo cyònsò, cìdi cyèenza cintu cimwècimwè aci, cicyèenza misangu yònsò.

¹⁰⁶ Yèyè ùvwa dikùmbana, bu mungàmbi, dyà makolè wònsò à Bunzambì, à cijila à bapròfeta. Bòbò bàvwa banzambi bakesè. Pààkalwà Dìyì dyà Mukalenge kùdi muntu, Yesù wàkamba, Yèyè mwinè, ne yèyè awu ùvwa nzambì. Nudi bamanyè aci's. Yèyè ne: “Piikalà mikenji yènù myambe, ne baatatwènú kale wàwa, mibàbiikile, bwòbò beena kùvwà Dìyì dyà Nzambì dilwila abu, mibàbiikile ne 'nzambì,' mmunyi munùdi mwà kuMpìisha, pàNdi ngàmbe ne: 'Mémè ndi Mwànà wa Nzambì awu?'" Nwamònu anyi?

Pàdibi ne, Nzambì Yèyè mene, Wakaakwila Dìyì ku bapròfeta awu, Yèyè ùvwa dimwèneshiibwa dyà Dìyì dyakula adi. Nènku piikalàbi ne mupròfeta wàkabiikidiibwa ne n'nzambì, bwalu yèyè ùvwa dimwèneshiibwa dyà Dìyì dyà mupròfeta mukwàbò, mmunyi munùdi mwà kuMpìishà Pèndè mwikale cintu cimwècimwè aci? Yèyè ùvwa Mwànà wa Nzambì, mùvwàYe mwà kubiikidiibwa ne m'Mwànà wa Nzambì.

¹⁰⁷ Yèyè ùvwa Maasiyà mulaya ntàntà mule wakadi bàà pa buloba bindile. Yèyè wàkadi mulayi wà Maasiyà awu mumwèneshiibwe.

¹⁰⁸ Mutàngilaayi pàvwàYe mwimàne mwaba awu apu. Wàkamba ne: “Mémè ncìyì ngenza byenzedi byà Taatù Wanyì to, díbà adi mMpìishaayi's.” Nwamònu anyi? “Kàdi nwènù kanùyì mwà kungiitabuuya Mémè to, itàbùùjaayi byenzedi biNdi ngenza. Bidi bijaadika ne Ndi Nganyì. Bidi binwambila ne Ndi Nganyì.”

Nudi numòna's, díbà difofomè, dyà mídima mùdibo ne mwoyi amu, kabàvwa mwà kuCimòna nànsha. Kabàvwa ànu mwà kuumvwa to. “Mmunyì mùvwàYe mwà kwikala Aci's? Mmunyì mùdiYe mwà kwikala Mwànà kampànda wa Nzambì, Pèndè mulediibwe ànu munwemu mu Betèlèhèmà emu's?” Bu biikala nànsha bamanyè, Dìyì's ndyambe ne Bìvwa mwà kwenzeka mùshindù awu's. “Mòna's, tatwÈndè, Yòzefù's, mmukoonyi wa mabaya. MamwÈndè, mòna's, ncyà bushùwà ne mbítàbùùjiibwe munkaci mwà bàna bèètù ne Yèyè wàkalediibwa

mu masandi.” Nwamònu anyi? Kàdi nànsha nànkù Dìyì dyà Nzambi ndidì dyambe nànkù’s.

¹⁰⁹ KwambaYe ne: “Kenkètaayi Mifùndu, bwalu mu Yôyi nudi nwela meejì ne nudi nupeta Mwoyi wà Cyendèlèlè, kàdi Yôyi ke Miinè yidì yifila bujaadiki bwà ne Ndi Nganyi. Yôyi ke Miinè yidì yifila bujaadiki Bwànyì, Mifùndù yà Cijila eyi.” Pashiishe cìvwàYe ncinyi? Bukènkè bwà Nzambi. Kabyèna bikèmesha to pàakambàYe ne: “Mèmè ndi Bukènkè bwà bàà pa buloba.”

¹¹⁰ Yèyè kàakamba ànu ne: “Ndi Bukènkè,” to kàdi Wàkamba ne: “Nwènù nudi Bukènkè.” Pìikalàbi ne Dìyì Dyèndè didi munda mwèbè, diDifdila bujaadiki, díbà adi wèwè udi Bukènkè bwà bàà pa buloba. Mònaayi ne, tudi tujandula ne, Bukènkè bwà cikondo ne cikondo cyònsò bùdi bùmweneshiibwa ànu mùshindù ùmwèùmwè awu.

¹¹¹ Díbà adi ndi muswè kwela lukonko, bu mùdì. . . kumpàla kwà díbà dyètù kujikadi. Bwà cinyì, bwà cinyì díbà adi bàvwa. . . bàakacibènga? Mmunyi mùvwàbo mwà kucyènzà, pàdìbi ne. . . Bible wabò mene awu, wàkadibò munkaci mwà kubala awu, ùvwa munkaci mwà kumwèneshiibwa kumpàla kwàbò. Mpindyewu longàayi bikolè menemene mpindyewu.

¹¹² Mpindyewu vùlukàayi ne, ndi ngàakula ne bantu bààbùngì pa díbà edi, nudi numòna’s. Kì ng’ànù nkàmà yìnaayi anyì yìtaanu yidì kaaba aka eyi nànsha, kàdi ndi—ndi ngàakula ne binunu kabìyi kubala.

¹¹³ Ànjì imànaayibi kakesè. Imànyikà cisanji cyèbè cìdì cìkwàta mukàbà aci ne udyelè lukonko. Mbwa cinyì bùvwa mutèndeledi, muntu mwìmpè. . . Mbwa cinyì bùvwa Yòzefù mwà kudikonka? Nwamònu anyi? Mbwa cinyì bùvwà Yò-. . .? Bwalu kàvwaku mukenkète Mifùndu nànsha.

Bwà baakwidi bàakadikonka? Kabingìlà kàmwè kàà ne kabàvwa. . . bàvwa bacimanyè. Nicodemè’s wàkacileeja patòòke. Wàkamba ne: “Laabi, tudi bamanýe ne Wèwè udi mulongeshi mufume kùdì Nzambi. Kakwèna muntu udi mwà kwenza byÚdì wenza ebi Nzambi kàyi nendè nànsha. Bwà aci kaayi tudi bamanýe.” Kàdi cìvwa cinyì? Bilèlè byàbò byàkabàpangisha bwà kucyènzà.

¹¹⁴ Díbà adi mbwà cinyì bùvwàbo, bwàkabèngelabo Maasiyà? Mbwal-. . . Bwà cinyì bàakabènga Bukènkè? Ke Dìyì dyàkadibò bamanýe ne òvwa ne cyà kukùmbana edi, kàdi pàakamwèneshiibwà Dìyì bwà kuleeja ne Dìyì dyà Nzambi òvwa dyùle (Fwanyikijàayi aci ne leelù ewu. Nwamònu anyi?) pàdì ne, mbafunde mu Dìyì, ne aci cìvwa mwà kwenzeka, díbà adi bwà cinyì bantu abu bàakacibènga? Balongeshi abu. Bwalu bàvwa basòmbele mu dibàlakana dyà bukènkè bukàbò. Mmwòmò. Bàvwa basòmbele mu dibàlakana.

Ki cintu cìdìbo bènzà leelù ewu aci’s. Mbasòmbele. . .

Cyàkenza ne bàcìbènge mbwalu bàvwa basòmbèle mu dibàlakana dyà bukènkè bukwbò. Nwamònu anyi? Mpindyewu, bàvwa basòmbèle mu dibàlakana dyà cyàkamba Mòsà, mwàkadibo bàmba's. Bàvwa basòmbèle mu dibàlakana dyà cinyi apa? Dyà cikondo cikwbò cimanè kupita's.

Nènkus ki bwà cinyi mene leelù ewu Mukenji ewu, wa ne: "Yesù Kilstò ùcidi ànu umwèumwè awu," mmudyombola, bwalu bantu mbasòmbèle mu bukènkè bwà bikondo bikwbò. Bwà kabingilà ànu kàmwèkàmwè aku, nebàBùbènge. Mpindyewu tudi tumòna's.

¹¹⁵ Nènkus Webster ùdi wàmba, ne: "Dibàlakana mbukènkè kampànda bwà mafi. Dibàlakana mbukènkè bwà mafi; ncintu kanà cyònsò cidi cibàlakana eci."

Bu mùdì—bu mùdì màyi à bakishi mu njila's. Udi wenda upweka ne njila, nwènù bààbùngi bàtù bendesha màshinyi, ne panùdi nutàngila kumpàla kwènù apu. Panùdi numòna dîbà adi panshi pa buloba, didi dìleeja bukènkè kampànda, nènkus byenze bu màyi à bakishi, bìmwènèka bu ne kùdi màyi mu njila mwònsò amu. Kàdi, paùdi ufika mwaba awu, mpatupù ànu pèètù pàà patupù apa. Cidi ànu màyi à bakishi à mafi, dibàlakana dyà bukènkè bulelèlè.

Ke cidi dyabùlu wènza leelù ewu, ùdi ùleeja bantu màyi à bakishi, Nsangilu wa Maèkèleeziyà, musumbà wà màngumba, wikala mwà kujandudiibwa ne ng'wà mafi. Bwalu, mbwalu kùdi Bukènkè bulelèlè munkaci mwà kukenka. Bu ne Bukènkè bulelèlè abu kabùwà bukenka to, màyi à bakishi kaàvwa mwà kwikalaku nànsha. Bukènkè bulelèlè bùtu bùkenka. Nènkus aci's. . . Bàdi bendela mu dibàlakana dyà cikondo cikwbò, cintu cikwbò, bwalu mBusokoka, bàpìcilapù.

Mpindyewu, dibàlakana, màyi à bakishi aa s'ngàà mashimi. Cintu's ndibàlakana dyà dîbà.

¹¹⁶ Nènkus ki njila awu, bààkenza cintu cìmwècìmwè aci, dibàlakana dyà mafi dyà Bukènkè bulelèlè.

¹¹⁷ Mpindyewu, byàkajaadikiibwa ne Yèyè ùvwa Bukènkè bulelèlè. Yèyè ùvwa Bukènkè. Bwà cinyi bààkamanya ne Yèyè ùvwa Bukènkè? Mmunyi mùdiku mufwànyine kumanya ne Yèyè ùvwa Bukènkè? Bwalu Dìyi òvwa dilaya adi dyàkamwèneshiibwa mu Yèyè, nànkus Yèyè ùvwa Bukènkè bwà Dìyi dyakula adi. Amen! Kaa, aci's cìvwa cìfwànyine kungelesha, mèmè Baptiste wa cyena Mpenta ewu, mbilà's. Mònaayi, anji elàayi bi meeji ku bwalu abu!

¹¹⁸ Dibàlakana, nwamònu's, basòmbèle mu dibàlakana's! Kàdi pàdi Dìyi dìlèlèlè dikale ne mwoyi, ke Bukènkè abu's, cyàkamba Nzambi.

Mpindyewu, ambàayi tũng bu Nzambi mwambè, ku cibangidilu aku ne: "Bukènkè bwikalèku," huh, èè, kàdi

kumwenekakù cikwàbò cintu, nwamònu's, ànu màyi à bakìshi? Nwamònu's, kabìvwa bifwànyine kwikala, nànsha nàнку, cyàkambà Nzambì aci to. To, kabìvwa bifwànyine kwikala nàнку to. Kàdi bu Nzambì mwambe ne: “Bukènkè bwikaleku,” ne mabungi mapite bungi kulwawù? Nwamònu's, kacivwa mwà kwikala bukènkè nànsha. Kàdi, cyàkenza ne bukènkè bülwe, civwa n'Díyi Dyèndè dimwènèshìibwè.

Nènku leelù ewu, pàdi Nzambì mwambe ne bintu bu nàнку nebyènzeke mu cikondo eci, ne nudi nucimòna cyènzeka, ncinyi aci? M'Bukènkè pa Díyi dyà Nzambì. N'Díyi munkaci mwà kuvwijiibwa Bukènkè, diDimwènèsha.

119 Mpindyewu, bwòbò bàakamba ne: “Wèwè udi wamba ne twètù tudi banganyi? Mòna's,” yèyè ne: “Nudi nuteeta bwà. . . Tudi bamanyè ne Wèwè udi mupàle. Mòna's, Wèwè's udi mwena Sàmaalèyà; Kwèna ne meeji Èbè majaalàme to. Èè, neÙteetè bwà. . . Nganyi udi mwà kwamba. . . Tudi bamanyè ne Wèwè wàkalediibwa mu mpèkaatù. Katwèna bamanye kÙdì mufùmine to. Katwèna ne bujaadiki bwà dimanyishiibwa Dyèbè mu bisùmbù byètù to. Mòna's, Wèwè udi mupàle. Udi ne dyabùlù.” Nwamònu anyi? Bwòbò ne: “Mona's, Wèwè's kwèna ne meeji Èbè mu wòwò to.” Kàdi Yèyè ùvwa bushùwà Bukènkè bushùwashùwàle, bulelèlè bwà Nzambì, munkaci mwà kukenka.

Ne dibàlakana divwa dipangishe mèsù ààbò, bwà kumòna. “Tudi ne Mòsà bu mulombodi wetù!”

120 Yèyè ne: “Bu nwènù mwà kwikala biitàbùùje Mòsà, nùнку's nudi baMmanyè.”

121 Nènku bu nwènù mwà kwitabuuja Yesù ne Bible, nudi bafwànyine kumanya dìbà ditùdì ne mwoyi edi. Bàdi bàmba ne: “Èè, twètù's tudi beena Kilistò. Tudi. . .” Bu nwènù biikale nàнку, nuvwa bafwànyine kumanya byenzenedi byà Kilistò bwà ditùkù edi. Nwamònu's, nuvwa bafwànyine kubimanya.

122 Yesù wàkamba ne: “Bapròfetà bwònsò abu bààkaakula Bwànyì. Nènku bu nwènù mwà kwitabuuja bapròfetà abu, mòna's, nùнку's nudi baMmanyè. Byenzenedi Byànyì bìdi bileeja patòoke. Bwalu, cyàkambabo ne Mvwa mwà kwenza, kàdi's Mémè ewu ncyènzà. Nènku nganyi udi mwà kuMpiisha bwà bupidyà?”

123 Kàdi kabààkacimòna ànu kucimòna nànsha. Bwà cinyi? Mèsù àbò àvwa mafofomija, kùdì dibàlakana; nwamònu's, dibàlakana dyà cintu cikwàbò cyàkadibo bangàte bu ne ke civwà Díyi dilelèlè dyakula. Mpindyewu anji elààyibi meeji ku bwalu abu. Anji elààyibi meeji ku bwalu abu. Bàvwa bàmba mùvwàbò biitàbùùje Díyi adi. Kàdi bilèlè byàbò bìvwa bicyùngùlùle mpàlà yàbò ku Díyi dilelèlè, mitangija ku dibàlakana kampànda, ki bwà cinyi kabàvwa mwà kumòna cintu cilelèlè nànsha.

Ki mùdìbi kàbìdì leelù ewu. Ke mwàkadìbi mu cikondo ne cikondo cyònsò. Nwamònu's, Díyi di—dilelèlè didi dikenka,

kàdi bàkaadi batàmbe kwibidilangana ne bilèlè be, mu mùshindù wà ne, kabèèna mwà kumòna Dìyì adi nànsha. Mbatàngile ku dibàlakana, nènku bàdi mpofo. Dibàlakana nedikufòmijè. Kùdi kupàtuka cibèndà. Nedikufòmijè. Nènku, nedikufòmijè, pàdi. . .

¹²⁴ Yesù wàkamba ne: “Nwènu nudi mpofo, nulombola mpofo.” Bivwa bikèngela kwikalabò bakùmbàne bwà kucimòna, bwà kumòna ne Yèyè ùvwa Nganyi. Kàdi bwòbò kabàkakùmbana mwà kucimòna to, bwalu bàvwa ne mwoyi mu dibàlakana adi.

¹²⁵ Mpindyewu, dibàlakana, bu mungàmbi, mbukènkè bwà mafi, màyi à bakishi, mmwenenu wa mafi wa Bukènkè bulelèlè. Mmwenenu wa mafi; ncintu kampànda cidi—cidi ne cyà kufwànangana naaBù, kàdi kí m’Bwòbù abu nànsha.

¹²⁶ Mpindyewu mùshindù ùmwèpelè ùvwabo mwà kuleeja dishiilangana, mbwalu bintu mene byàkajaadikà Yesù ne Yèyè ùvwa Nganyi, ne Yèyè ùvwa Bukènkè. Bàvwa bèèla meeji ne bàvwa mu Bukènkè. Kàdi mpindyewu bu nwènu mwà kwimanyikakù katanci kakesè cyanààna ne kutàngila ne nganyi udi mu Bukènkè, dîbà adi.

¹²⁷ Mpindyewu, leelù ewu’s! Piikala cilèmà cyà cikùtākàne bu nànkù cyàkenjiibwa kùdi beena èkèleeziyà bàà ditùkù adi, cintu cyà cikùtākàne bu nànkù cyenza, bānà bèètù, kanwènaayiku nwela meeji ne dîbà ndikùmbàne dyà twètù kwimana ne kutàngila cidi Bukènkè ne ncinyi anyi? Katwènjiku cilèmà cyà cikùtākàne bu nànkù to. Kàdi’s nwnènu abu baditwe mu dicyènza. Nukaadi bamanè kucyènza, nwamònu’s, kàdi kanùyì bacimanyè nànsha, byà mwomùmwe ne mwàkenzàbo dîbà adi amu. Mpindyewu imànaayi kakesè cyanààna bwà kujandula cidi Dìyì dyamba bwà leelù ewu.

¹²⁸ Bu biikala biimàne ne badyambidileku ne: “S’ki Yèyè ewu munkaci mwà kuuja, ku dileeta, ànu menemene cyàkambà Dìyì ne Yèyè neènzè aci.”

Kàdi Yèyè kubèèla kadyòmbò, bu mûndi munkaci mwà kunwèlakù emu’s! Nwamònu anyi? Nwamònu anyi? Ndi nnwèla kadyòmbò bwà kutàngila mu Dìyì, kukenketa Mifundu, bwà kumòna piikalàbi ne eci kí ndîbà to. Nwamònu anyi? “Kenketaayi Mifundu, bwalu mu Yôyi amu nudi nwela meeji ne nudi ne Mwoyi wà Cyendèlèlè, kàdi Yôyi ayi s’ke Yidi yiMfidila bujaadiki.” Yôyi ayi s’ke Yidi yijaadika mudimu wa leelù ewu. Byenzedi nkàayabi bìdi bijaadika ne cidi munkaci mwà kwenjiibwa, ne Mifundu yidi yamba ne necyènzeke, nànkù abu’s ke Bukènkè bwà dîbà abu. Dìyì dyà Nzambi ndidi dyambe nànkù.

¹²⁹ Bilèlè byènu ne bikwàbò bìdi ànu menemene cyàkambà Bible aci, ànu bu aba bààkakùpà mitù yàbò ne kukwàta njila kuya abo. “Mèèsà wònsò mmalwè mùle tètè ne bilùshì,” mùdi Bible mwambè. Nènku’s ke mwaba wàkadibo awu. Kabàvwakù

mwà kuciitabuuja to. Bààkakùpà mitù yàbò. Nènku, bakwètù, nudi nuciingulula anyi? Nènku, bânà bèètù, nudi nujingulula eci, ne, panùdì nubenga cintu mene cìdì Nzambì munkaci mwà kushindika kumpàla kwènù, ne nudi munkaci mwà kwenza cintu cimwècimwè cyàkenzàbo, nwalukila ànu ku bilùshì byènù byà ciibidilu abi anyi?

¹³⁰ “Ànu mùtù mbwa wàlukila ku bilùshì byèndè amu.” Pìikalàbi bimusaamishe musangu wà kumpàla, s’nebimusaamishè musangu mwibìdì. Pìikalàbi ne èkèleeziyà wa Kàtòlikè, mwikale muvwijiibwe bulongolodi ne mwenze bulongolodi bwà kumpàla, wàkasamisha èkèleeziya; ki mwikalà ba-Luthériens, ba-Méthodistes, ne bakwàbò bwònsò abu, ba-Baptistes, ba-Presbytériens, ne beena Mpenta. “Mbwa wàlukila ku bilùshì byèndè, ne ngulube wàlukila ku bitoci byèndè.” Nwamònu anyi? Tudi tukafika ku cyòci aci mu tusunsa tukesè emu, bu Mukalenge mwà kwanyisha.

¹³¹ Dibàlakana, bèndela mu dibàlakana, nwamònu’s, mâyi à bakishi, mmwènenù wà mafi wa Bukènkè bulelèlà. Yèyè wàkajaadika ne Ûvwa Bukènkè abu.

Bwalu, Yèyè, mwikàle mu . . . mùshindù wà banyàabanyà, kaa, ekèlekèle, mìliyò yìMulwisha! Kakùvwaku cyàbisambòmbò cimwè cyà bantu, cyàmakumi citèemà cimwè cyà bantu, pa buloba, bàvwa bamanyè ne Yèyè ùvwa kaaba aka to. To, ndi ngèèla meeji ne, cyàlukàmà cimwè—cimwè cyà beena Yùdà, anyi bikolè menemene cyàmakumi ataanu cimwè cyàbò, anyi cyàmakumi anaayi cyàbò, nèngàmbe ne, pàmwàpa cishàadile ku aci, cyà ditungà Dyèndè Sungasunga, kacýakamanya ne Ûvwaku to. Kàdi aba bàvwa bulelèlà bamanyè ne Ûvwa mwaba awu, bààkaMumòna bu cintu kampànda cyà mafi, bwalu dingumba òvwa dibambile ne ke cìvwàYe. Nwamònu anyi?

Kàdi nànsha nànu Yèyè ùvwa Bukènkè bulelèlà bwàkadi bwakula kacya ku Genèsè, ku cibangidilu, ne kubàlòmba bwà kukenketabò Mifundu bwà kujandula ne ní kí n’Yèyè uvwa ne mwoyi mu cikondo aci; kujandula ne Yèyè, byenzi byàkenzaYe abi, ní kí mbyùje menemene cyàkalayàbo bwà cikondo aci. Amen. Kaa!

¹³² Ncintu kaayi cyà dísù dikolè aci’s, mwanètètù! Tudi ne mwoyi mu cikondo cyà mikùùkùkù.

¹³³ Yèyè wàkajaadika ne ngwa bushùwà. Yèyè ùvwa Bukènkè bwena diinà bwàkadibo bàlaka mukana bàmba ne mbuvwàbo bàkuukwila abu. Bàvwa bàlaka mukana bàmba mùvwàbo bàkuukwila Bukènkè abu.

Nènku’s ke mùdìbi kàbìdì leelù ewu. Bàdi bàmba mùdìbo bàkuukwila Cyòci aci. Beena Mpenta bàdi bàcyàmba. Bàdi bàmba mùdìbo bàkuukwila, kàdi pààbò batàmbe kufomijiibwa kabàyi mwà kucimòna to. Bwà cinyi? Mbadyènze bulongolodi, nènku, kàdi’s ndibàlakana mwìsù mwàbò.

Nwamònu anyi? Cilèlè ncintu cidi bàmwè bantu basòmba pàmwè, kàdi bàmba ne: “Netùye tükènzè *cikampànda* ne *cikampànda*, ne *cikansanga* ne *cikankènga*.” Mpindyewu netùfikè ku cidi cyènza ne aci cidi ne cyà kwenzeka, Mukalenge mwà kwanyisha.

¹³⁴ Mònaayi ne, byenzedi Byèndè bìvwa Dìyì didi ne mwoyi Dyôdi diinè. CyàkènzàYe cìvwa Dìyì didi ne mwoyi Dyôdi diinè, bìleeja ne Yèyè ùvwa Bukènkè bwàkalayiibwa kacya ku cibangidilu cyà buloba abu. Yèyè nguvwa Bukènkè abu. Bukènkè Bwèndè pa Dìyì dilaya dyà cikondo bùdi bùDìvwiya ne mwoyi ku cìvwa mulayi mwambe menemene ne ke cìvwaDi mwà kwenza, kàdi bàvwa baDikonyàngàje mu mùshindù wà kabàyiku mwà kuDimòna nànsha. Nwamònu anyi? Kàdi Yèyè ùvwa Bukènkè bwà cikondo aci.

¹³⁵ Yèyè ùvwa Bukènkè bìvwbabo bàmba ne bàdi bàkuukwila abu. Bàvwa bàdyèlèla meeji ne bàvwa bàkuukwila Nzambi mwinè wa bufùki awu. Bàvwa basòmbèlemù ne bàkuukwila dibàlakana, kàdi Yesù kwambayè ne: “Nudi nuNkuukwila mu cijèngù, nulongesha bilèlè byàbò byà bantu abi bu Dilongesha, kàdi kabìyi Dìyì to.” Yèyè ùdi Dìyì, ne Yèyè ùvwa Dìyì dimwènèshìibwe. Bìvwa bìkèngela kwikalabò bacimanyè.

¹³⁶ Ndi ntèkemena ne aci cidi mwà kubwela, mwaba wònsò ùdìbo bàcyùmva awu, nwamònu’s, ne n’Dìyì dimwènèshìibwe. “Kaa,” munùdi nwamba, “kaa, twètù’s tudi ne Dìyì.” Mòna’s, Dìyì, muntu yònsò udi muswè awu, s’udi wàmbula Bible wenda nendè. Kàdi, pàdi Dìyì dishindikìibwe, dimwènèshìibwe!

Mòna’s, udi wamba ne: “Èè, twètù’s tudi twitabuuja!”

¹³⁷ Èyowà’s, mukalenge, bòbò bààkiitabuuja, kacya ku cibangidilu aku. Nànsha Sàtaanà’s ùtu wìtabuuja. Bàfaalèsà abu, nganyi uvwa mwà kubàpiisha, ne kí mbiitabùùje? Kàdi kabàvwa biitabùùje Dìyì dyà dībà to. Bàvwa munkaci mwà kukuukwila dibàlakana dyà cintu cikwàbò.

Ncintu cimwècimwè aci cidìbo bènza leelù ewu. Nwamònu anyi? Bàdi bàlama bìvwa Luther mudyanjilè kwamb- . . . bilèlès, anyi—anyi bilèlè byà Wesley, ne bakwàbò abu, cilèlè cyà beena Mpenta. Kàdi bishi bwà cyà dībà edi?

Bàfaalèsà bàvwa balamè bilèlè byàbò. Kàdi paanyimà pàa bilèlè byàbò apu pàvwa Dìyì dilelèlè dyà Nzambi dilwa bwà kukenkesha, ne, pàakakenkesàDi, Dyàkafofomija mèsù àbò. Kabàvwa mwà kuCimòna to bwalu bàvwa bàtàngila cintu cikwàbò.

Ki mùdìbi leelù ewu’s! Nzambi ànyisheku bwà kucìbweja ne mu ndòndò, too ne mwàlengàci bulèlèlè bantu bìikala ne cyà kucìitabuuja abu. Dībà dikaadi diyè kupìta mùdi wèwè wela meeji amu.

138 Mwanàànyì wa balùme, Billy Paul, ùtu ùdyàkwila ku tulù, kàdi kàtu ùtàmba kulòòta bikolè to. Wàkalòòta cìmwè bufùku abu cyòcì kàdi kumunyukusha. Kwambayè ne wàkalòòta ne ùvwa ùsanganyibwa mu èkèleeziyà kampànda, ne—ne bwòbò. . . Ncìvwa mwanjì kubwelamu to.

Yèyè ne, pangàakabwelàmu, midilu yìvwa yìmpàtuka mu mèsù, ne mèmè kwamba ne: “Cikondo ncyòcì eci. Kwajiki.”

Ke bantu bwònsò kubanga kwela mbilà ne: “Ncyèna ne mùshindù to! Bânà bàànyì!”

139 Ne nànsha mukàjàànyì kwambayè ne: “Ncyèna mwà kufikisha Sarah bwà kusambilaye ku mèèsà to,” ne bikwàbò. Ki mèmè kwamba. . .

Yèyè ne: “Bikèngela nye kangata Loyce ne—ne mwànà wa mu dibòko awu.”

140 Mèmè ne: “Loyce kènà mwà kulwa mpindyewu to. Mwànà wa mu dibòko awu ùcidi mushààdile bikolè bwà kumanya. Billy, dîbà ndyòdì edi. Tudi ne cyà kuya.” Mèmè kwamba ne: “Tudi mundaankùlù mpindyewu. Kumpàla kwà kucyàbu, Yesù neikale kaaba aka. Byòbì kabìyì nànkù to, dîbà adi mèmè ndi ntèmu wa mashimi wa Kilstò.”

Ki muntu kampànda kwakulayè, wàmba ne: “Muntu nànsha umwe kí mmumanyè kasunsa anyì dîbà to.”

141 “Mèmè ncyèna mwambe kasunsa anyì dîbà to. Mèmè ne: ‘Pa dîbà kampànda pankacì pàa mpindyewu ne pàmbàbu kucyà.’” Ki mèmè kwamba ne: “Tùye—tùyaayi.” . . .? . . . Mèmè ne: “Kàdi tudi mu cikondo. Tùyaayi.”

Nènku twàkabwela mu kàshinyì, ne kwasa lwendu, ke twètù kubanga dibànda ne mukùnà. Ne patwàkabàndà, byàkamweka bu ne bukènkè bùvwa bùfùmina mu maulu, kàdi mîdimà pa buloba. Yèyè ne mèmè kudikòkela ku mpenga kwà njila, ne kwela byanza byànyì muulu mùshindù ewu, midilu kacya ànu mimònàngàne ne kumpàtuka mu mèsù. Ki yèyè ne mèmè kwamba ne: “Mukalenge, ndi mwenzè eci ku diyì Dyèbè ditùma. Ndi mwenze eci ànu bwalu Wèwè uvwa mungambile bwà kucyènza mùshindù ewu. Ndi mwenze bintu ebi bilondèshile cyùvwa Wèwè mungambile.”

Ki mèmè kufunkuna munu ku mukùnà munène wà dibwe ditòoke; nènku ke—ke Bukènkè, kakùyì byanza byà muntu to, kukòsabù Dibwe ku mukùnà awu, dyà bujitu bwà nkàmà yà binunu byà kilò, kàdi ke Dyòdì dilwalwà edi’s. Mèmè ne: “Kùdimunààyì mitù yènù; kanùtàngidi to. Nekwikale kumane kujika mu tusunsa tukesè emu.” Yèyè ne, dîbà adi ke cinyaànyà cinène cyà cijila kulwacì mwaba wònsò awu, pàvwa Dibwe edi dilwa ditàngile mwaba awu.

142 Bidi mwà kwikala dîbà diye bikolè kutàmba mutùdi twela meeji. Mwómò amu, nwamonu’s, aci’s ncyà mu Mifundu

menemene, nudi numòna's: "Dibwe, kakùyì byanza byà muntu to, ditùuka ku mukùnà."

Ne pa nàнку dìmwè dyà ku matùkù àdi panshì aa neciikalè mùshindù awu, panwikalà mwà kwela mbila mikolè bwà cintu kampànda. Mémè kubàmbila ne: "Nukààvwa bamanè kupeta cikondo aci. Nzambi mmunùdìmwije ku musangu ne ku musangu, ku cikondo ne ku cikondo. Eyowà." Mémè ne: "Nànsha byòbi mmwanàànyì sungasunga, anyì mwikàle nganyì, dībà ndyòdi edi. Ndi mwà kwamba ànu cìdiYe mungambìle bwà kwamba, ne neciikalèku," nènku cìvwaku.

Ne—ne pashishe, dyàkàmwè [Mwanèètù Branham ùdi ùtuutakaja byanza—Muf.], ki Yèyè ulwàlwa ewu ne: "Dibwe dilamùke ku mukùnà, kakùyì byanza byà muntu to." Danyèlè wàkamòna aci, nudi bamanyè's, kale wàwa kùkaadi bidimu byàbùngì. Billy kàvwa mumanyè kantu nànsha kàmwè pa bwalu abu to, kàdi cìvwa—cìvwa ncilòòtà cimutùmina kùdi Mukalenge.

¹⁴³ Mpindyewu, nwamònu's, bàdi bàlaka mukana bàmba mùdìbo bàkuukwila Nzambi mwinè uvwabò bàseka awu. Ne cintu cimwècimwè aci ncyenzèke cyàkàbidì leelù ewu, ku kabingilà kàmwèkàmwè aku, biikale ne mwoyi mu dibàlakana pamutù pàà Bukènkè. Makènkè Manène mmateeme. Èyo.

¹⁴⁴ Tàngilàayi mīdimà mutùdì tusanganyibwa leelù ewu's! Tàngilàayi cìdi munkacì mwà kwenzeka leelù ewu's! Tàngilàayi dishebeyangana, cinyangu cyenzela bakàji, makokyanganyi! Mòna's, mbyenzèke. Ndi ngèela meeji ùvwa m'Billy Graham wakamba, mu disangisha dyèndè dyà ndekeelu ne: "Mu bidimu dikumi kuumukila ku mpindyewu, mwena mwàbò yònsò wa mu Californie neikale wènda ne cingoma bwà kudikùba. Kwèna mwà kuteeka mpùlushi bùngì bukùumbane to." Bantu bàkaadi ànu batomboke; bàasangana ku bingoma, bàshebeyangana, ne bènzela bakàji binyangu, bikwàbò byònsò, nwamònu's. Bikaadi ànu bipaalàkàne, nwamònu's, mu mìsèèsù. Nwamònu's, ke—ke ditùkù ditùdì ne mwoyimù, ditùkù dyà cyena Sodomà. Nwamònu anyi?

Kàdi kùdi Bukènkè bùkenka! Bu bwòbò ànu mwà kutàngila, bu bwòbò ànu mwà kumòna, kutàngila mu Dìyì ne kumòna cìdi ne cyà kwikalaku mu dībà edi, nùнку's mbamanyè cìdi cìteeta kwenzeka.

¹⁴⁵ Mpindyewu, bàdi bàmba mùdìbo bàkuukwila Bukènkè abu, ki mwàkambàbo ne bàvwa bàkuukwila Bukènkè abu, kàdi bàvwa bàkuukwila mu dibàlakana dyà bukènkè bukwàbò pamutù pàà bwà cyà bushùwà. Nwamònu anyi? Yèyè ùvwa Bukènkè.

¹⁴⁶ Twìtabàayi ne bilèlè, mu ngiikàdìlù wabo wa bufofo awu, bìvwa bibàkomèshe nyimà ku Bukènkè bulelèlè bwà Dìyì dilaya. Dìyì divwà Nzambi mushindike, kùdi Yesù, Bukènkè bwà bàà pa buloba abu, bwàkalwa kuvwija Dìyì adi ne mwoyi

ànu menemene mu cikondo Cyèndè, menemene ne matùkù aa. “Yèyè neùmushiibwè munkacinkaci mwà mbingu makumi mwandamutekète, ncyà bushùwà, cìdì cyenza bidimu bisàtù ne citùpà byà cipròfetà Cyèndè. Maasiyà ùvwa mwà kulwa, Mfùmù awu, ne ùvwa mwà kwamba cipròfetà, ne matùkù àsàtù ne citùpà à cyòcì eci, pashiishe neùmushiibwè munkaci mwà bàamwoyi, ne kuvwijiibwa difuta dyà cibawu.” Nènku’s ki aci menemene. Wàkayiisha bidimu bisàtù ne citùpà. Ne wabò. . .

¹⁴⁷ Nènku Musambu mwine wàkamba Davidi ne: “Nzambi wanyi, Nzambi Wanyi, Wèwè wàNdekèdì bwà cinyi?” Musambu wà 22 ne: “Mifùbà Yànyì yònsò, nyèyì miNdèngàmèene. Bàdì bàkùpa mitù yàbò. Bàdì baMpita.” Bidimu nkàmà mwandamukùlù ne makumi àtaanu, kumpàlampala, pààkimba Davidi musambu awu mu Nyumà, ne wàkabadiibwa bu cipròfetà, ne kufidiibwa. Bàvwa bimba misambu ayi mu ntempèlu pàvwà Mulàmbù ùmwèumwè awu mulembeleja ku nkùrusè, ne byanza Byèndè, bitùbula. “Ne mbatùbule byanza Byànyì ne makàsà Àànyì.” Nwamònu anyi? Nwamònu mwaba awu anyi? Pashiishe, bwà cinyi? Bàvwa bèndela mu dibàlakana. Kabààkamòna Bukènkè nànsha.

¹⁴⁸ Nudikù mwà kudifwànyikijila muntu wetù wa lungenyi ne meeji ewu wènzà cintu bu nàнку anyi? Ànu mùndì nciyi mwà kudifwànyikijila muntu wetù wa lungenyi ne meeji uya lubilu mu nzùbu wa mwinshì mwà buloba ne ùbwela mu mutaleela, ne ùdikangila biibi, wàmba ne: “Mèmè ndi mbenga bwà kumòna ne kùdì bukènkè.” Aci’s ndipaala.

Nènku lwèndè luseke lwà nyumà nduselèmwèke, mwaba kampànda, pàdì muntu wetù ewu ùmòna ne Bible mmulayè eci, ne ùcimòna ne mwoyi ànu kumpàla kwèndè ne cimwènèshiibwe, kàdì pashiishe ùtùngunuka ne kushààla mu twitabàayi ayi ne bikwàbò kuntwaku bìdì bìBùbènga abi. Aci’s mbuntòmbòjì bwà mu nyumà. Aci’s ncyà bushùwà menemene.

¹⁴⁹ Ki Yèyè ewu mpindyewu. “Yèyè wàkadi—Yèyè wàkadi Bukènkè bwà bàà pa buloba, ne bàà pa buloba bàvwa bamanyè. . . Wàkalwa kùdì Bèndè Mene; Bèndè Mene kabààkaMumanya nànsha. Wàkalwa pa buloba, ne buloba bwàkenjiibwa kùdìYe, kàdì bàà pa buloba kabààkaMumanya to.” Nwamònu anyi? “Kàdì aba bwònsò bààkaMumanya abu, Wàkabàpèesha bukolè bwà kulwabo bânà bàà Nzambi, kùdì aba bààkaMwitabuja.”

¹⁵⁰ Vùlukàayi ne, katwèna mwà kwikala ne mwoyi ku bukènkè bwà makèèlèlè to. Bukènkè bwà makèèlèlè mbumanè kuya. Kabùcyènakù kàbìdì to. Bòbù, bukènkè bwà makèèlèlè, cìdì ànu civùlukilu. Nsèsè yà dìbà yà makèèlèlè ayi yìdì ànu civùlukilu, anyi, mbwalu-bulonda. Katwèna mwà kwikala ne mwoyi mu bukènkè bwà makèèlèlè, kàbìdì to. Ne ùmwèdìmwè adi, nànsha mùdìbi ne ndìbà ùmwèdìmwè adi, dìbà ùmwèdìmwè adi, kàdì

ditùkù dyònsò dìdì dipàtula dikàndà dyàdi adi bikolè ndambù, bwà kubobesha lutete bwà dinowa. Nwamònu anyi?

¹⁵¹ Dìbà dilwalwa leelù ewu, dyènda dikola ndambù. Ditùkù dyònsò mpindyewu nediikale dyènda dikola ndambù, dikola ndambù, too ne mùdì ndekeelu wa byònsò blé, udi mwadija mwaba awu, neà—neàbange kupeta mwoyi. Paanyimà pàà cikondo kampànda, m—mwoyi newùpàtuke, pashiishe ùkola ndambù, ùkola ndambù. Ngondo wa lwabanya, wa cisanga, lùmungùlù, kabàlànshipù, kashipunkènzà, dìbà adi ùdi mu dinowa, nudi numòna's. Dìbà òm̀wèdìm̀wè dìdì munkaci mwà dikenka leelù ewu edi, mu—mu ngondo wa cyongo anyi wa ciswà-munène, dìdì muulu mwàmwa munkaci mwa dituuta nêjè ne òm̀wengulwila pa lutete alu edi, dilùtwàdila màyi; ndìbà òm̀wèdìm̀wè adi, kàdi blé awu kàvwa mwà kushààla ne mwoyi mu nsèsè yim̀wèyim̀wè yà dìbà ayi mu ngondo wa kabàlànshipù to. Nwamònu's, kèna mwà kucyenza to. Nwamònu's, dìbà dìdì dyènda dikola ndambù ku ditùkù dyònsò, nènku lutete nelwikalè ne cyà kwenda kuboba ndambù bwà kwakidila nsèsè yà dìbà ayi.

¹⁵² Ki lutatu lùdiku leelù ewu ndwòlò alu. Lutete lwàkakùnyiibwa mu baataatù bàà ku cibangidilu, kale wàwa mu—mu Luther ne Wesley ne bakwàbò abu, lwàkashawuka; kalwèna mwà kwangata Mwànà to, Mwànà ùdi ùlùshipa. Lwàkabenga bwà kukola. Nwamònu anyi? Lwàkadikòsa, lwàkadyumusha ku cikolakola, mùshindù awu, ne kulwa lwà *apa* ne kudyenzalù cintu cikesè cyàlù lwòlù. Kulwaci cizubu, dìbà adi, nènku kalùyì Mwoyi munda to. Lutete nelwikale ne cyà kwenda kukola ne lwènda lùtàmba kukola, ànu mùdì Mwànà wènda ùkola ditùkù dyònsò.

¹⁵³ Mpindyewu twànjààyi kutàngila katanci kakesè. Netùtangilè bikondo byà èkèleeziyà. Kùdi bikondo mwandamutekètè byà èkèleeziyà. Nènku ànu mùdì bikondo byà èkèleeziyà abi, cyònsò ne cyònsò, tàngilààyi mùshindù wàkabambilaYe cìvwa cìfwànyine kwenza, mùvwa lutete lufwànyine kukola ne kupweka too ne ku dìbà dyà ndekeelu edi, dìbà dyà ndekeelu mutùdì ne mwoyi emu. Pa nàнку èkèleeziyà yìdi ne cyà kwenza cintu cìmwècìmwè aci, nwamònu's, èkèleeziyà ayi.

¹⁵⁴ Mpindyewu tàngilààyi, Luther wàkakùna lutete, ne Luther ùvwa lutete ne kulùkùnayè. Èyo. Ke mwàkadi Wesley; ne, kàbidì, ke mwàkadi Mpenta; ke mwàkadi ba-Baptistes, ne ba-Nazaréens. Kàdi, nudi numòna's, mpindyewu Luther kàvwa mwà kwalukila ne kwikala ne mwoyi mu bukènge bwà òngumba dyà kumpàla to, Kàtòlikè. To, mukalenge; yèyè ùvwa bukènkè bukàbò. Aci cìvwa n'Nzambi ùbobesha cintu kampànda. Mpindyewu banyààbanyà mbapàtùke mu cyòci aci, ditàbuluja dyà ba-Luthériens adi.

¹⁵⁵ Pashiishe kulwakù ditàbuluja dyà Wesley, ne pashiishe, mu

dyòdì adi, mòna's, kabàvwa mwà kwalukila ne kwenza bu ba-Luthériens to. Nwamònu anyi?

Ne pashiishe kulwakù beena Mpenta. Ne pashiishe beena Mpenta kudyenza bulongolodi ne kwenzabo cintu cimwècimwè aci, kwangata cizubu. Mònaayi.

¹⁵⁶ Kàdi lutete lùdi lùtùngunuka. Mpindyewu tudi mu cikondo cikwàbò. Bwà cinyi kabèèna baswè kuCyàkidila? Bwà cinyi kabèèna baswè kumòna ne lutete lukaadi lubobè? Ki Dîyi dilaya bwà ditùkù edi *ndyòdì edi*. Bwà cinyi kabèèna bàDimòna? Bwalu bàdi ne mwoyi mu dibàlakana dyà Luther, dibàlakana dyà Wesley, dibàlakana dyà ba-Batistes, dibàlakana dyà beena Mpenta. Bàdi ne mwoyi mu dibàlakana dyà bukènkè bukwbò. Ki bwà cinyi kabèèna mwà kwakidila Bukènkè bwà Dîyi mu kaabujimà dishìndikiibwe bu mùdì Nzambi mulayè to. Bìtampì Mwandamutekète abi, mùvwa bwalu busokoka mu kaabujimà bubuulùdibwe amu, bìvwa mwà kwalukila ne kwamba bwà cinyi maalu masokoka aa àkenjiibwa mùshindù awu; ne, nànsha nànkù, pàdì aci cifika, bàdi baya kule naaCi kutàmba ne kwònsò eku. Kabèèna ne pàà kulingila nànsha.

¹⁵⁷ Nzambi mmucyènzè ku Nyumà, ku bwàkabuulwibwà. Yèyè ùdi—Yèyè ùdi mucijaadikile ànu menemene, ku maalu à mamanya ne bikwàbò byònsò, bwà ne ke Bulelèlè, bwà ne ke Bulelèlè abu. Kàdi bàcìdi ànu baswè kutùngunuka ne kwikala ne mwoyi mu dibàlakana dyà Mpenta ne: “Mémè ndi mwena Assemblées! Mémè ndi Unitaire! Mémè ndi Èkèleeziyà wa Nzambi! Ndi *cikampànda*!” Nwamònu's, biikale ne mwoyi mu dibàlakana dyà mu cikondo cyà kukaadi bidimu makumi ànaayi, makumi àtaanu. Biikale ne mwoyi mu dibàlakana dyà Luther. Biikale ne mwoyi mu dyà Wesley, ba-Baptiste, dyà ba-Presbytériens, anyi dìmwè dyà ba-Nazaréens, dibàlakana dyà cikondo cikwàbò cyà èkèleeziyà cikaadi cimanè kupita ne benze cintu cimwècimwè aci, kàdi bàpidya ne babenga Bukènkè pààbù Bwikale munkaci mwà kukenka bulelèlè.

¹⁵⁸ Nènku nudi ne mwoyi mu màyi à bakishi. Ndi ngàmbe aci ne kaneemu kwònsò, nwamònu's, kàdi nudi. . .ki mbwà kunùtapa ku mwoyi nànsha, kàdi bwà kunùtābuluja. Nudi ne mwoyi mu màyi à bakishi.

Ambàayi tūng, bu Yesù mwambe ne “Mòna's, nudi mpofo, ne nudi munkaci mwà kulombola mpofo”? Kabàvwa mwà. . . Wàkateeta bwà kubàmbila; kàdi kabàakacyènza to. Yèyè ne: “Balekèlaayi kwà tàlālāà. Mpofo yèyè ùlombola mpofo, bwònsò nèbàkapòne mu mùkidi.” Ke dîbà dingààfiki's! Bòbò bakatètùke, mémè ncyènà ne cyà dyenza to. Ndi mwenze cyònsò cìndi mwà kwenza. Ndi mwenze menemene.

Ndi mwenze cyòcì eci ku dîyi Dyèbè dituma, Mukalenge. Wèwè udi ntèmu.

Kacya ku cidimu cyà 1933, lwà ku musulù kwàka, pàkakenka Bukènkè bunùdi numòna ebu, kuntwaku, Bùvwa ànu mwab'ewu mu tabernacle ne bunùjaadikile, bidimu byònsò ebi. Ne bintu byònsò byàkambaBù abi mbyenzèke. Nènku mbatungùnùke ànu ne kuya batàngile kumpàla. "Lekèlè mpofo àlombole mpofo nendè." Nèngiindile ànu dîbà adi; Yêyè neàlwe, dimwè dyà ku matùkù adi panshi aa.

¹⁵⁹ Mònaayi, biikale ne mwoyi mu dibàlakana dyà Luther, biikale ne mwoyi mu dibàlakana dyà Wesley, biikale ne mwoyi mu mabàlakana à kale awu, ki bwà cinyi kabèena mwà kumòna Bukènkè bulelèlè nànsha. Bu bôbô mwà kwimanaku bwà tusunsa tukesè, ne kubàkula ànu Bible ne kuMubala, mbafwànyine kumòna ne . . . eci ke Bukènkè bulaya bwà dîbà edi.

¹⁶⁰ Mpindyewu netwàngatè bimwè byà ku bintu ebi mu katanci kakesè emu. Yêyè wàkalaya, bilondèshile Maalàki 4 ne, bintu ebi nebyenzeke. Wàkalaya, munda mwà Mifundu yònsò ne, nebyenzeke. Nwamònu anyi?

¹⁶¹ Mònaayi Izalèlèlè kàbidì, cifwànyikijilu cyètù, mu lwendu. Tàngilàayi, munkaci mwà kudyà manà, àvwa miikale Bukènkè Mwoyi wàbo, ùvwa ùbàpèèsha dikàndà, Mwoyi. Mmwòmò anyi? Izalèlèlè kàvwa mwà kudyà manà àvwa mabàmacile makèlèlèlè nànsha. Àkaavwa matàpile twìshì. Àkaavwa mabole. Kaàcivwa mimpè bwàbò nànsha. Bàvwa bafwànyine kufwà, bwà bwalu bwàwù. Manà àvwa mabàlame ne mwoyi makèlèlèlè àvwa mafwànyine kubàshipa leelù ewu. Bible mmwambe ne àvwa ne twìshì munda mwàwù amu, matàpile twìshì. Nènku manà awu, bivwa bikèngela bàpetè manà mapyamàpyà ditùkù dyònsò. Amen.

Ne ncinyi aci? Bantu bàdi ne mwoyi ku manà à Luther abu, Wesley, ne bakwàbò bàà kale abu, nudi munkaci mwà kudyà cintàkanyì citàpile twìshì cidi munkaci mwà kunushipa, mu nyumà. Cidi munkaci mwà kunùshipa, bafwè mu bilèlè byènù.

¹⁶² Manà à makèlèlèlè awu, à Luther, kaàvwa mwà kwambulwisha ba-Méthodistes to. Manà à ba-Méthodistes kaàvwa mwà kwambulwisha beena Mpenta to. Manà à cyena Mpenta kaàkukùmbanakù bwà leelù ewu to. Nudi numòna cindi njinga kwamba aci anyi? Ditùkù dyònsò àvwa àlwa, ku ditùkù ne ku ditùkù, nènku ke mùdìbi mu bikondo byònsò.

Manà à Luther àvwa mukenji wa dibingishiibwa. Mukenji wà Wesley wùvwa dimwèneshiibwa dyà dijidiibwa. Wà Mpenta ùvwa dyalujulula dyà mapà. Kàdi eci cidi cileeja Dibwe dyà mùsongà, ditùkù dyà ndekeelu, Muci Mukàji-musèla, ùdi mushiilàngàne ne cyònsò aci, kàdi nànsha nàncu Cidi ànu Bukènkè bùmwebùmwe abu bwà cikàadi cibobe aci.

Ànu mùdi dîbà dimwèdimwè, didi dikenkesha leelù ewu edi, nediikale dimònàngàne ne kubobesha lutete bwà dinowa mu ngondo wa kashipunkènzà. Nudi numòna cindi nswa kwamba

anyi? Kàdi bukènkè bwà leelù ewu kabwàkwambulwisha mu ngondo wa kashipunkènzà mwàmwa to. Mbutambe kukola. Blé ùkaadi mu cipidi cibàndile be; ùdi mudilongolole bwà kubùtwàla. Amen. Mmwômò menemene. Kèna mwà kubùtwàla mpindyewu nànsha; ùdi mwà kubùtwàla dîbà adi. Muvù kawùvwa mu wôwò nànsha, dîbà adi; mpindyewu ùdi mu wôwò.

163 Kwèna mwà kwenda bibèngangana ne bufùki bwà Nzambi to. Yèyè ùdi ne mukenji, ne, kubèngangana ne mukenji awu, kùdi kushipa cikùnyìibwà cyèbè aci. Bìkèngela ùye bilondèshile mikenji myakula yà Nzambi, ne mikenji Yèndè n'Diyi Dyèndè. Mikenji yònsò yidi diyi dyakula. Ne diyi didi meeji damwènèshìibwe. Nwamònu anyi? Mpindyewu tudi—tudi bamanyè ne aci ncilelèlà.

164 Cìkèènà-kumòna ncinyi? Diyì dyà Nzambi, anyi cintu kampànda cidyànjlila kwamba, anyi didyànjlila kuleeja dyà bwalu kampànda. Ne cìkèèènà-kumòna cyàkadì naaci baprófetà, cyàkadì naaci Yesù, cyàkadì naaci Pòlò, ne bwònsò abu, ne cyàkula bwà ditùkù edi aci, ciwva didyànjlila kuleeja dyà ciwà mwà kwenzeka. Ne mwab'ewu tudi tumòna didyànjlila kuleeja dimwènèshìibwe, kàdi bantu kabàyi mene bacìjìngulula nànsha. Nudi numòna cìndi njinga kwamba aci anyi? Mpindyewu, manà à makèlèlèlà awu. . .

165 Tàngilàayi kunweku, nukààvwaku bamòne anyi? Dîbà, d-î-b-à, ndyènze lwendu, kuumukila ku Esètè ditàngile ku Wesètè, ànu mùtùdi diya cikondo cyònsò. Nuvwaku bacimòne anyi? Kàdi, mònaayi ne, bikondo byà èkèleeziyà byàkenza cintu cimwècimwè aci. Ncinyi aci? Dîbà, m-w. . . d-î-b-à, dyàkabangila mu Esètè. Nènku dishidimuka dyàkenza lwendu pàmwè ne dîbà, bukènkè bwakula bwà Nzambi bwà bôbò kwendelamù. Bààkalwilamù, bènda bàlonda dîbà, kumòna kuvwàdi diya.

166 Mwoyi wôwò mwine, paùdi ulediibwa, udi bu dîbà. Udi wasa lwendu, mutùngùnùke too ne ku dibwela dyà dîbà, kuumukila ku dilediibwa dyèbè mutàngile ku dibwela dyà dîbà.

167 Muntu misangu yònsò, ùtu wenza lwendu mutàngile ànu ku wesètè. Dishidimuka dyà kale ne kalèlè ditùdi naadi's n'Chine, mu matungà à ku esètè. Yelusàlemà. . . Nènku, mònaayi ne, didi ditùngunuka ànu ne lwendu ditàngile ku wesètè pàyaayàdi apu, nènku pàyaayàdi ditùngùnùke apu, nditàngile ku Wesètè.

168 Ke mùdi cikondo cyà èkèleeziyà cyenze lwendu mùshindù ùmwèùmwè awu, kùdi M-w-â-n-à wa Nzambi. Tàngilàayi, Pòlò, èkèleeziyà wa ku cibangidilu awu, wàkabangila mu Esètè; wàkuumukila kuntwaku, kutumpika kusabuka m—m—mbù, kukabwela mu Allemagne. Mmwenze nkòkelu yìsàtù. Tàngilàayi kunweku. Kuumukila mu Asie, kupweka mu—mu Palestine, wàkatumpika kusabuka mbù munène kufika ku Allemagne; awu's ùvwa Luther. Nènku kutumpika kuumukila

ku Luther, kusabuka Mùkìdì wa cyena Anglais, kukabwela mu Angleterre kùdì Wesley. Nènku kuumukila ku Wesley, kutumpikaye mutàngile ku Côte Ouest, ku États-Unis. Nènku eci, wêwê mutungunûke ne kuya kule bikolè, ùdì wàlukila kàbidì ku Esètè. Eci's cikaadi cikondo cyà ibaaumulòlò.

¹⁶⁹ Tàngilàayi mwàkalwangana bikondo byà èkèleeziyà. Luther... Pòlò, dyàmbedi, mu cikondo cyà mbangilu eci; pashìshe kupweka ku Irlande, kùdì Irénée, ne bikwàbò; kutunguka too ne mu France; mwómò amu, kuya mu Allemagne; kukabwela mu Angleterre; mutungunuke ne kuya ku Wesètè.

Nènku mpindyewu katwèna mwà kuya kule menemene to. Eci ke cikondo cyà ndekeelu. Ne ncinyi cidi Bible wamba bwà cikondo cyà ndekeelu eci? Nwamònu's, bilondeshile maalu à buloba, balondolodi bàà myanda, ne nànsha mene mûshindù wònsò ùdì muswè kucyàngata awu. Bilondeshile Mifundu, dyàmbedi; Mifundu, mu bushùwà bwà bwalu, dyàmbedi. Ku cileeji, bilondeshile maalu malonda, mûshindù kanà wònsò ùdì muswè kucyàngata awu, tudi ku nshìkidilu, cikondo cyà ndekeelu cyà èkèleeziyà.

¹⁷⁰ Nènku, tàngilàayi, pàdici ciya citàngile kumpàla cidi cyènda cikola bikolè menemene. Nènku ke mùdì banyàabanyà balelèlè, bakesè bàà Èkèleeziyà bàkola kuumukila ku dibingishiibwa, dijidiibwa, dibàtiiza dyà Nyumà Mwîmpè, ne mpindyewu ne ku dilwa dyà Dibwe dyà mûsôngà, wènda ùdipunga. Kakwàkwikalaka kàbidì malongolodi paanyimà pàà cyôci eci to. Kaàkwikalaku kàbidì to. Nwamònu's, kaèna mwà kwikalaku to, nwamònu's, tudi mu Wesètè.

¹⁷¹ Ànu bwà kunùleejila, ku mîshindù yònsò ne bikwàbò byònsò. Ne kutàngila ku bidya bisàtù abi, nkòkelu yisàtù. Netùbwelè mu cyôci aci dilòlò edi, nwamònu's, nwamònu's, mûshindù wutùdì ku cikondo cyà nshìkidilu. Cidi ànu . . .

¹⁷² D-î-b-à adi dyàkenza lwendu bu M-w-â-n-à; M-w-â-n-à bu d-î-b-à. Èkèleeziyà mmulwè mûshindù ùmwèumwè awu, kuumukila ku Bikondo Mwandamutekètè byà Èkèleeziyà, ne bikwàbò. Dishidimuka ndyenze lwendu buludi ne ku Wesètè, ne Èkèleeziyà mmwenge lwendu buludi ne ku Wesètè. Nènku mpindyewu twètù batungunûke ne kuya kule ndambù kupita citùdì mpindyewu eci, tudi twalukila ku Esètè cyàkàbidì. Paùdì uumuka ku Côte Ouest, udi walukila buludi mu Chine, Japon, walukilamù buludi cyàkàbidì. Mumana kupita kilòmeètà binunu dikumi ne cimwè ne nkàmà yìbidì, udi walukila buludi ku Esètè cyàkàbidì. Pa nànkù, Esètè ne Wesètè mbitwilàngàne, kwàjiki. Tukaadi ku ndekeelu. Kakwèna cintu nànsha cimwè cishààle to.

¹⁷³ Nènku cintu cimwècimwè aci ncyenzèke, leelù ewu, cyàkenzeka kale wàwa. Cintu cimwècimwè cidi cituutakeena naaci ku Wesètè aci ncyàkatuutakeenabo naaci ku Esètè. Bantu bàdi basòmbèle mu dibàlakana dyà bukénkè bukwàbò bùvwà

kakùyì mpatà to bùteeta kuleeja patòòke ne Bukênkè bùvwa ne cyà kulwa, kàdi kuBùbènga, bwalu bàdi ne dibàlakana pamutù pàà Bukênkè. Kaa! “Ne kùvwa Bukênkè bunène mu buloba bwà bàà Bisàmbà byà bendè; Zabùlòònà, Nephtale; wa mu Ngaalèlà, . . . mu Ngaalèlà, wa buloba bwà Bisàmbà byà bendè.”

¹⁷⁴ Eci's ke cikondo cyà mwandamutekète cyà èkèleeziyà. Vùlukàayi ne, cikondo cyònsò cidi dîbà adi ditwàdija kukenkesha mu Esètè, ndîbà òmwèdimwè didi dikenkesha mu Wesètè. Ne Nyumà umweumwe uvwa munda mwà bikondo byònsò awu, mùshindù awu, m'Mwànà umweumwe awu leelù ewu. Ànu, ncinyi aci's? Ànu bu mùdi diboba, muvu awu. Dîbà didiku mpindyewu edi, nedîkale dîbà òmwèdimwè didi dibobesha lutete mu muvù wà bintu bipòòpoka, muvù wà mabèji àpòòpoka, nwamònu's. Kàdi ncinyi aci? Ndîbà edi, kusàkidila cyònsò ciikalaku aci. Nènku leelù ewu, mu cikondo cyà ndekeelu eci, ncivwàbo, kusàkidila Eci.

Ne kàbidì mbaswè kwikala ne mwoyi bu kale wàwa, bu njeeku, bàpweka mu nzùbu wa mwinshì wa kale, wa mutaleela ntwangeen- . . . wa kale wa ku dînà ne twitabàayi, ne bàpwekesha ridò yàbò, bàmba ne: “Ndi ànu mbènga kuCimòna. Byònsò's ndukutukutu.” Piine apu Bible mwinè, udibo bàmba ne mbiitàbùùje awu, munkaci mwà kumanyishiibwa kùdi Nyumà Mwîmpè umweumwe awu munkaci mwà kutwàla Bukênkè mu matùkù à ndekeelu!

¹⁷⁵ Nukààvwakù bamòne anyi? Ne tàngilàayi ne ntèmà yònsò mu Maalàkì, mwàkakòsololàye aci ne: “Dii tabuuja dyà baataatù kùdi bàna, ne bàna kùdi baataatù.” Nwamònu's, Nyumà umweumwe mwaba wàkajuukaYe kwàka, ne mwaba ùdiYe ùjuuka apa kàbidì, cintu cimwècimwè. Nwamònu's, ànu mùmwèmmwè emu ne emu, menemene, basòmbe ànu paanyimà kàbidì. Bwalu, bwà cinyi? Esètè ne Wesètè mbitwilàngane. Ànu menemene mwísù mwètù, kàdi nànsha nànkù kabàyi bacimòna to. Bwà cinyi? Kabyèna bikèmesha to pàkambà Yesù ne: “Bàlekèlaayi ànu nànkù, dîbà adi. Bàdi bafobo, balombola mpofo, bwònsò bwàbò nebàponè mu mùkidi.”

¹⁷⁶ Makênkè à bikondo bikwàbò àvwa ànu àleeja Bukênkè ebu. Nwamònu anyi? Dîbà leelù ndileeja ànu, didi dibàlakana dyà dîbà diikalaku mu ngondo wa kashipunkènza ewu anyi cimungwa mashika, bu Nzambì. . . bwà dinowa. Ne Mwànà, wa Luther, Martin Luther, ne Wesley, ne Sankey, Finney, Knox, Calvin, bakwàbò bwònsò abu, bantu banène abu muntwamu bàvwà ne makênkè awu abu; ne John Smith wa èkèleeziyà wa ba-Baptistes, ne Alexandre Campbell, èkèleeziyà wa ba-Campbellites, ne Bayiidi bàà Kilistò bàà ku dînà abu, Èkèleeziyà wa cyena Kilistò, ne mènà makwàbò àdibo naawu awu. Bantu bwònsò bàà kale abu, mu bikondo byàbò, bàvwà ànu bàleeja civwà ne cyà kwikalaku ku ndekeelu eku.

177 Ne pashiishe mwab'ewu, bânà, dyàkàmwè paanyimà pàà baashi abu, cidibo bènza ncinyi? Kabààkashààla ku cikolakola to. BààkuumukaKù ne kudyènza kaacizubu kakesè kuntweku. Bwalu, udi uya kule ne mushimi mulelèlè wà Mwoyi, kwèna ne Mwoyi to. Paùdi umusha cizubu ku cintu aci, ne ucikùnà mwab'ewu mu buloba, necishaale mwaba awu ne kubolaci. Nènku ke munùdi's, nuteeta kudyà manà mabolè à mu matùkù à kale awu.

Dinowa dyäbobi's! Yesù ùdi ne mèèsà maadija, kùdi bansantu bàà Nzambi bàdiishiibwa ku Cyàkudyà cibobè cyà ditùkù, ku Bukènkè bwà Èvànjeeliyò bùdi bùshindika ne bùjaadika ne Yèyè ùdi kaaba aka leelù ewu. Amen. Bansantu bàdyadya Dyàmpanà.

178 Anji elàayibi meeji's. Cizubu cyà kale cyà makèèlèlè aci, nwamònu's, kucikùnyi kuntwaku to. Ncibolè. Kacyèna mwà, kacyèna mwà kushààla naaci to. To, mukalenge. Kacyàkukwàcishakù to. Kacyàkukola nànsha. Kacyèna ne Mwoyi to; pààbì Diyì ke Mwoyi awu. Ncyà bushùwà. Cizubu cidi cìpona, mwevu wà kale awu umata, ne bintu bu nànkù. Cidi ànu cìdivwija dingumba ne cìpòna. Cidi cipidya kutùngunuka too ne ku Mwoyi.

Kàdi Bukènkè bùdi bùWùshindika. Kaa, ekèlekèlè! Èyowà's, mukalenge.

179 Makèèlèlè awu, kaa, ekèlekèlè, mùshindù mwinè wùvwàbi bikèngela bwà twètù kumòna aci's wè! Nwamònu's, bwà ne, bintu bibolè byà makèèlèlè abi, kanùbidiku leelù ewu to. Nwamònu anyi? Bìdi ne misàndà munda. S'nudi bamanye tuumisàndà tukesè etu mùntù mèmè ntùbiikila anyi? Ncyèna mumanyè to. Ncyèna—ncyèna mumanyè byàbùngì pa bìdi bitàngila mwoyi wà misàndà to, kàdi ndi mumanyè ne twètù bwònsò tutu tutùbiikila ne tuubiinyà. Bitu bibwela mu cintu kanà cyònsò eci pàdici cibola ndambù. Nwamònu anyi? Ncyèna muciswe dìbà adi to. Wèwè musànkishiibwe naaci, tùngunukà, kàdi kí mmèmè to. Kàdi vùlukàayi . . .

Wèwè udi wamba ne: "Dìbà adi cìvwa cìmpè makèèlèlè bwà cinyi?"

180 Bu wèwè mumanyè ànu ne cizubu mene cikesè cyàkadi pa blé ku mbangilu aci, cyòci cishààle pa lutete, ke cyàkolesha lutete alu. Aci's ke cintu mene cidi cifikisha blé ku dyela bilòngò, ke cyàkadiku makèèlèlè; kàdi cyòci ciditàpùlùle ne lutete, kàdi kaciyi cibobe to, dìbà adi cidi cijìmina. Nwamònu anyi? Kàdi cyòci cipicile mu njila, njila mufidi wa mwoyi, pàdici cìfwa cidi cibwelakanangana mu cintu cikwàbò ne cyenza lutete. Byòbi kabiyi nànkù to, cidi cìfùmina penyi? Amen. Nudi nucyùmwa anyi?

181 Byenze bu Mukalenge mukàjì wa mu Angleterre, musangu kampànda, wàkaya ku cyàpù cinène cidi cyènza mabèji, nènku

kwambaye ne ùvwa muswè bwà kumòna byamu byenji byà mabèji abi. Ki kumuleejabò byamu byenji byà mabèji kukaadi bidimu byàbùngì, bangabanga ne kuditwabo mu dyenza dyà musàbù ne bintàkanyi, ki kusanganabo . . . benzalakù mabèji. Ki bwòbò . . . Èè, paanyimà pàà katanci, kubwelaye mu cibambalu cìvwà kaciyi ne cìngà cintu to ànu mushiki munène wà kale wà bikùsukusu byà manyaanù, ki yèyè ne: “Ebi mbifumine penyì? Ncinyi ciinè eci? Kaa,” mwàkambàye.

Mu—mu—mulombodi wa cyapu kwamba ne: “Eci ki—ki citwènzà naaci mabèji, bikùsukusu byà manyaanu ebi.”

Yèyè ne: “Aci, cyènzà mabèji?”

“Èyowà.” Pa nàнку bívwa bikole bwa kucìtabuuja.

¹⁸² Ki paanyimà pàà yèyè mumanè kuya, mulùmyànà kwangata mushiki ùmwèùmwe wà mbondya yà manyaanu ayi, kàdi kuyibwinka mu njila wa dishintuluka kampànda, ne kuyipatula mabèji makezùke, matòòke, nudi bamanyè's, ùvwa muàbweje mu njila kampànda ne muàvwije bulelèlà . . . Kàdi kutèekapu mpàla wendè, ne kumutùminadi, ne yèyè mwine muleejibwe mu cìvwàye mubiikile ne “mbikùsukusu byà manyaanu abi.”

¹⁸³ Mpindyewu ki cìdi bwalu ncyòci aci. Bintu bifwè byà makèèlèlà abi, mukenji wà Luther, mukenji wà Wesley, mukenji wà Mpenta, byòbi ànu mwà kupicila mu njila wa dishintuluka wa Nyumà Mwimpè wa Nzambi ne Dìyi dyà dishindikiiwba, nedipàtule cimfwànyi cyà Yesù Kilistò, Mfùmù awu. Amen. Kàdi wèwè mucishiye cilekelela mwaba awu, cidi ànu bikùsukusu byà manyaanu. Nwamònu anyi?

¹⁸⁴ Cidi ne cyà kwikala cifwimba mu cintu cikwàbò. Byàkakèngela bwà Luther kufwimbiibwa mu Wesley, byàkakèngela bwà Wesley kufwimbiibwa mu Mpenta, ne kukèngelàbi bwà Mpenta kufwimbiibwayè mu Kilistò. Bìdi bipicila mu njila kampànda. Ke mùdi Èvànjeeliyò mupicile mu njila awu. Ùdi munkaci mwà kupicila mu njila awu. Cikondo cyà Luther cyà dibingishiibwa, tudi twitabuuja aci; cyà Wesley, cyà dijidiibwa, tudi twitabuuja aci; cyà Mpenta, cyà dyalujulula dyà mapà, bwà Nyumà Mwimpè, tudi twitabuuja aci, cyà bushùwà. Kàdi, bifwimbile byònsò pàmwè, neupàtulé cinyi? Yesù, cyà bushùwà, umwèùmwe awu makèèlèlà, leelù, too ne kashidi. Kaa! Necipàtule Yesù.

¹⁸⁵ Dìbà didi muntu ùfwimba ngonga mu mubanza, ùdi ne cyona kampànda cidìye ne cyà kwelamù. Pàdiye munkaci mwà kwenza difwimbà dyèndè ne kwelamù cyamu cifike, ùdi wèlamù cyamu cyà mitakù bùngì kampànda, bùngì kampànda bwà argent, bùngì bukùmbànè bwà kabanda. Bwà cinyi? Yèyè mmumanyè ànu menemene bùngì bùdi bukùmbàne mwà kutèekamù, bwà kwenza, kumupèesha cyona cijaalàme.

Ne ki cidi Yesù mwenzèle ku Mukàj'Èndè-musèla ncyòci aci. Byàkakèngela bwà Yèyè kutèekamù bùngì kampànda

bwà Luther, búngì kampànda bwà ba-Méthodiste, ne búngì kampànda bwà ba-Presbytériens, búngì kampànda bwà Mpenta. Kàdì cìdìYe ùpàtula ncinyì? Cimfwànyì Cyèndè Sungasunga.

Ncinyì aci? Ànu bu Mukenji wà cipaapu cyà musàkà, nudi numòna's, cìdì cyàngata mbungakeenu, eci, cishààla cinyàacinyà, pàmwè ne Dibwe dyà Musàkà. Mudimu wà bwambi wà Yesù Kilstò, pa buloba, bikèngela wikalè ùmwèùmwe awu bu mudimu wà bwambi wùvwàYe naawu awu, cyanààna Yèye kèna mwà kulwakù to. Ànu bu mutù, too ne ku makàsà. Mutù. . . Makàsà kì mmutù to, kàdì mutù ngùdì mwambùlè makàsà, anyì ngùdì wènga ne makàsà, wùàmbila kwà kuya. Nudi nucyùmvwà anyì? Bilenga byà menemene, ki Bukènkè bwà dîbà.

¹⁸⁶ Wesley ùvwa Bukènkè bunène. MwàkambilàYe Yone Mubàtiji ne: “Yèye ùvwa Bukènkè bunène bwà dîbà dyèndè.” Bushùwà's, ke cìvwàye.

¹⁸⁷ To. Èyowà's, mukalenge, bikùsukusu bikezùke. . . Anyì, bikùsukusu byà manyaanu byà makèèlèlè, nwènu bashààle mùshindù awu, cìdì ne. . . neciikale ànu mwà kushààla bikùsukusu byà manyaanu dîbà dyònsò. Cìvwa cikùmjàje kiipàcila kààci, bu cilàmbà, kàdì mpindyewu ncishààle dibèji.

Dibingishiibwa dyàkawkwàta mudimu mu cyàdì cikondo, mu dibingishiibwa mu cikondo cyà Luther, pashiishe cìvwa ne cyà kulwa dijidiibwa ku Wesley. Ne dijidiibwa dyàkawkwàta mudimu mu cyàdì cikondo, too ne mwàkalwàci dibàtiiza dyà Nyumà Mwìmpè. Ne dibàtiiza dyà Nyumà Mwìmpè dyàkawkwàta mudimu mu cyàdì cikondo; too ne mùdì Nyumà Mwìmpè (bwalu, kùdì Nzambi ànu umwèpelè) ùbwelakana mu Èkèleeziyà, ne Èkèleeziyà mu Kilstò, ne cìdì cyènga ne Yesù Kilstò àleejiibwa pa buloba, cìdìYe mulayè kaaba aka mu Bible. Nudi bafwànyìne kubènga kucìtabuuja; ncyèna mwà kunwenzeja bwà kucìtabuuja to. Ndi mwambule ànu bujitu bwà Dìyì. Nwamònu anyì? Neyà bushùwà.

¹⁸⁸ Pa nàнку nudi nucimòna anyì? Nudi numòna aci anyì? Nwènu bacyènze, neciikale cìfwànàngàne ne—ne muntu wàkaya musangu kampànda ku. . . mu cikondo, kuyaye ku ditùnga dyà Galles, mu cikondo cyà ditàbuluja dyà Galles adi. Musùmbà wa bantu bàakuumukà ku États-Unis. Ki kupwekabo kwòkù, ne kwambabo ne bàvwa bàswè bwà kujandula ne mmu nzùbu kaayi mùvwàbo bènzela ditàbuluja dyà Galles adi. Bààbúngì bàà kunùdì mbavùlùke ditàbuluja dyà Galles, ditàbuluja dinène dyàkabwayika munkaci mwà—mwà bantu bàà mu ditunga dyà Galles. Nàнку bantu aba, bambi banène menemene aba, ne bikwàbò, kuumukilabo ku États-Unis, bwòbò's mbaa docteurs mu bunzambì. Bàvwa bàswè kuya kuntwaku kamòna cintu cinène cìvwàbo benzè aci, nudi bamanyè's.

Nàнку bàvwà bènda bàpweka ne mùsèèsù, ne kwambabo. . . kutuutakeenabo ne kaampùlushi kakesè kàà kale kiimàne mu

disangu dyà njila, wèla mwònzò ùkùpa mfimbù wenda mu cyanza, nudi bamanye's, ne wimbila muyenga mu mwònzò, mùshindù awu. Kwambabo ne: “Èè, ùdi munkaci mwà kwimbila muyengà mu mwònzò. Tudi bafwànyine kuseemenaku, bwà kumumòna, kumòna ciikalàye mwà kwenza. Mòna's, kumwela lukonko.”

Ki kuyabo kùdiye, ne kwamba ne: “Mukalenge, ditàbuluja dyà Galles didi kwepi?”

¹⁸⁹ Kunanayè cifulu cyèndè; kwambayè ne: “Bakalenge, ditàbuluja dyà Galles didi dyènzekela munda *emu*,” mu mwoyi wèndè. Kaa, ki bwalu abu's, yèyè ùvwa ditàbuluja dyà Galles.

Éyi Nzambi, bu twètù ànu mwà—ànu kuumvwa ne tudi dileejiibwa dyà mu cimfwànyì dyà Yesù Kilistò, Dìyi Dyèndè dimwènèshìibwe. Wèwè udi cimfwànyì cyà Dìyi Dyèndè. Nwamònu anyi?

“Ditàbuluja dyà Galles didi dyènzekela penyì? Mu nzùbu kaayi mùdidi disanganyiibwa?”

Yèyè ne: “Mukalenge, didi mu mwoyi wànyì.” Yèyè ùvwa ditàbuluja dyà Galles. Ncyà bushùwà.

¹⁹⁰ Nènku leelù ewu bìvwa bikèngela bwà Èkèleeziyà kwikalaye Yesù Kilistò mu cyenzedi pa buloba. “Bwalu mèmè ndi ne mwoyi, nwènù nudi ne mwoyi; ne Mwoyi Wànyì newikalè munda mwènù. Byenzedi bìndi Mèmè ngenza, nenùbyènzè pèenù.” Nwamònu anyi? Bìvwa bikèngela bwà Èkèleeziyà, pèndè, kufikaye mwaba awu. Ne wàkalaya ne ùvwa mwà kucyènza, ne neàcyenze. Bikèngela àlwe mùshindù awu. Pa nàнку, nudi numòna's, ki cidì cyènzekà ncyòci aci. Twètù, bikèngela twikalè mùshindù awu.

Yèyè ùdi Bukènkè.

¹⁹¹ Ke mùvwà Noà Bukènkè mu ditùkù dyèndè. Yèyè ùvwa Bukènkè. Noà ùvwa Bukènkè abu. Yèyè ùvwa Bukènkè bwà cinyi? Bwà kwenza Dìyi dyà Nzambi ne: “Nèmbùtulè muntu ùNdi mufùke, pa buloba. Ibaka bwàtù, ne yònsò wàjinga kubwelamu awu neàsungidiibwè.”

Noà kupàtukaye mwaba awu, kwamba ne: “Kùdi mùshindù ànu ùmwèpelè, mbwàtù.”

¹⁹² Bàakamba ne: “Mukoleshi wa maalu mubùlùke wa kale.” Yèyè ùvwa Dìyi dimwènèshìibwe. Noà ùvwa Bukènkè bwà díbà adì, ke cìvwàye bushùwà. Ditùkù dyèndè, cikondo cyèndè, yèyè wàkapatula Bukènkè.

¹⁹³ Mòsà ùvwa Bukènkè bwà díbà dyèndè. “Ncyà bushùwà ne Nènnùmwènèkèlè,” mwàkambilà Nzambi Abraham. “Nèmpwèkè, ne Nèmpàtule cisàmbà Cyànyì, ku cyanza cikolè, ne Nèndèjè bukòlè Bwànyì mu Èjiipitù.”

Nènku pààkatuutakeena Mòsà kuulu kwaka ne cipuka cìlàkuka kapyà, ne kujandula ne NDI awu ùvwa mu cipuka

aci, Mòsà wàkapweka kuntwaku, ne yéyè ùvwa Bukênkè. Amen. Kabyèna bikemesha pàvwaye mwà kwangata ndambù wa lupwishi, ne kulwèla muulu ne kwamba ne: “Nkùpà yilwe pa buloba.” Yéyè ùvwa ne Dìyì dyà Nzambì. Cyàkenzeka ncinyì? Lupwishi kubanga kjuuuka, ne nkùpà kubanga kumweneka. Àlèluuyàh! Bwà cinyì? Yéyè ùvwa dimwèneshiibwa dyà Bukênkè bwà Dìyì dyà Nzambì ne: “Mémè nényooke Èjiipitù ne bipùpu.” Yéyè ùvwa mupròfetà. Cìvwaye mwambè kwenzekaci. Ùvwa Bukênkè bwà ditùkù adi. Ùvwa Bukênkè bwà Nzambì.

¹⁹⁴ Pàlò ùvwa mufwànyine kwikala ne cintu cyònsò cìvwaye muswè kwikala naaci, ne bakwàbò abo, bakwidi bòwnsò bàvwa ne cìvwbò baswè, kàdi Mòsà ùvwa Bukênkè. Bwà cinyì? Ùvwa ùleeja patòòke Dìyì dyà Nzambì, dimwèneshiibwe. Nzambì ùvwa mulayè ne: “Nèmbàpàtule, ku cianza cìkolè, ne NènDyàngàcile butùmbi.” Ke cìvwaYe munkaci mwà kwenza.

Ki bwà cinyì Mòsà wàkajaadika ne ùvwa mwà kufùka. Kì ne mbwalu ùvwa muswè kufùka to; bwalu Nzambì ngwàkamwambila. “Nènku ne cyòci aci: ‘Nda mu disangisha, wàmbè ne: “Mààlabà...” Mukalenge Nzambì mmufume ku dyaklangana naanyi ne: ‘Ambulà dyanza ntèntè dyà lupwishi udikùpe muulu mu maulu, mùshindù ewu, ne ùyibiikile.’ Kakwènakù nkùpà nànsha umwe mwab’ewu to, kàdi neyikalèku.” Amen!

Kaa, ndi ntèkemena ne kanwèna balààle tulù to. Kaa! Dimwèneshiibwa’s!

¹⁹⁵ Kwambaye ne: “Ndi mutùmiibwe. Nzambì wàkambila bulelèlè baataatù bèètù, bushùwà Yéyè ùvwa mufwànyine kutùkumbula mwab’ewu ne kutùpàtula. Ndi mulwè bwà kunùjaadikila ne dìbà dikaadi pabwìpi. Tàpulukààyi ne binùdi naabi abi. Tùyaayi!” Èyowà.

¹⁹⁶ Bàmwè bàà kùdibo bàakamba ne: “Èè, ngèèla meeji...” Daatànà kwambayè ne: “Ncyèna ngèèla meeji ne kùdi dilwijakaja nànsha dimwè to. Kabivwa bikèngela twètù kwikala bwònsò basalùke pa bwalu ebu to.” Nènku kumwènèkabì bu ne ncipangile, misangu yinaayi anyi yitaanu. Kàdi, ànu mùshindù ùmwèùmwe awu, cyàkatùngunuka.

¹⁹⁷ Mwàkadyàmbidilabo. Kupàtukabo e kwamba ne: “Netwàsè Mòsà ewu mabwe’s! Tumwipate munkaci mwètù! Katwèna bamuswè mu musùmbà wètù—wètù ewu to.”

Mòsà wàkatùngunuka ànu ne kuya, nànsha bishi, bwalu yéyè ùvwa Mwoyi, ùvwa Bukênkè bwà dìbà adi. Cìvwaye naaci, cìvwa ncinyì? Nzambì munkaci mwà kumwèneshila Dìyì Dyèndè dilaya ku Mòsà, nènku Mòsà ùvwa Bukênkè.

¹⁹⁸ Eliyà ùvwa Bukênkè. “Pàtuka kwaka ùkasòmbe pa kakùnà kàka! Ndi mutùmine bikòlòlò dìyì bwà kukudiisha.” Amen! Èyowà’s, mukalenge.

199 Kwalukilayè ne EMU MMÙDÌ MUKALENGE WÀMBA. “Nànsha mene lumuma kalwàkumata mu Dyulu to too ne pangààlùbìikilà.” Amen! “Dìbà ndifwànyine kukenkesha, nudi bafwànyine kubiikila mavuba wònsò, ne kwenza cyònsò cinùdì baswè kwenza aci, kàdì nànsha mene lumuma kalwàkulwaku to too ne pangààlùbìikilà.” Ùvwa cinyi? Bukènkè! Àlèluuyàh! Yèyè ùvwa Bukènkè. Bukènkè! Yèyè ùvwa Dìyì dyà Nzambi dimwènèshìibwe.

200 Kwelabo meeji ne ùvwa mupàle, pàvwàye musòmbe kuulu aku apu. Ùvwa ne bambudi munkaci mwà kumudiùsha; eku bwòbò munkaci mwà kufwà ne nzala. Bàakaswa kusòmbela mu bilèlè byàbò; tūngunukàayi. Kí mMòsà to, anyi kì ng’Eliyà to, yèyè ùvwa ne mwoyi ànu mu Bukènkè abu. Musòmbèle kuntwaku ku mpenga kwà kasùlù, kàà Keelità, ànu munkaci mwà kucyònkomoka; mwikale ne byàkudyà, ne muntu kampànda bwà kumucyùka, ne bikwàbò byònsò. Bàvwa bèèla meeji ne ùvwa mupàle, kàdì ùvwa—ùvwa Bukènkè.

201 Kwambabo ne: “Hé, munsantu mubùnguluki wa mu malaba wa kale utùvwa nendè kaaba aka awu ukaadi mulwe cinyi? Èè, nudi bamanyè mùdì bwalu anyi? Muntu kampànda ùvwa munkaci mwà kulemba nyama ditùkù adi, nènku mbambe ne mbamòmone musòmbe kuulu kwaka mùshindù awu, luseke kampànda lwà ku lusongo lwà mukùnà kwàka. Ndi ndya lupiku ngamba ne mukùlumpè wa cikisu awu, dìbà edi ukaadi muuminyine, patùdì twakula apa.” Kaa, to. Yèyè nguvwa Bukènkè. Ùvwa Bukènkè. Ùvwa Bukènkè bwà Nzambi, mu ditùkù dyèndè.

202 Yone, pàakalwàye pa buloba, ne kuyaye mu cipèèlà bwà kulongeshiibwa kùdì Nzambi, kì nku sèminèrè to. Yèyè nguvwa ne cyà kuleeja Maasiyà ku bantu. Nànku pàakapàtukaye, Yesù wàkamba ne: “Yèyè ùvwa Bukènkè bwà bùkenka ne bwèla nsèsè.” Àlèluuyàh! Bwà cinyi? Yèyè ùvwa Dìyì dimwènèshìibwe.

Yeshàayi ngwàkamba nànu. Ki cyòci aci. Ncyà bushùwà. “Ùvwa mwà kutùma dìyì mu cipèèlà, dyèla lubilà, dyàmba ne: ‘Longòlolaayi njila wa Mukalenge, ne nujaalamijè ciibi Cyèndè, nululamijè njila.’ Ùvwa mwà kwela lubilà, umwe. . . dìyì dyà ewu udi wela lubilà mu cipèèlà.” Ki yèyè ewu pwàà. Cìvwàye ncinyi’s? “Dìyì dyà ewu udi wela lubilà mu cipèèlà.”

Ùvwa cinyi? Dimwèneshiibwa dyà Dìyì, Bukènkè. Nzambi umweumwe wakaakula mu Genèsè awu; wakaakula eci, ne ki Bukènkè ebu kulwa. Bu mwàkambàYe ne: “Bukènkè bwikalèku,” bwà dìbà, dìbà kwikaladiku, ki kwambàYe ne kùvwa mwà kwikala dìyì dyà ewu uvwa wela lubilà mu cipèèlà, ki dyòdi edi pwàà. Dìvwa Bukènkè bwà dìbà adi.

203 Wàkamba kàbidì, mu matùkù à ndekeelu! Amen! Cintu’s m’Bukènkè bwà dìbà adi, bwèla lubilà mu cipèèlà cyà Baabùlòonà ne: “Patukàayi munda mwèndè, cisàmbà Cyànyì,

bwà kanùlù baabanyanganyi bàà mpèkaatù yèndè. Kanùlengi cintu cyèndè cyonèke aci nànsha! Tàpulukaàyi naaci! Nyemàayi ciji cicolè cìcilwalwà!”

204 Yone wàkamba cintu cimwècimwè aci. “Cisuuyi ncitèèkiibwe ku muji wà mucì.” Kàvwa mulonge tulaasà nànsha, kàvwa nànsha wàkula bu muiyishi to. Ùvwa wàkula bwà nyòka, ne bitùpà byà micì, ne micì, ne bisuuyi, ne bikwàbò, byàkadìye mwibidilàngane naabi, mu cipèèlà amu. Kàvwa mukoleshila mu bimwè byà ku bintàkanyi byà tutanku, binène, bilenga bidìbo naabi leelù ewu ebi, byà bwena byàkadibo naabi mu ditùkù adi to. Wàkapàtuka ne wèndè ngàakwilù wa nkàayèndè. Kààkajuuka kwamba ne: “Ah-man,” bwà kwenza diinama dyònsò dyà bukàlànga adi to. Wàkapàtuka, ùpàtukila mu cipèèlà, mupape ne mukàyàbàle. Wamba ne: “Kanùbangi kudyàmbidila ne: ‘Mémè ndi wa mu *cikampànda* ne ndi wa mu *cikansanga* to.’ Nzambi ùdi ne bukolè bwà kujuudila Abraham bàna ku mabwe aa.”

205 Kanùdyambidiku ne bwalu nudi ba-Méthodistes, ba-Baptistes, ba-Presbytériens, nànkù nudi bakwatekù Nzambi nànsha. Nzambi mmukùmbàne mwà kwangata bapàanyishi bàà cicyampa ne bandumba kubàpàtula mu mùsèèsù, kubàvwija bàna bàà Nzambi. Muntu kampànda neàCitèèlèjè, ne muntu kampànda neàCiitàbùujè.

206 Yèyè kwamba kàbidì ne: “Cisuuyi ncitèèkiibwe ku muji wa mucì. Ne mucì wònsò ùdi kawùyì wìtabuuja, ùdi ùshimbudiibwa ne wèdiibwa mu kapyà.” Nànkù aci ki civwa mukenji wèndè. Yèyè ùvwa Bukènkè bwà ditùkù adi.

207 Yesù wàkamba ne: “Yèyè ùvwa Bukènkè bùdi bukenka ne bwela nsèsè, ne bwà katanci kakesè nwènù nwàkajinga kwendelamù.”

208 Kàdi Yone wàkamba cinyi, mupròfetà awu? “Yèyè mmwimane munkaci mwènù mpindyewu mene. Ncyèna mukùmbànyine bwà kusùlulula nshinga yà bisàbaatà Byèndè to. Nènku pàdìYè ànu ùmata mu cyalu, mémè ndi njimina.” Kaa, ekèlekèle! Bwalu, Yèyè ùvwa Bukènkè.

Kakwèna Makènkè àbidì anyì àsàtù to, kakwèna malongolodi ànaayi anyì àtaanu mashiilàngane to. Kùvwa Bukènkè bùmwèpelè. Kakwènakù ba-Méthodistes, ba-Baptistes, ba-Luthériens, ba-Presbytériens nànsha. Kilistò ki Bukènkè, ne Bukènkè’s m’Mwoyi. Ne Dìyì dimwènèshìibwe m’Bukènkè bwà dībà adi.

209 “Bukènkè bwìkalèku, ne bukènkè bwàkiikalakù.” Èyowà’s, mukalenge. “Bukènkè bwìkalèku,” nènku ki Bukènkè abu pwàà! Yèyè wàkaakula ne nekwìkalè Bukènkè mu ditùkù edi, nènku’s ke Bukènkè ebu. Yèyè ùlwalwa. Mémè ndi ncìitabuuja. Tàngilàayi milayi yà cikondo eci. Kaa, ekèlekèle!

210 Bukènkè bwònsò bùkaatùku buteemè abu, bikondo byà èkèleeziyà ebi, tudi tumòna mùdibi . . . Cìvwa—cìvwa ncintu cyà cyènza luse be bwà kumòna, kubènga. Bwàkabuulwibwà 3, ndi mufunde kaaba aka, Bwàkabuulwibwà 3, ne ndi mumanyè cìmvwà—cìmvwà ngèèla meeji dìbà adi.

211 Tàngilàayi mulyi wa dìbà edi, ditùdì ne mwoyi edi; Bukènkè bubèngiibwe. Bààkenza cinyi? BààkaBùbènga kuntwaku. Bwà cinyi? Bàvwa ne mwoyi mu dibàlakana. Ncinyi cidìbo benza leelù ewu? Cintu cìmwècìmwè.

212 Èè, wèwè—wèwè udi mwena Kilistò anyi? “Mémè ndi Luthérien. Mémè ndi Baptiste. Mémè ndi Presbytérien.”

Aci kaciyèna ne cidìci cyumvwija nànsha. Ncìfwanyine ànu kwamba ne wèwè uvwa “ngulube, ngulub’a kayombo,” anyi ní ncinyi cikwàbò cyònsò cyùdi muswè kudìbiikila aci. Nwamònu anyi? Aci, aci’s ncyamba kumvwija cidìci. Mpindyewu ncìyi—ncìyi mpanga kaneemu kunùdì nànsha, kàdi nwènù mwà kucyàngacila citùpà cyàci cyà nshìndameenu, s’ncyà bushùwà.

Mémè kwela lukonko ne: “Mwena Kilistò anyi?” Awu n’Kilistò munda mwèbè. Nènku pìikalàbi ne Kilistò ùdi munda mwèbè, dìbà adi Dìyi dìdi munda mwèbè. Nènku dìbà adi Dìyi dyòdì munda mwèbè, pàdi Bukènkè bwèla nsèse, mmunyi muwàpanga kwendelaMù? Nwamònu’s, ki lukonko ndwòlò alu. Ki cidìmu mpindyewu aci, Bukènkè abu. Bukènkè bwà dilòòlò bùdi bùkenka. Mucì-Mukàjì-musèla ùdi munkaci mwà kwela bilòngò.

213 Kaa, vùlukàayi ne, bààkasònza Mucì wà kale awu. “Nènku cyàkashiyà mukùmbì wà yelèkè, mukùmbì wà ngazàmà wàkacidyà; ne cyàkashiyà mukùmbì wà ngazàmà, mukùmbì wà hazilà wàkacidyà.” Cyàkashiyà ba-Méthodistes, ba-Baptistes kucidyàbo; cyàkashiyà ba-Baptistes, beena Mpenta kucidyàbò. Yèye ne: “Mucì ewu ùvwa,” Yowèlè kwàka, “wàkakòshiiibwa kushààla cikuuku,” kàdi ùvwa muswè kumanya ní ùvwa mwà kwikala cyàkàbìdì ne mwoyi. Kaa, èyowà’s! Wàkalaminyina Mucì awu. Wàkalaminyina Mucì awu, èyowà’s, mukalenge, bwalu ùvwa m’Mukàjì’Èndè-musèla.

Ki kwambaYè ne: “Nèngààlujululè,’ mùdì Mukalenge wàmba.” Ncinyi aci? “Mémè nèngùpàtùlè, cyònsò cyàkadyà ba-Luthériens aci, ne cyàkadyà beena Wesley aci, ne bwònsò abu. Kàdi Mémè nèncyalùjùlùle, bwalu cidìci cyònsò mu miji yà Mucì awu.” Nwamònu anyi?

Cidi mu buloba mwàmwa. Ànu mùdì màyi à mucì àkaya mwìnshì mwà buloba awu, bu mungàakamba bwà mwanèètu wa bakàjì awu, àdi muntwamu. Nènku mpungi wa Nzambì nèadilè, dīngà ditùkù, ne ba-Luthériens basungula abu, ba-Méthodistes, ba-Baptistes, bàvwa kabàyi bakabwelàkàne ne bulongolodi nànsha bùmwe abu . . .

214 Luther kààkavwijaku cintu nànsha cimwè bulongolodi to. Moody kààkavwijaku cintu nànsha cimwè bulongolodi to. Cìvwa mmusùmbà wa ba-Rickys awu, bààkalwà paanyimà pèndè, ki bwôbò bààkenza bulongolodi, kwangata cizubu. John Smith Kààkavwijakù cintu nànsha cimwè bulongolodi to. Nànsha wa kùdìbo kààkavwija cintu nànsha cimwè bulongolodi to; cìvwa m'Bukênkè bwà dìbà adi. Luther, Wesley, anyi kî n'nànsha umwe wa kùdìbo to; cìvwa mmusùmbà wàkashààla kulonda awu, wàkalwa awu, ke wàkenza bulongolodi.

215 Nyumà Mwîmpè kàtukù mwanjì kuvwija cintu nànsha cimwè bulongolodi mu Mpenta to. Mpenta ndilabula, kî ndingumba to. Kacya Kàtukù muvwije cintu nànsha cimwè bulongolodi to. Kaa, to. Kàdi muntu udi wamba mùdiye mpenta awu, ke wakacìvwija bulongolodi. Aci's ncizubu kuntwaku, munkaci mwà kupùnga ne lufù. Pamutù pàà kucituuta kucyàndamuna dibeji, ne kwenza ne cimfwànyì cijimà cyà Yesù Kilistò cìpàtuke; to, kudikòkelabo pambèlù, bwà kabìikadi naaCi bwalu to. Bàlekèlaayi ànu kwàbò kwà tàlàlà.

216 Kàdi tudi tusangana mpindyewu ne, Bukênkè ebu, Muci ewu, Kilistò, mmubèngìbwe cyàkàbìdì kùdì èkèleeziyà. Bwà cinyi? Bwà bwalu bùmwebùmwe bwàkenzàbo dyàmbedi abu, mabàlakana à kale à makênkè à matùkù makwàbò. Ne “Yèyè ùdì umweumwe awu makèèlèlè, leelù, too ne kashidi.” Ebèlù 13:8 ùdì wamba ne ke cìdìYè. Yèyè udi umweumwe awu leelù ewu ànu mwàkadiYe musangu awu amu, bwalu Yèyè ùdì wènza cintu cimwècimwè cyàkenzàYe aci. Dìyì òm̀wèdìm̀wè adi, ne Kilistò . . .

217 Tèèlejàayi, ndi muswè ànu kunwangata mpindyewu, ne eci ncintàngìle mémè. Ncyènà mumanyè to, ndi ndambù. . . -ngèèlakana bwà ne kujima mpindyewu anyi to, nwamònu's, bwà mukàbà wà mèyì awu. Nèngùlekelè ànu mwaba awu. Nwamònu anyi?

218 Ndi muswè nnùkonkèku cintu kampànda. Tàngilàayi, tàngilàayi eci. Nwamònu's: “Yèyè udi umwèumwè awu makèèlèlè, too ne kashidi.” Tàngilàayi. Byenedi Byèndè, byàkenzàYe abi, bidìmwènèshe. Mpindyewu tèèlejàayi ne ntèmà. PààkiimanàYe mwaba awu, mu Yone 14:12, Wàkamba ne: “Byenedi bîndì Mémè ngènza nenùbyènzè pèènù. Nenwènzè binène bipite ebi, bwalu Ndi nya ku Taatù Wanyì.” Mpindyewu, Yèyè ngudi mucyàmbè. “Maulu ne buloba nebìjimine, kàdi Dìyì adi kacìyàkupangilaku to.” Mpindyewu patwìkala ku ndekeelu wa ndekeelu wa cikondo, mpenyi pààlwà “byenedi bitàmbe bunène” abi? Nwamònu anyi? Nyewù tukàadi apa. Katwèna ne. . .

219 Tèèlejàayi, piikalà kabala-matùkù kàà cyena Loomò aku kajaalàme, tudi ne -ne bisambòmbò. . . ncutùshàadile bidimu makumi àsàtu ne bisambòmbò. Bidimu binunu bibìdì byònsò,

buloba bùtu bùfika ku ndekeelu wabò. Bidimu binunu bibìdì byà kumpàla, kubùtudiibwabù ku màyi; bidimu binunu bibìdì, Kìlistò kulwa. Eci necidimu cyà 1964 cìlwalwà eci; bidimu makùmi àsàtù ne bisambòmbò. Mpindyewu, kabala-matùkù kàà balongi bàà mabùlungù bàà cyena Èjiipitù kàdì kàmba ne tukàadi bapicishe bidimu dikumi ne mwandamutekète ne: “kùdì bidimu dikumi ne mwandamutekète bimane kupicila apu,” cìdì cìfwànyine kushìya mpungà wa bidimu dikumi ne citèemà.

Yesù wàkamba ne: “Mudimu newipidijiiwbè, bwà bwalu bwà Basungula, cyanàànà kakwàkwikala musunya nànsha ùmwè wàsungidiibwa to.” Tudi penyi?

²²⁰ “Byenzi bìnì Mémè ngèza nenùbyènzè pèènù. Byà mùshindù ùmwèùmwe awu, kàdì, nenwènzè binène bitàmbe.” Tàngilàayi mpindyewu. Tèèlejàayi ne ntèmà. Lwàtaayi cyènù. . . Ndi nsambila bwà Nzambi wàkàngulakù mwoyi wènù ne meeji ènù, bwà kuumvwa, bwà nwàmònakù mwà kuumvwa kakùyì kwamba ne mbitàmbe kukola apa to. Mònaayi. Wàkamba dīngà ditùkù. . .

Twánjibi kumòna bimwè byà ku byenzi “binène” byàkenzàYe. Twánjàayi ànu kwimanabi bwà bimwè bintu. Twèlàayibi meeji’s.

Musangu kampànda, Yèyè wàkamba ne: “Nwènù bàpèèshaayi cintu kampànda cyà kudyàbo.”

Kwambabò ne: “Katwèna ne cintu nànsha cìmwè to.”

Yèyè ne: “Cinùdì naaci ncinyi? Ntwàdilaayi cinùdì naaci aci.”

Kàdì bóbò kwamba ne: “Tudi ne tulungu tùtaanu twà mampà à orge ne mishipa yìbìdì.”

Yèyè ne: “BìNtwàdilaayi.”

²²¹ Nènku kwangataYe tulungu twà ku cifùkilu twà mampà à orge kubanga kucibulula tulungu atu. Nènku, ànu ku twà ku cifùkilu atu, kwenzaYè mampà. Àkadiisha binunu bitaanu. Mmwômò anyi? Pashiishe kwambaYè, ne kwangataYè mushipa ne: “Mpèèshaayi mushipa awu.” Cìvwa mushipa, ànu kwònsò eku. Nènku kukòsaYè, mushipa awu, mukwàbò mushipa ne mukwàbò mushipa, ne kudiisha binunu bitaanu. Mmwômò anyi?

Kàdì mu matùkù à ndekeelu Yèyè kàvwa ne cintu nànsha cìmwè to. Wàkaakula ànu cyanàànà, ne kwamba ne: “Amba neciikalèku,” nènku ki cyòci aci, kakùyì cintumù to. Yèyè kàvwa ne nshindì to; kakùvwakù nànsha umwe to. Wàkamba ànu ne: “Ìkale pàpa,” ne ki yèyè awu’s. Nwamònu anyi? Kaa, Dìyi Dyèndè kaditu dipangila to, ne Didi ne cyà kuula.

²²² Ndi mwà kunwambila bintu byà bifwànyine kunùnyùkusha. Nwamònu anyi? PàdiYe wàmba ne cidikù cidikù’s. Lekèlaayi Yèyè àcyambè. Nwamònu’s, ànu menemene.

223 Nwamònu's, Esètè, Wesètè nyéwù mwalùkile ne mutuutàkèene ne Esètè. Ûvwa m'Mòsà, wakambula mene lusenga, ne kwamba ne: "Nkùpà yikalèku," ne bikwàbò mùshindù awu, "pa buloba." Kàdi mu ditùkù dyà ndekeelu edi Yèyè kî mmwangàte cintu nànsha cimwè to; nwamònu's, ànu Diyì pàtupù. "Cìikaleku," nènku ki cyòci aci. Cìdi cyamba aci, ke mùshindù wikalàci.

Ndi muswè kufila bujaadiki bwà bìmwè byà ku bintu abi dilòòlò edi, nwamònu's, nwamònu's, byà ku bidì byenzèke, bwà nwafika mwà kumòna ne Yèyè ùcidi ànu Nzambi. Mèyi Endè kaèna mwà . . .

"Byenzedi bìndì Mémè ngèza ebi nenùbyènzè pèènu, ne nenwènzè binène bipite ebi. Mémè ngaakangata mushipa bwà kwenza mushipa; kabyèna nànsha bikèngela bwà nwènu kwikala ne mushipa to." Nwamònu anyi? Yèyè ùcidi ànu Nzambi, ùcidi ànu Mwànà umwèumwè awu. Mwànà wa Nzambi umwèumwè wàkapàtwila mushipa ku mushipa awu, m'Mwànà wa Nzambi umwèumwè awu leelù ewu. "Byenzedi bìndì Mémè ngèza ebi nenùbyènzè pèènu. Nenwènzè mene binène bipite ebi." Nebitambe kudyundishiibwa: "Nenwènzè bitàmbe ebi ku bunène." Kàdi bantu bàdi bàpidya kucimòna. Huh! "Byenzedi bitàmbe bunène's!"

224 Bukènkè bwà mashimi. Nudi bamanye's, mvwa ànu munkaci mwà kwela meeji ku cintu kampànda. Mvwa ntàmba kutuma meeji bikolè ku bwalu bwà Angleterre, kàdi mvwa ngèèla meeji bwà bukènkè kampànda bwà mafi. Mwab'ewu matùkù mashààle aa, nwènu bwònsò nudi bavùlùke bwivi butàmbe bunène bwà—bwàkènzeka kacya mu Angleterre, bùvwà bwenzeke abu. Cìvwa ncindyàfù cyà mìliyò mwandamutekète yà ndola. Ncyèna ngèèla meeji ne kukaadiku cintu kampànda mu buloba emu cyà kupàlakaja ne aci to. Cìndyàfù cinène, matùkù mashààla aa, cyà mìliyò mwandamutekète yà ndola, nànsha Scotland Yards kèna mwà kudifwànyikijila ne ncilwe munyi nànsha.

Nudi bamanyè mwàkacyènzàbo anyi? Ku bukènkè bwà mashimi. Bààkatèèka bukènkè kampànda mu njila wa njanja, bwà didimwija, bwènda bupweka too ne mwàkashààlabù bukènkè bukünze, ne kubiimanyikabò. Nènku ke bwivi abu kwenzekabù, ànu mu mwaba awu mene. Bukènkè bwà mashimi bwàkafila bwivi butàmbe bunène bùvwà matùnga kacya kaàyi manji kumanyaku. Cyàkiiba matùnga. Bwà ku bwivi butàmbe bunène, cindàpu citàmbe bunène, cyàkenjiibwa ku bukènkè bwà mashimi.

225 Ne bwivi butàmbe bunène bùtù èkèleeziyà wa Nzambi mupetèku kacya s'mbukènkè bwà mashimi, dibàlakana, d'ngumba dyàbò adi. Mbubàpangishe bukolè bwà Nyumà Mwimpè. Mbuumushe èkèleeziyà ku mushimi mene wà Mwoyi.

Mbubuumushe ku Dîyi, pàkiitabàbo twitabàayi pamutù pàa Dîyi. Mbubàpangishe.

Kaa, bàdi bàmba mùdìbo ne Dîyi. Dîyi didi ne mwoyi Dyôdi diine bwà cikondo; Didi diDimanyisha. Bàvwa bàmba muvwàbo ne Dîyi, bwôbò pààbò, kale wàwa mu matùkù à Yesù. Kàdi Dyôdi's ndyambè ne: "Bààkamòna Bukènkè bunène," kàdi bààkaBupidyà. BààkaBùmòna, kàdi kuBùpidyabò.

²²⁶ Kaa, bukènkè bwà mafi, èyowà, byàkafikisha èkèleeziyà ku dipicila mu bwivi butàmbe bunène bùvwaye kàyi mupicile kacya. Twitabàayi yà mashika yà cyena màngumba, mwanèètù, kayèna mwà kubobesha Dîyi dishindika, lutete kampànda nànsha. Bible mmwambè, Yesù wàkamba ne: "Dîyi dyà Nzambi didi—Dimiinu dyàkamyaminà mummyaminyi kampànda." Nwamònu anyi? Kàdi twitabàayi yà mashika kayèna mwà kubobesha Dîyi adi nànsha. To, to!

Matùkù à mabungibungi kaàtu àbobesha blé nànsha. To, nànsha kakesè! Bìdi bikèngela luuya lwà nsèsè yà dîbà, bwalu cìvwà n'Dîyi dyakula dyà Nzambi bwà kwenza naadi cintu bu nàнку.

Nènku nebikèngelè Dîyi dyakula dyà Nzambi, leelù ewu, bwà kuleeja bansantu bàà Nzambi ne Yesù Kilistò ùdi ne mwoyi. Ànu mùshindù ùmwèùmwè ùvwàYe makèèlèlè awu, ngùdiYè leelù ewu. Twitabàayi ne màngumba kayàdyàkucyènzakù to. Àdi ne mashika ne kaayi àcyùka bwalu to, nènku lutete nelùbolelè mu buloba. Kalwàkupàtukamù nànsha.

²²⁷ Ki bwà cinyi, leelù ewu, tudi ne citùdi twenza. Bu mùdi Mwanèètù Graham wa musinga mukolè, mutàbuluji munène awu. Ngèèla meji ne Nzambi ùdi ùkwàta mudimu ne muntu awu. Kàdi tàngilàayi cidiye wènza; ùpàtukamù ùya munkaci mwà ba-Baptistes ne ba-Presbytériens mwàmwa. Nudi nwenza cinyi? Nupeta musumbà wà bakashàadi bàà mu èkèleeziyà.

²²⁸ Nudi numòna mwaba ùdi ba-Baptistes bàà ku sud bàditàmbishila kuntwaku bwalu bàvwa ne màngumba matàmbe, anyi, dingumba dyàbò dyàkadyunda bikolè kutàmba beena Mishòonyi bakwàbò abu? Beena Kàtòlikè kàdi kubàpita bwònsò, ànu bu nàнку mene, cidimu cishààle eci. Nudi bacimòne mu cibèjibeji anyi? Cyàkenzeka bushùwà. Kanùditàcishi to, necibangàte bwôbò bwònsò, bwalu ncyangàte ba-Baptistes ne bwònsò, ànu pàmwè. Ne bàdi bwònsò umwe, kàdi kabayi bacimanye nànsha.

Nsangilu wa èkèleeziyà, Nsangilu wa Maèkèleeziyà, ùdi ùbàtèeka bwònsò mu cintu cimwècimwè aci. Dingumba ditèeka... Bwà cinyi, mbwà cinyi bunùdi baswè kushàadila *apa* anyi lwà *apa*? Panùdi ànu munkaci mwà kudyombola *Eci*, bìdi bishintulula cinyi? Kí nwnwènù abu munkaci mwà kukwàta mudimu ne bimanyinu bimwèbimwè byà cyena màngumba abi, ànu bimwèbimwè bu munùdi pa kaaba kàmwèpelè anyi? Umwe,

nyama; ne mukwàbò yèyè, ncimanyinu aci. Nàнку, s’ki bwalu mbwòbù abu, pa nàнку kabyèna ànu bishintulula cintu nànsha cìmwè to.

²²⁹ Mmwaba wàkadìye ùsanganyiibwa. Wàkatwà cìtàmpi cyèndè cyà dyanyishiibwa, nènku ki panùdi nucyàngacila. Nènku kwòkò aku ke kùdìye ùlombola byònsò, ànu buludi ku Maison Blanche, ne ku Wanshington, DC, ne—ne Nsangilu wa Maèkèleeziyà, nènku ke nwènù bàyaayàku abu’s. Balombodi bàà èkèleeziyà mbabààlùje, ànu menemene cyàkamba Bible ne ncìvwàbo mwà kwenza aci.

Èkèlekèle, mvw’a kujinga ne ntankù wàwa kèndikù lùkàsàlùkàsà nàka to!

²³⁰ Mpindyewu, elààyibi ànu meeji mpindyewu mwaba utùkaadi. Tàngilàayi ku milayi yà ditùkù, midyombola kàbìdi. Mùshindù ùdi maèkèleeziyà mènze mu ditùkù dyà ndekeelu edi, dibàlakana dyà dìngumba’s!

²³¹ Biikàle ne mwoyi mu dibàlakana dyà mafi kî bwà cinyi Kacyèna ciboba nànsha. Ki bwà cinyi, Dìyi edi, kanwèna numòna bishimà to.

²³² Nsaserdòsè kampànda wàkangeela nkonko, ànu matùkù mashàale aa, kwambaye ne: “Mukalenge Branham,” mwàkambaye, “mmunyi mùvwa mubàtìize?” N—nsongààkàjì kampànda uvwa mupàtuke mu èkèleeziyà ewu; ne mutwè cìmpìngà ne musèdìibwe kùdi nsongààlùme mwena Kàtòlikè, ne muye mu èkèleeziyà wa Kàtòlikè. Ne yèyè ùvwa ne cyà kumubweja mu èkèleeziyà.

²³³ Mémè ne: “Mvwa mumubàtìize mu dibàtìiza dyà bwena Kilistò.”

Yèyè ne: “Mwèpiskòpò mmuswè kumanya.”

Mémè ne: “Èyo, ki cyòci aci.”

Yèyè ne: “Udikù ucìpila ku eci anyi?”

²³⁴ Mémè ne: “Ncyèna ndìcìpa to nànsha kakesè.” Ki yèyè ne. . . “Èyowà,” mémè ne, “yèyè kàyì mwà kwangata dīyi dyànyì bwà bwalu abu to, èè, bìdi ànu bìmpè’s. Bwalu, mémè ncitu ndìcìpa to. Bible mmwambe ne: ‘Kanùdìpìdi kùdi maulu to; n’Nkwasa wa butùmbi wa Nzambi; buloba ncitèekedi cyà makàsà Èndè. Èyo webè ikalè “èyo,” ne to, “to.”” Mémè kwamba ne: “Nebikèngele bwà Yèyè kwangata dīyi dyànyì bwà bwalu abu.”

Yèyè ne: “Èè, wèwè—wèwè udi mwambè ne ‘dibàtìiza dyà bwena Kilistò,’ udi uswa kwamba cinyi, ku—ku diinyijangana dyà mu màyi?”

²³⁵ Mémè ne: “S’ki mùshindù ùmwèpelè ùdi dibàtìiza dyà bwena Kilistò dyènjiibwa.” Mémè ne: “Ngàakamubàtìiza mu musùlù wà Ohio emu; kumwinyija mwinshi mwà màyi, mu Dìna dyà Yesù Kilistò, ne kumujuula. Ngaakamubàtìiza mu ‘Dìna dyà

Mukalenge Yesù Kilistò, cidi ciikale dibàtiiza dimwèpelè dyà bwena Kilistò didiku.”

Yèyè ne: “Èyowà’s, mukalenge.” Kucifùnda mùshindù awu. Ki yèyè ne: “Cyà pabwàci’s!” Yèyè ne: “Udi mumanyè’s, èkèleeziyà wa Kàtòlikè ùvwa ne ciibidilu cyà kubàtiiza mùshindù awu.”

Mémè ne: “Dìbà kaayi adi?”

E kwambayè. Twètù kutungunuka, ne dikòkangana kutungunuka katanci. Ke kwambayè ne: “Èè, twètù kàdi ke Kàtòlikè kàà cibangidilu.”

²³⁶ Mumanyè ne, mi—mikàndà yìvwa ànu myadija mwaba awu, nudi bamanyè’s, ne maalu-malonda pa bwalu abu, Mémè ne: “Aci’s ncilelèlè, kàdi,” mémè ne, “bwà cinyi kanwèna nucyènta leelù ewu?”

Yèyè ne: “Tudi ne bukolè bwà kulekelela mpèkaatù.” Yèyè ne: “Yesù, Yèyè kàakambilakù bayiidi Bèndè ne: ‘Ewu yònsò mwena mpèkaatù yinwàlekelela awu, neyimulekèlèdibwe; ne ewu yònsò mwena mpèkaatù yinwàlaminyina, neyimulaminyiibwe’ anyi?”

Mémè ne: “Èyowà’s, mukalenge. Yèyè’s wàkacyàmba.”

Yèyè ne: “Dìbà adi aci kaciyèna cipèesha èkèleeziyà bukòòkeshi anyi? Peetèlò nguvwa mutù wà èkèleeziyà.”

²³⁷ Mémè ne: “Èkèleeziyà yèyè ùlekelela mpèkaatù mùshindù ùvwa Peetèlò mucyènzè awu.” Mémè ne: “Mpindyewu, pàdìbo bàkonka ne: ‘Citùdi ne cyà kwenza ncinyi bwà kusungidiibwa?’ Yèyè ne: ‘Nyingàlalaayi, muntu ne muntu wa kunùdi, nyebàtijiibwè mu Dìnà dyà Yesù Kilistò bwà dilekelediibwa dyà mpèkaatù yènù.’” Mémè ne: “Nwènù nwenza nànkù, nènku nèmpetanganè neenù.”

“Kaa,” mwàkambaye, “udi uteeta kudibingishila ku Bible.”

Mémè ne: “Aci’s n’Diyi.”

Yèyè ne: “Nzambì ùdi mu èkèleeziyà Wendè.”

Mémè ne: “Nzambì ùdi mu Dìyi Dyèndè. ‘Muntu yònsò, mèyi à bantu bakwàbò, mmashimi; Yèyè ke Bulelèlè.’” Nwamònu anyi?

²³⁸ Pa nànkù kakwèna mùshindù nànsha ùmwè ùvwàye mwà kumòna to. Kàdi’s ki—ki bwòbò bàyaaya abu, buludi ne mu mîdimà. Ne beena Mishòònyì, binunu ne binunu, bakuupukamù. S’ki bwòbò aba, bapweka buludi bwà kwangata twitabàayi yàbò ne bikwànò, bàya batungunukemù. Dìyi dipàtuka buludi, munkaci mwà dicijaadika, Yesù Kilistò ùDimwènesha, “umwèumwè awu makèlèlèlè, leelù, too ne kashidi.” Mu dibàlakana dyà twitabàayi adi, bàyaaya batungùnùke buludi too ne mu mîdimà. Ànu mwàkenzàbo mu cikondo cyà Noà amu, ànu mwàkenzàbo mu bikondo byònsò amu, bàdi bàcyènta

cyàkàbìdì leelù ewu, ànu mu mîdimà! Bwà cinyi? Bàdì bàbènga Bukènkè bwalu twitabàayi mmubàfomije.

²³⁹ Kaa, ncikondo kaayi cyà mîdimà citùdîmu mpindyewu's! Uh-huh! Èyowà, bàdì bàbènga Bukènkè bulelèlè bwà Cyendèlèlèlè bwà Kilistò, nènku ke cìdì cìcyènza ncyôci aci.

²⁴⁰ Màngumba à mashika kaènakù mwà kutwàla Mwoyi ku Diyì dyà Nzambi to, bwalu àdì àtwàla mwoyi ku dîngumba dyàbò. Tudi ne beena Kilistò bàà badyàmba bapite bûngì mpindyewu mene . . . Tàngilàayi kuneku, bu mwena Kilistò . . .

Mémè kukonka nsaserdòsè ewu nùku: “Pìikalàbì ne . . . Tùye lùmwè, byôbì ne èkèleeziyà wa Kàtòlikè ùvwakù, ku cibangidilu, ku Mpenta, kí nku Nicée, ku Loomò to.” Èkèleeziyà kacya kàtukù mwanji kubangila ku Nicée, ku Loomò to, Wàkabangila ku Mpenta, nwamònu's, ku Yelusàlèma ki mwaba wùdì Èkèleeziyà mubangile.

²⁴¹ Kàdì mémè kwamba ne: “Mwab'ewu, nêngùtabè ne bantu aba, bapika abu ne bikwàbò, bàvwà ne Nyumà Mwîmpè abu, bwôbò . . . baamfùmù bààbò bààkamòna makolè àbò ne bikwàbò, cìvwabo benza, bàbìisha bafwè, bààkula mu myakulu, bìipata badémons, bàdyanjila kwamba bintu, ne bapròfetà munkaci mwàbò, ne bikwàbò, bàpàtuka ne bisèbà byà mìkòòkò bidìjìngila, bàdya bisoosà, bàlwa ku Nsangilu wa Nicée, ne bikwàbò, aa, bantu banène's, ne ke bwôbò bàdì bàpàtukakù abu, ne bàbànda ku Nsangilu wa Nicée kwaka, bàtwa mpàndà ku Diyì adi.

“Kàdì, matùkù dikùmi ne àtaanu à mashi awu, bwôbò kwitaba, 'Taatu, Mwànà, ne Nyumà Mwîmpè,' bu twitabàayi, pamutu pàà dilongesha dyà Bible ne: 'mu Dìnà dyà Yesù Kilistò,' ku cyôci aci ke kwàkapàtukila èkèleeziyà yònsò yà beena Mishònyì, milediibwemù buludi, cintu cimwècimwè aci, ne bintu bikwàbò byònsò ebi, mmwènenu wa mashimi wa Nyumà Mwîmpè, kwangatabo, kudyà nkòmoonò, kunwà mvinyò ne: 'Aci's ke ukàristiyà munsantu, cìdì cyùmvwija ne: 'Nyumà Mwîmpè,' nsaserdòsè ngudi ùkupèeshaci.”

²⁴² Mpindyewu, Bible kèena ùbadiibwa ne: “Pààkalwà Ditùkù dyà Mpenta, ke nsaserdòsè udi ubanda ne njila ewu, ne nshìngù wa nkoolò mukùdimuna, wàmba ne: 'Patulà ludimilwèbè bwà wàngate ukàristiyà munsantu.’” To, Kèena wàmba ne: “Nwènù bwònsò nyemènaayi kunweku bwà nùndabule ne cyanza cyà dyàbalùme bwà bwobùmwe to, nwènù ba-Baptistes, ba-Méthodistes, ne ba-Baptistes, nèmfundè dìnà dyènù. Lwàyi ne mukàndà munùfundila mwaba kampànda.”

²⁴³ Wàkamba ne: “Bàvwà bwònsò mu mwaba wùmwepelè, mu díyi dìmwe. Nènku dyàkàmwe kulwakù cyonà cìfùmìna mu Dyulu cyenzè bu cipeepèlè cìkolè cyà cìvuma, ne kùjacì mu cibambalu cyònsò muvwàbo basòmbèle amu. Kùjiibwabo bwònsò ne Nyumà Mwîmpè, ne kubangabo kwakula mu

myakulu mikwàbò, mùvwà Nyumà ùbàpèèsha bwà kwakula. Nènku kwòkò aku. . .” Ki bwòbò bàyaaya mu mùsèèsù bààba, batètuka bu bantu bakwàcike maalà, Màriyà ne bakwàbò bwònsò abu, mwinshì mwà bwenzeji bwà Nyumà Mwimpè.

Mòna’s, bantu kwambabo, kubàsekabo, bàmba ne: “Bantu aba bàdi bùle tètè ne mvinyò mupyamùpyà.” Bàvwa cinyi? Bafofomija kùdi twitabàayi kampànda.

²⁴⁴ Muiishi mukese wa wenza luse awu kujuukaye mwaba awu, dyèndè Peetèlò, ne kwambayè ne: “Nwènù bantu bàà mu Yudaàya ne nwènù bàdi basòmbèle. . . Nwènù bantu bàà mu Yelusàlèmà, ne bàdi basòmbèle mu Yudaàya, eci cìmanyiibwè kunùdi, ne tèelejàayi mèyi àanyi. Aba kî mbakwàcike maalà to. Kàdi lekèlaayi nñwàmbilèku cidi Mufundu mwambè ne neciikalè. Eci ki Bukènkè. Eci ki Dìyi munkaci mwà dimwèneshiibwa.” Amen.

Cintu cìmwècìmwè aci ncyenzeke leelù ewu, kàdi bàdi benza ànu mwàkenzàbo musangu awu, bàkwata njila bàya bènda bàkùpa mitù. Yèyè ne: “Bàlekelaayi kwà tálalàà; mpofo yèyè ùlombola mpofo, bwònsò nebàponè mu mùkidi.”

²⁴⁵ Kaa, bidi bikèngela Kilistò, Mwoyi wà Cyendèlèlèlè, bwà kutwàla Dìyi dyà Mwoyi ku dishindika, divwijìbwe mubidi. Kaa, ekèlekèle, Nzambi wanyi! Bikèngela Dìyi. . . bikèngela Nyumà Mwimpè bwà kukwàta mudimu ne Dìyi dyà Nzambi.

²⁴⁶ Pàakambà Yesù ne: “Ndàayi pa buloba bujimà, nùkayiishè cìfùkìibwà cyònsò Èvànjeeliyò.” Mpindyewu tàngilàayi, Maakò 16, mudimu Wèndè wa ndekeelu mubàtùma naawù. “Buloba bujimà, buloba bujimà,” kacya kî mbwanji kumupetakù to, nwamònu’s. “Buloba bujimà, ne nuyiishè Èvànjeeliyò kùdi cìfùkìibwà cyònsò. Ewu udi witabuujà,” pa buloba bujimà, “ne ùbàtìiibwa neàsungidiibwè; ewu udi kàyì witabuujà neàpiishiibwè. Ne bimanyinu ebi nebifilè aba bàdi biitabuujà.”

“Nebàlabulanganè ku byanza ne muiyish-. . .”? To. “Nebìikalè cidimba cìmpè cyà èkèleeziyà”? To.

“Mu Dìna Dyànyi bwòbò nebiipatè baadémons; nebàakulé mu myakulu mipyamùpyà; nebàkwatè nyòka ne byanza; anyi, bànwà bintu bìdi bìshipangana, kabyàkubenzela bwalu to; bwòbò batentèkèle babèedi byanza, babèedi nebàsangalè.” Kaa, ekèlekèle!

²⁴⁷ Too ne penyì? “Cìfùkìibwà cyònsò.” Búngì kaayi? “Buloba bujimà,” too ne pàalwàYe cyàkàbidi. “Bimanyinu ebi nebìikalè. . .” “Ewu udi ungiitabuujà Mèmè, byenzedi bìNdi ngèza yèyè neàbyènzè pèndè. Neènzè mene ne binène kutàmba ebi, bwalu Ndi nya ku Taatù Wanyi.”

²⁴⁸ Kaa, mmunyi mutùdi mwà kulaluka ku Aci ke cidi citàmbe ne cindi mwà kwamba’s! Tudi mu mîdimà mipite búngì mpindyewu kutàmba mwàkadibo. Mpindyewu ndi ànu ne

mikwàbò mvensà kaaba aka, pashiishe ndi muswè kufika ku ndekeelu ne lukàsà ne mwànyi mwòns-...Tudi mu mídimà mipite búngì kutàmba mwàkadìbo.

Ndi mumanyè ne ndi nnùcyòkesha mwaba ewu, bwà díbà bu dímwè ne citùpà nàнку awu. [Disangisha didi dyàmba ne: “To.”—Muf.] Kàdi, nwamònu’s, bàdi munkacì mwà kutùngunuka ne dikwàtà mukàbà wa méyi ewu muntu mwàmwa. Nwamònu anyi? Nwamònu anyi?

²⁴⁹ Bàdi mu mídimà yàbúngì kutàmba mutùdì. Mvwa mwámbe díyì, bu nàнку. Bwà cinyi? Èkèleeziyà, mu dibàlakana edi, yìdi yìseeswishangana bikolè, byenze bu ne m’Bulelèlè. Mpindyewu, Yesù kààkambakù nàнку anyi? Tùmonààyi bì Maatàayi 24, nwamònu’s. Maatàayi 24, Yesù mmwámbe ne: “Mu matùkù à ndekeelu, nyumà yìbìdì neyitàmbè kwikala mifwànàngàne mu mùshindù wà mifwànyine kuseeswisha Basungula mene bu byòbì mwà kwenzeka.” Nekwikale musùmbà musungula wàpàtukà bwà kwenza Èkèleeziyà, mu matùkù à ndekeelu. Ne malongolodi aa, ne cìdìbo bàbìikila ne ke bwàbò Bulelèlè aci, neikale matàmbe kufwànangana byenze bu Cintu cilelèlè, bwà cyàfwànyina kuseeswisha Basungula mene, nànsha beena Mpenta.

²⁵⁰ Mpindyewu, udi mumanyè ne kwèna mwà kwangata mwena Mpenta bwà kumuseeswisha ne dilongesha kampànda dyà ba-Méthodistes anyi dyà ba-Baptistes to. Kwèna mwà kumwambila aci nànsha. Mmumanyè bìmpè kupite abi. Kwàkuseeswishakù ba-Baptistes kampànda ne dilongesha dyà ba-Luthériens, anyi to. Nwamònu anyi?

Nèku anyi wèwè kwàkwakidilakù Mukenj- . . . kuseeswisha Mukenji, mpindyewu mu Díyì edi, ku dilongesha kampànda dyà cyena Mpenta, dyà mafi dyà “Taatù, Mwànà, Nyumà Mwìmpè,” ne bintakanyi byònsò byà mùshindù awu abi to, kaàdi kwalukila mu twitabàayi yìdìbo baswike mu bulongolodi bwàbò abu nànsha. To, nànsha kakesè. Kwàkubàseeswishakù to, bwalu Basungula kabààkuseeswishibwa to.

²⁵¹ Ncinyi aci? Ncinyi aci? Kuseeswishangana. Mabàlakana aa, àdi munkacì mwà kwenza cinyi? Mmaditwe mu kulombola èkèleeziyà ku cishipeelu cyà nsangilu awu, ku dibàlakana dyàwù. Aci’s ki ciikalà cishipeelu cyà ndekeelu, piikala yèyè ne Loomò badiswike pàmwè. Pàdìbo bènza cimfwànyi cyà nyama wa lwonji aci, ki cishipeelu cyà ndekeelu ncyòci aci. Nèku mabàlakana anùdì naawù mpindyewu aa, tàngilàayi cìdìwù munkacì mwà kwenza, àdi àlombola bantu. Cintu’s m’mbuji.

²⁵² Mbuji ngutu misangu yònsò ùlombola mùkòòkò ku cishipeelu. Nukàatuku bamòne aci mu bikùmbì byà cishipeelu amu. Mbuji awu neàbande lubilu kuulu aku bwà kulombola mùkòòkò, pashiishe neàtumpike ùlekela mùkòòkò ùya

mutùngùnùkemù. Ki cidìye wènza ncyôci aci. Yèyè ùtu misangu yònsò ànu wènza.

Yìvwa mbuji yàkalombola Yesù, Mwànà wa mùkòòkò awu, ku cishipeelu. Mbuji yà cyena Loomò! Ncyà bushùwà.

Cidi—cidi mbuji yà cyena dìngumba leelù ewu yìdi munkaci mwà kulombola mùkòòkò ùdi kawùyì mumanyè bwalu awu ku cishipeelu. Bàditèeka, ménà ààbò mu mikàndà yà kuntwaku ayi, nènku bwàbò mbutùuke. Aci's ki cimanyinu cyà nyama wa lwonji aci. Mu Dìna dyà Mukalenge, mùndi ngàakula. Mvwa mulamè ciine aci ntàntà mule. Aci's ncilelèlè. Aci's ncyà bushùwà menemene. Nyama wa lwonji ncinyi? Nyama wa lwonji ncinyi? Balombodi bàà myânzù bàà cyena Loomò, bulongolodi bwà kumpàla. Cimanyinu cyàci ncinyi? Cintu cìmwècìmwè, menemene, cintu cìmwècìmwè menemene ànu mùvwà aci amu. Cishipeelu, ku dibàlкана adi!

²⁵³ Kàdi kumpàla kwà mîdimà yìdìku eyi, tucìdi ànu bamòne Bukènkè bwà Nzambì bukenka eku ne eku. Mùshindù mwine utùdì ne kusàkidila bwà ciinè aci's wè!

²⁵⁴ Tèèlejàayi ne ntèmà. Tudi bamòne Bukènkè, Dìyì Dyèndè dyàkalayàYe bwà ditùkù edi, dijaadikiibwe ne dishindikiibwe. M'Bulelèlè, Bukènkè bwà dîbà adi. Kaa, ekèlekèle! Ndi ne disànkà dyàbùngì. Kakwèna cintu nànsha cìmwè cyà mafi to. Kakwèna cintu nànsha cìmwè to.

²⁵⁵ Mwab'ewu àbìdì adi panshì aa mwambi kampànda ùvwa wàmba ne ùvwa muye mu Floride, ne ùvwa ne ka—kàshinyì kèndè, ngèèla meeji kàvwa Chevrolet, nènku kantu kubengakù kutùmika. Kàvwa mwà kukàlongolola nànsha. Ki kuyayè mu kàrààjì, nènku mulongolodi mukèsè mukulumpe kubwelaye mwìnshì mwàkù ne pamutù pàakù apu, ne kukàkenketayè nseke yònsò; kàvwa mwà kukàlongolola nànsha. Nènku ùvwa—ùvwa mwà kuteeta *cikampànda*, kàdi kacìyì mwà kweza bwalu to. Nènku ùvwa mwà kuteeta cìngà cintu; kacìyì mwà kwenza bwalu to. Ùvwa mwà kuàsa ku mòtèèlè, kuàtwa ku *cikampànda*, ne kwela bùjì, kushintulula visè; kàyì mwà kufikisha kantu ku dyenza bwalu nànsha. Kàvwa ànu mwà kufika ku dikàteemesha to.

Ndekeelu wa byònsò, ke muntu kampànda muvwàle bilenga ewu pwàà. Kwambayè ne: “Ndikù mwà kukupèèshakù mubelu anyì?”

²⁵⁶ Mulongolodi mukèsè ùvwa ne luumvu lukùmbane bwà kwamba ne: “Èyowà's, mukalenge.”

Yèyè ne: “Angàtà *cikampànda*, ne longòlòla *cikampànda* ne *cikansanga*, ne,” mwàkambaye, “bitwàngaje pàmwè dyàkàmwè nènku ùcìtètèbi.” Nènku kwangatayè *cikampànda* kulongololaye *cikansanga*, ne kucìtwàngaja pàmwè, ke kàshinyì kàyaaya kàka.

257 Mulongolodi mukesè awu kukènzakana, kwamba ne: “Amba tũng, wêwè udi nganyi?” Yêyè ùwva maanyimèèlà, maanyimèèlà mukulumpe wa General Motors. Yêyè ke uvwa mwenze kantu aku. Yêyè ke uvwa mukiibàke.

258 Nènku, leelù ewu, patùdi twakula bwà ba-Méthodistes, ba-Baptistes, ne ba-Presbytériens, Mulongolodi Mukùlumpè ùdi kaaba aka, Mwibaki wa Dîyi Dyèndè, Muntu Wâkafũka maułu ne buloba awu, ne wàkenza Èkèleeziyà Wendè’s! Yêyè ngudi mumanye byàbũngi bwà cidì cikèngela bwà Dyambwibwa, anyi èkèleeziyà wa ba-Méthodistes anyi ba-Baptistes ngudi mumanye byàbũngi bwà cidì cikèngela? Yêyè ke Mwibaki. Yêyè mmumanyè cidì cikèngela. Yêyè mmuvwàdika bĩmpè mu Bukolè bwà dibiiikà Dyèndè dyà ku lufù. Àlèluuyàh! Yêyè ùdi wèndakana munkaci mwètù, leelù ewu, mu Bukolè bwà dibiiikà Dyèndè dyà ku lufù.

Yêyè mmumanyè cidì cikèngela bwà kutèeka Èkèleeziyà mu bulongame bwà Dyambwibwa. Yêyè ngwàkaMwenza, ne kulamakaja bitùpà pàmwè kaaba aka mu Bible. Amen! Lekèlaayi ànu Nzembu yipicileMù, kàdi nuMumòne mwènzènzàye myandà. Lekèlaayi diitabuuja, mu Dîyi Dyèndè dilaya dyà leelù, dipicilemù, s’nenùmòne mùkwàtakwatàCì mudimu’s. Bwà cinyi? Yêyè ngwakenza cintu aci. Wàkalongolola Èkèleeziyà Wendè ku Dîyi. Kì cyàkatwàngajàYe pàmwè ncyòci aci. Kì nku bulongolodi bwà ba-Méthodistes, anyi bwà ba-Baptistes, anyi bwà ba-Presbytériens, anyi bwà beena Mpenta to; kàdi nku Dîyi Dyèndè. “Muntu kààkwikala ne mwoyi ànu ku dyàmpà nkàayaadi to, kàdi ku Dîyi dyònsò dìdi dipàtukà mukana mwà Nzambi.” Èyowà’s, mukalenge.

259 Patukàayi mu mabàlakana awu, munkaci mwà mĩdimà, mu cikondo cyà mifitù mutùdi ne mwoyi mpindyewu eci. (Nkunshàadile tusunsa tutwè ku tũtaanu tukwàbò.) Munkaci mwà mĩdimà, nganyi wàpatula Mukàjì-musèla mukesè ewu pambèlù? Nganyi udi mumanyè Bwalu abu? Ànu Mwenji wa Cintu cyèndè. Kaa, èyowà’s. Kuumuka ku cimvundu cyònsò cyà dibàlakana eci’s!

Apa, dibàlakana dyà ba-Méthodiste wàdi mùshindù, ba-Baptistes mu mukwàbò, ne ba-Presbytériens mukwàbò, ne beena Mpenta mukwàbò, mabàlakana wònsò eku ne eku. Bàdi banyeemakana, bàtèeka mènà àbò lwà *eku*, mu dibàlakana edi; bàlwa kujandula, cintu kampànda mwaba awu. Nènku bàlwa lwà *eku*; ne cintu kampànda kuntwaku. Bàlwa lwà *eku* . . .

260 Bu mungàakambila nsaserdòsè awu ne: “Panwikalà nudi èkèleeziyà wa ku cibangidilu awu, kàdi nwènù kulonda dilongesha dyà bantu bààkadisanga ku Nicée aba, mbwà cinyi bunùdi kanùyì ne bukolè bwàkadibo naabò kale wàwa ku cibangidilu dībà adi? Bwà cinyi kanwèna nwenza bintu byàkenzabo, byàkamba Yesù abi?”

Yèyè ne: “Kaa, twètù’s tudi bantu bapite búngì mpindyewu. Twètù, tudi ne mwoyi mu cikondo cishiilàngàne.”

²⁶¹ Mémè ne: “Kàdi Díyì kadìtu dishintuluka to. Wákamba ne: ‘Bimanyinu ebi nebibàfile mu bikondo byònsò. Maulu ne buloba nebijìmine, kàdi Díyì Dyànyì kadyàkujìminakù to.’ Ki cyòcì aci.”

Yèyè ne: “Èè, udi wakula bwà Bible.”

²⁶² Mémè ne: “Èyowà, Díyì adi, didì Kilistò.” Ncyà bushùwà. Nènku ki bwalu mbwòbù abu’s. Nwamònu anyì?

²⁶³ Nènku mu dibàlakana edi, ba-Méthodistes bàdi baleeja dyàbò, ba-Baptistes baleeja dyàbò, ba-Presbytériens dyàbò, yònsò wa ku yòyì munkacì mwà kudyunda ne kuvula, dibà dyònsò.

Mukàjì-musèla mukesè mukwate ne byà luse awu, Ùdi kwèpì’s? Uyaaya lubilu lwà ku ba-Pentecôtistes Unitaires, katanci; Ûfúndishakù dìnà Dyèndè, ne Wàmba ne, èè. . . Ùlwa kujandula, ùtangila cidìbo bènza. Bálwa lwà apa, ne: “Bikèngela wikale wa ku twètù. Wèwè kùyì wa mu èkèleeziyà mwètù to, kwèna nànsha mu Mukàjì-musèla to. Kwèna nànsha cintu to.” Ndàayi lwà ku Assemblées eku, kàdi numòne cidìbo naaci; s’ki bwalu abu kàbidì. Ndàayi kùdi ba-Baptistes, numòne cidìbo naaci. Tàngilàayi ba-Presbyt- . . .

²⁶⁴ Ncyènzèkelà Cintu cikesè cikwàte ne byà luse eci ncyini’s? Nwamònu anyì? Kàdi Ùdi munkacì mwà kupàtuka. Kanùditacishiku to. Yèyè neikalèku.

²⁶⁵ Muntu kampànda ùvwa wàmba, kukaadi bidimu bitwè bu ku bibidì nànu. Ùvwa usanganyiibwa mu Nouveau Mexique mwàmwa. Mvwa mwenzelemù masangisha pabwìpì ne Carlsbad Caverns. Nwàkuumvwa bwalu bwàwù kuntwaku, manène. . . Ki kwangatabò mulùme ne mukàjèndè, ne musumbà wa bânà, kubwelabo naabò mu cikwèpà, kupwekabu naabù too ne mwinshì mwà ciinà aci. Nènku mbenzè ànu bafika mwinshì menemene amu, kujimabo makènkè wònsò. Nènku mbeenze ànu bàjima makènkè wònsò, kùvwa mwìdimà bu mundaankùlù.

Bàkangezela nànu lwà mwab’ewu mu mpangu eyi, nènku musangu kampànda lwà mu Colorado mwàmwa, mukàjàànyì ne mémè, udi lwà paanyimà pààpa, ùvwamù. Nènku kujimabo makènkè awu. Ekèlekèle, utèeka cyanza cyèbè mùshindù ewu, kùyì mwà kumòna cintu nànsha cimwè.

Nènku kùvwa mwànà mukesè wa bakàjì mwimàne mwaba awu, ki kubangayè kwela mbilà mikolè ne: “Kaa!” Wèla mbilà mikolè. Yèyè, ùvwa ne bwòwà wàmba kufwà, kùvwa mifitù yèbè yà kacya. Kakwàcikwètù kenze ne luse aku kàvwa kèèla nzàdi myaba yònsò, eku kateeta kwela mbilà ne kwela mikunda kakeba papa, maman, myaba yònsò. Kàvwa ànu mwà kucitwàla to, kùvwa mìdimà yà kacya. Kacya kàvwa mwànji kumòna mìdimà bu ayi nànsha.

²⁶⁶ Nènku ke mùshindù awu ùdibi byàmba kwikala mpindyewu. Ncyà bushùwà. Kùdi mîdimà yà kacya mu mùshindù wà kùyì umanya kwà kuya nànsha. Uyààya kùdi ba-Méthodistes, uya kùdi ba-Baptistes, uya kùdi ba-Presbytériens, ncintu cimwècimwè aci, nwamònu's, bàdi munkaci mwà kudyà mana à kale mafwè, mabolè miikale ne bînyà munda mwàwù. Nwamònu's, cintu cimwècimwè aci, twitabààyi kampànda ne: "Bwela ùkashààle mwena *cikampànda*, ne cikansanga, *cikankènga*," twitabààyi wa kale ne bikwàbò byònsò. Kwèna umònamù Kilistò to. Nwamònu anyì? Kaa, udi umòna bantu baakàne bàà mu bwòbò, ndi mufwànyine kwamba nànku. Bààbùngì mbantu bîmpè muntwamu mpindyewu, mu màngumba awu amu. Ndi ngàmba ndongolwelu awu, kí mbantu bàdi muntwamu to. Kàdi, nudi numòna's, ki cìdìbò bàdya ncyòci aci. Bàm̀bilè bwalu abu!

Kàdi Cyàkudyà cibìshi ncyòci *Eci's!*

²⁶⁷ Kàdi mwánà mutekète wa bakàjì ewu mwimane mwaba awu, ùvwa wèla mbilà, ne díyì ditwè, wàm̀ba kuya nkooyi; ànu mùdi Mukàjì-musèla mukèsè awu. Kàdi nudi bamanyè mùdi bwalu anyì? Mwanààbù mukèsè wa balùme kumwandamuna, kwamba ne: "Mwakunyaànyì wa bakàjì, kùciinyi to." Bwalu, yèyè ùvwa mwimànyine ànu lwà pabwípì ne maanyimèèla apu. Yèyè ne: "Kùdi muntu kaaba aka udi mwà kuteemesha makènkè."

Kùciinyi to, Mwakunyaànyì wa bakàjì, kùdi Muntu kaaba aka Udi mwà kuteemesha Bukènkè. Yèyè ùdi mwà kuvwija Díyì edi ne mwoyi. Katwèna bamanyè mùlwalwàYe to. Katwèna bamanyè ne mmunyi to, pààlwàYe. Mèmè ncyènà mumanyè kantu nànsha kàmwè pa bwalu abu to. Kàdi Yèyè ùdi kaaba aka, ne Ùdi mwà kuteemesha Makènkè. Mmunyi mutwikalà mwà kupàtukamù? Ncyènà mumanyè to. Kàdi Yèyè ùdi kaaba aka, ne Yèyè ke Umwèpelè udi mwà kuteemesha Makènkè awu. Èyowà's, mukalenge. Yèyè awu. Yèyè ùdi Bukènkè. Yèyè ùdi ànu ùDìmanyisha, s'ki mùshindù ùdìYe uteemesha Bukènkè awu. Mmwòmò menemene.

Bidi bikèngela Kilistò, bwà kupenyèsha Makènkè Èndè, díbà adi mîdimà yònsò yìyaaya mwamwamwa. Udi ùtápulula. Udi ùpàtula Mukàjì Èndè musèla mukèsè awu pambèlù. "Mèmè nèm̀patulè cisàmbà mu bàà Bisàmbà byà bendè, bwà bwalu bwà Dìna Dyànyì, cìikalà ne Dìna Dyànyì." Dìna Dyèndè ncinyi? Èyo. Kí m'Méthodiste, Baptiste, Presbytérien, Luthérien to. N'Yesù Kilistò. Ncyà bushùwà.

²⁶⁸ Yèyè ùdi Bukènkè, Bulelèlè; Bukènkè, ne kakwèna mîdimà munda Mwèndè nànsha. Nènku Ùdi wipata mîdimà pàdìYe ùbwela, bwalu Yèyè ùdi Díyì adi. Díyì pààdì m'Bukènkè. Ncyà bushùwà. Bwalu, Yèyè wàkaakula wàm̀ba ne: "Bukènkè bwikalèku," aci's ke civwà Díyì dyàkalwà bukènkè adi. PàdìYe wàkula *Cyòci* eci, m'Bukènkè bwà cikondo aci, musangu wònsò.

Mpindyewu Yèyè ùdi apa, kî mmu—mu dibàlakana; kàdi bantu bàdi ne mwoyi mu dibàlakana. Kàdi Yèyè n’Dìyi dishindika. Yèyè ùdi kakùyi mpatà to—to Bukènkè mu cikondo cyà mîdimà. Èyowà’s, mukalenge. Mabàlakana wònsò à mafi aa ne bikwàbò nebìjimine. Èyowà’s, mukalenge. Yèyè ùdi kaaba aka. Kùcìinyi to. Teemesha Makènkè, Dìyi Dyèndè dilaya adi. Didi ne mwoyi. Dìdi dyènza . . .

“Ewu udi ungiitabuuja Mémè, byenzi bîndi Mémè ngenza, nenùbyènzè pèènú.” Dìbà adi, n’Dìyi. “Ànu mùdi Taatù muNtùme, ke mûNdi nnùtùma.” Taatù wàkaMutùma awu, wàkalwa munda Mwèndè. Yesù udi ukutùma awu, ùdi ùlwa munda mwèbè amu. Ne byenzi byàkenzàYe musangu awu, Yèyè ùdi wènza cintu cìmwècìmwè aci, bwalu (bwà cinyi?) Dìyi ndivwijiibwè mubidi, mu mubidi wa buntu, dîDimwenesha bu Bukènkè bwà ditùkù. Ki bwalu mbwàbù’s. Ki cyôci aci. Cìdi ànu cileeya njila wa Bukènkè, mu Bukènkè. Beena meeji, bàdi kabàyi bafomija ku twitàbààyi ne dîngumba, nebèndelè mu Bukènkè abu. Kaa, ekèlekèle!

²⁶⁹ Kùdi Muntu kaaba aka udi mwà kuteemesha Makènkè, èyo. CìdìYe wenza ncinyi? Ku dishindika Dìyi Dyèndè bwà ditùkù edi. Yesù, Mwànà wa Nzambi, Wàkalaya Dìyi bwà ditùkù edi awu, ùdi neetù kaaba aka mene.

Kanùcìinyi to. Kanùtùmi ntèmà nànsha mikesè ku cìdìbo bènza nànsha; nwènù batùmekù ntèmà, nenwèndelè mu mîdimà.

Ikàlaayi ne lungenyi. “Aba bàdi ne lungenyi,” mwàkamba Danyèlè, “mu matùkù à ndekeelu aa, nebènzele Nzambi wabò maalu manène.” Nwamònu anyi? Nwamònu anyi? Nebèndelè mu Bukènkè, bu mùdiYe mu Bukènkè.

²⁷⁰ Kanùditàcishi to. Bidi mwà kumweka bifùke, byenze bu ne bàdi bàtwenzeja, muntu ne muntu. Bwònsò aba, nudi numòna mùdibo bàkòbola patòke ne: “Èkèleeziyà mikesè yònsò eyi ne bikwàbò bìdi ne cyà kubwelamù mpindyewu. Nudi ne cyà kubwelamù,” cyanàànà nebànùkangile biibi. Nebàcyènzè.

²⁷¹ Mpindyewu tudi baswè kulenga aci bikolè menemene, dilòòlò edi, pàngààfikà dîbà edi, nwamònu’s.

²⁷² Mpindyewu, bwòbò ne: “Netùkangè biibi.” Bìkèngela wikalè umwe wabò, anyi to. Udi—udi anyi mu cyôci aci, anyi kwèna mwà kwenza cintu nànsha cìmwè to, kwèna nànsha mwà kusumba anyi kusumbisha to. Ki cyôci aci. Kwèna mwà kudìdinga kusambidila babèèdì nànsha. Bwòbò bakusangàne usambidila ní mmubèèdì anyi ní mmuntu kaayi ne cintu kanà cyònsò cyà nyumà muntwamu, bàdi bàkupiisha ne mukenji wà tubàdi tukùlumpè, bwà kukushipa. Ncyà bushùwà menemene. Nwamònu anyi? Nudi bamanyè nànku. Ncyà bushùwà. Cìdi mu mikàndà yàbò amu. Èyowà’s, mukalenge. Pa nànku, kwèna mwà kucyènza to, bikèngela wikale wa mu kasumbù aku.

Mwanèètù, lekèlèlè nkwāmbilèku cintu kampànda. Mbitāmpbe bwīmpè bwà wèwè kupeta Kilistò bushùwà mu mwoyi wèbè mpindyewu mene, bwalu nekūlwe cikondo ciwikala mwà kuMujinga bulelèlè. Dībà adi udi pambèlù. Nwavùluka ne, pādì citāmpì aci citwibwa, cidikù bwà kashidi. Nwamònu anyi? Pa nānku, kucyènjìku to. Kwitabuuji bintakanyi abi to. Bwèlā buludi mu Kilistò mpindyewu mene, Dīyì adi. Èyowà's, mukalenge.

²⁷³ Cìdi cìshindika Dīyì adi, ne cìleeja ne Cìdi m'Bukènkè bwà dībà adi. Ki mùshindù awu utùdì tumanya ne Yèyè ke Bukènkè, bwalu Yèyè ùdì Bukènkè munkaci mwà kuDimwènesha mu mubidi.

Mmunyì mutùdì tumanya? Yèyè ùvwa Dīyì dyà Nzambì divwìjìbwe mubidi. Nwamònu's, Dīyì dyà Nzambì divwa munkaci mwà kudìleeja Dyòdì diinè, kuDìshindika Yèyè mwinè, pālwa Maasiyà, ke cyènzàYe aci.

²⁷⁴ Mukàjì awu wākamba, ku ciinà cyà māyì ne: “Pàalwà Maasiyà, Yèyè neenzè bintu ebi. Wèwè udi ne cyà kwikala Mupròfeta awu, udi Dīyì, ùdyànjila kutwāmbila bintu ebi.”

²⁷⁵ Yèyè ne: “Mémè ki Yèyè awu.” Nwamònu anyi? Aci's cìvwa cikumbāne. Bukènkè bwākateemà pa Dīyì dilaya. Ki Bukènkè mbwòbù abu.

²⁷⁶ Kubwelayè buludi mu cimenga, wāmamba ne: “Lwāyì, kanūmonāyì Muntu Udi mungāmbile bintu bīndì mwenzè. Kì m'Maasiyà mwinè anyi?” Ki cyòci aci. Nwamònu anyi? Cìvwa bakwàbò bāmamba nānsha ciikale cinyì, yèyè ùvwa mumanyè ne awu ùvwa m'Maasiyà.

²⁷⁷ Vùlukāyì ne, mu cikondo cyònsò, mu cikondo cyà mīdimà, Nzambì ùtu misangu yònsò ànu ne Dīyì Dyèndè bwà kutāpulula Bukènkè ne mīdimà.

Ùvwa naaBù mu matùkù à Luther, pāvwa èkèleeziyà wa Kātòlikè ne bintu byònsò; Wākatùma Luther bu Bukènkè bwà bùkenka, ne Luther wākatāpulula Bulelèlè ne mīdimà.

Kàdì pààkatènkakanà beena Luther, Yèyè kwenza John Wesley, ne kutāpululayè Bukènkè ne mīdimà.

Ne mu matùkù à mpenta, pàkaavwa beena Wesley... ne ba-Méthodistes banyangākàje byònsò, ne ba-Baptistes, ne ba-Presbytériens, Yèyè wākatùma mukenji wa mpenta bwà kutāpuluka Bukènkè ne mīdimà.

Mpenta wākaalukila buludì mu mīdimà, mùshindù awu, mu bulongolodi bwàbò, kwangata twitabāyì yàbò ayi ne bikwàbò.

Mpindyewu dībà dikaadi dilwe bwà Dīyì edi dishìndikiibwè. Yèyè ùdì ùtuma Bukènkè, Dīyì dimwènèshìibwe, mwākènzàYe ku cibangidilu amu; ùtuma Dīyì, ne Dyòdì dìdì dìDìjaadika. S'ke Bukènkè abu, ne Yèyè ùtu ùtāpulula misangu yònsò. Bìdì kàbìdì

byà mwomùmwe mpindyewu, bu Makênkè makesè à Cyendèlèlèlè à ku cibangidilu.

²⁷⁸ Pa kutàngila, nwênù bânà, mûndi ngâmba ne ndi mupicishe dîbà mpindyewu ne tusunsa tûtaanu. Kâdi anyishaayi ngâmbè cintu cimwèpelè eci.

Kùdi Muntu kaaba aka! Kanùumvu bwôwà to, nànsha bwôbò bàmba cinyi. Nkaadikù mumòne maalu afika mwaba ùmwà nciyi mumanye kwà kwela dînù anyi dikàlà to, kâdi Yèyè ùdi ànupù misangu yònsò. Bwikadi bùdi kabùyì bupangila, Yèyè ùdi ànupù misangu yònsò. Yèyè ùdi mwà kuteemesha Bukênkè. Èyowà's, mukalenge. Yèyè ùdi ànu munkaci mwà kwindila, bwà kumòna ciwènza. Ùdi mwà kudyata pa lubòtà alu dîbà kanà dyònsò didiYe muswè. Èyowà's, mukalenge.

²⁷⁹ Kùdi Muntu kaaba aka udi mwà kuteemesha Makênkè. “Aba bàdi basòmbèle mu myaba yà mundidimbi wà lufù abu,” bàmwè bàà kùdibo ne kànsèrè, bàmwè bààkùdibo mu lufù lwà dîngumba, bàmwè bàà kùdibo mu lufù lwà twitabàayi, bàmwè bàà kùdibo mu lufù lwà bilèlà byà bankambwà, ne lufù lwà mishindù yònsò ne: “ne mbamòne Bukênkè bunène.” Muntu uvwa upenyisha Makênkè dîbà adi awu, n'Yèyè umweumwe Wàkamba, ku cibangidilu ne: “Bukênkè bwikaleku.” Nzambi umweumwe awu: “makèlèlèlè, leelù, too ne kashidi,” Yèyè ùdi kaaba aka leelù ewu, mpindyewu mene. Kanùumvu bwôwà nànsha. Yèyè ùdi mwà kuteemesha Makênkè.

Pàdi dikengeshiibwa dilwa, kanùumvu bwôwà to. Kùdi Bukênkè, bwàmba ne Yèyè neàngate cisàmbà Cyèndè kuya naaci. Cyôci kacyàkupicila mu dikènga dinène adi to. Kacyàdyakucyènzakù to. Wàkamba ne Kacivwa mwà kupicilamù to. Neczyàngaciibwè. “Nebàcyenze munyi, Mwanèètù Branham? Mbìmweka ne mmifitù yà dikèma's!” Nànsha byôbì bifiike bishi, byà kùyì mwà kumòna mene cyanza cyèbè kumpàla kwèbe to, vùlukà ànu ne, kùdi Muntu mwab'ewu udi mwà kuteemesha Bukênkè. Yèyè neàye mu Dyambwibwa ne Èkèleeziyà awu.

Wèwè udi wamba ne: “Èè, mèmè ndi ànu . . .”

²⁸⁰ Èyowà, Shandàlàka, Meshàkà, ne Abèdenegò, bààkabànda too ne ku cikùtù cyà kapyà aku, kâdi's kùdi Muntu kuntwaku Uvwa mwà kuteemesha lupeepà. Èyowà's, mukalenge. Cipeepèlè cikolè cyà civuma cyàkapwekà mu Ditùkù dyà Mpenta aci, WàkaCiteemesha kàbìdì ne kupeepuja kaalupeepèlè katalàle kule naabo, kapyà kwònsù aku. Kùvwa Muntu mwaba awu; Yèyè mmubiikidiibwe ne “Muntu mwinàyi.”

²⁸¹ Kùdi Mukwàbò kaaba aka leelù ewu. Yèyè ùdi ànu Yèyè awu! Àlèluuyàh! Ùdi ne lubòtà lwà Bukênkè mu cyanza Cyèndè. “Aba bàvwà basòmbè mu myaba yà mundidimbi wà lufù, Bukênkè bunène bwàkabwayika.” KanùBudyombòdì nànsha.

NùBwakidilaayi, mu Dîna dyà Mukalenge. Patùdì twinyika mitù yètù ànu bwà katançi kakesè apa.

Netwèndelè mu Bukênkè, Bukênkè bulenga,
Lwâyi mwaba wùdì mamata à lumuma à luse
àbàlakana;

Tùkenkèshìle mu nyùngulukilu mwètù
mwônsò muunya ne butùku,
Yesù, Bukênkè bwà bàà pa buloba.

Netwèndelè mu Bukênkè, m'Bukênkè bulenga
be,

Bùdì bùlwa mwaba wùdì mamata à lumuma à
luse àbàlakana;

Tùkenkèshìle mu nyùngulukilu mwètù
mwônsò muunya ne butùku,
Yesù, Bukênkè bwà bàà pa buloba.

Lwâyi, nwênù bansantu bàà Bukênkè,
nukòbolè ne,

Yesù, Bukênkè bwà bàà pa buloba;
Dîbà adi ngonga yà mu Dyulu neyidilè,
Yesù, Bukênkè . . .

Ncinyì aci? Dîyi dishindika dîdì Yesù leelù ewu. Yêyè ùdì Dîyi.

Netwèndelè mu Bukênkè ebu, m'Bukênkè
bulenga be,

Bùdì bùlwa mwaba wùdì mamata à lumuma à
luse àbàlakana;

Kaa, tùkenkèshìle mu nyùngulukilu mwètù
mwônsò muunya ne butùku,
Yesù, Bukênkè bwà . . .

²⁸² Ne mitù yènù miinyika. Ndi ndikonka ne mbanganyi mwab'ewu bàdì baswè kwendela mu Bukênkè ebu, ku bulombodi bwà Nyumà Mwîmpè, Dîyi dishindika dyà leelù ewu? Nwamònu anyi? Dîyi dyàkalayà Nzambi leelù, kuDimòna dimwènèshìbwe's!

Kí ng'aci cyàkadiYe ku cibangidilu anyi? Yêyè wàkadi Dîyi. Mwànà wàkaledibwa; Yêyè wàkadi Dîyi. Úvwa Maasiyà; Yêyè ùvwa Dîyi dishindika. Nànku dîbà adi Dîyi adi, Nzambi kwakula ku cib- . . . ndekeelu kacya ku cibangidilu.

²⁸³ Mpindyewu kùdì Dîyi bwà ditùkù edi, ne Yêyè ùdì kaaba aka munkaci mwà kushindika Dîyi adi.

Munkaci mwà cimvundù, mîdimà ne mabàlakana, cyônsò nkòong ncimweka cifwànàngàne naaBù, kàdì kî mBwòbù nànsha. Kabyèna bìjaadika ne mBwòbù nànsha; ntwitabàayi.

²⁸⁴ Yesù wàkamba ne: “Pangiikalà ngiipata badémòns ku munu wà Nzambi, nwênù nudi nuyipata ku cinyi?” Kabààkayipata nànsha. Nwamònu anyi? “Kàdì, to, paNgiikalà ngiipata dyabùlù

ku munu wà Nzambi, dîbà adi Bukalenge bwà Nzambi mbùseemènè kunùdi.”

Kaa, twànji kwelakù meeji, patùdi twela byanza byètù muulu apa. Bitùùlùbitùùlù mpindyewu, ne twela meeji, mu cinyàànyà cyà menemene.

Netwendelè mu Bukênkè ebu, ebu's m'Bukênkè
bulenga be,
Ne bùdi búlwa mwaba ùdi mamata à lumuma
à . . .

Tõndàayi. Itàbùùjaayi Nzambi mpindyewu.

Tùkenkèshile mu nyùngulukilu mwètù
mwònsò muunyà ne butùku,
Yesù, Bukênkè bwà bàà pa buloba.

Netwendelè mu Bukênkè ebu, m'Bukênkè
bulenga be,
Bùdi búlwa mwaba wùdi mamata à lumuma à
luse àbàlakana;
Tùkenkèshile mu nyùngulukilu mwètù
mwònsò muunyà ne butùku,
Yesù, Bukênkè bwà bàà pa buloba.

²⁸⁵ Pàdìbo bàtùngunuka ne kwimba apa, ndi muswè kukonka. Cikondo cyònsò bìvwa ànu byà mwomùmwè. Mu matùkù à Noà, bààkabènga Bukênkè abu, cyàkenzàbo ncinyi? Kudyèlabò mu cilumbulwidi cyà Nzambi. Cyàkenzekela Pâlò ncinyi mu matùkù à Bukênkè bwà cipuka cìvwà cilàkuka kapyà aci, bùvwà mu Mòsà abu? Kubwelayè mu mbù wa lufù. Cyàkenzekela Datànà wakatwàdija kàdi pashiishe kudyombola Bukênkè ncinyi? Wàkadiina mu muntanta wà buloba; kumusùkuminabù. Cyàkenzèkà ncinyi mu bikondo byònsò, kùdi aba bààkapanga kwendela mu Bukênkè abu, Bukênkè bwà ditùkù abu?

N'Yesù dîbà dyònsò. Ûvwa n'Yesù mu matùkù à bantu abu. N'Yesù leelù ewu, bwalu Yéyè ùdi Dîyi, ne Dîyi ke didi dyènza Bukênkè. M'Bukênkè bwà ditùkù.

Elààyibi meeji ku cyôci aci mpindyewu, mu cinyàànyà menemene, patùdi ne meeji matòòke, tukonka apa ne: udi wendela mu Bukênkè anyi? Patùdi tuwimbila mu matàma apa.

. . . Bukênkè bulenga,
Búlwa mwaba ùdi dimata dyà luse dibàlakana;
Tùkenkèshile mu nyùngulukilu mwètù
mwònsò muunyà ne butùku,
Éyi Yesù, Bukênkè bwà bàà pa buloba.

Tùjuukàayi mpindyewu, twìmanyine kuulu.

²⁸⁶ Ndi ndòmba Taatù wa mu Dyulu bwà ùlekelèku Mukenji ewu wùbwelè mu myoyi yà bantu bàdi kaaba aka abu, ne bìikala mwà kuWütèelejila ku mukàbà wà mèyi abu. Ne swàkù bwà Bukênkè búlwe pa Dîyi, Dimiinu adi, bwà kupàtula Dimiinu

dyónsò didyànjila kulongolola dyàkakùnyiibwa mwaba ewu mu mabàlakana mashiilàngàne aa ne malongolodi. Swàkù bwà bà mòne bu Nicòdeme, nànsha byòbì bikèngela bwà “kulwabo ciibutùku,” kulwa ku Bukènkè. Enzàku nàнку, Taatù.

²⁸⁷ Swàkù bwà kùlwekù mpùngà munène ewu, wa Lubwebwe elu lùdì lukosela ku mukùnà, kaktùyì dikwacisha dyà byanza to. NeLùvingutulè makalenge à bàà Bisàmbà byà bendè aa kuàshiya buloba, makalenge wònsò aa, makalenge à nyumà ne makalenge à mubidi. Nènku Lubwebwe alu nelùbwikidiye buloba bujìmà; nebwikale cintu cikezula. Bìikala Lubwebwe alu luvingùtùle nebàshaale lupwishi lwà buloba; bààdìshindila pa Lubwebwe alu nebìikale ne nshìndameenu mukolè.

²⁸⁸ Éyì Kilistò, ndekèlà mèmè, bu musadidi Webè, mfwilè pa Lubwebwe elu, Lubwebwe lwà Dìyì Dyèbè elu. Mukalenge Nzambì, lekèla ngiimane, bu Davìdì, ne balwanganyi bàà kale bààkatwà ku cyà Davìdì abu, lekèla ngiimane mutwè ku cyà Dìyì edi leelù ewu pàndì nDìmòna didyombòdìibwe kùdì màngumba. Ndyòdì edi dilekelela kaaba aka mu dipèngama dikesè mwaba kampànda. Éyì Nzambì, ndì . . . Enzàku bwà twikalè ne dikàndà ne bukìtù, ne Nyumà Mwìmpè, bwà kwimana, munda mwà mèbà àkaadi àtamba kukwàta mifitù bikolè aa.

Kàdì tùvùlukeku misangu yònsò ne Wèwè udi ku bwà kuteemesha Bukènkè. Pa dìbà kanà dyónsò dyùdì Wèwè muswè adi, Udi mwà kuteemesha Bukènkè, Taatù. Nàнку tudi tulòmba . . .

²⁸⁹ Bu Muwàkàmbà ne: “Wèwè udi Bukènkè bwà bàà pa buloba.” Enzàku, Mukalenge, bwà Makènkè ètù, àdì bwà mudimu Wèbè awu, àkènkeshilèku bikolè menemene bakwàbò, bwà bààmònaku Bukènkè bwà Èvànjeeliyò patùdì tubùtèka mu cyenzedi apa, Mukalenge, ku ditùkù ne ku ditùkù, tubàleeja Mwoyi wà Yesù Kilistò ànu mùvwàYe pa buloba amu; bùjìibwe tètè ne didipwekesha ne kalolo, kàbidì ne Dìyì diikàle ne mwoyi ànu mu Yèyè. Enzàku nàнку, Mukalenge.

Bwalu, tudi baKutàngidile Wèwè, munène udi ne lubòta mu cyanza Awu. Udi mulame buloba mu cyanza Cyèbè. Udi mulamè bintu byònsò mu cyanza Cyèbè, ne mulaminyine buloba ku Dìyì Dyèbè.

Éyì Taatù, lekèla twàkidilèku Dìyì; bu Wèwè, mwà kuswà, Mukalenge? Aci ciikalè bujaadiki ne dijinga dyà mwoyi wònsò munda emu.

²⁹⁰ Taatù, patùdì twimba miyenga eyi apa . . . Bu mwàkimba Davìdì miyenga, yàkalwa mèyì à cipròfetà. Yìvwa cipròfetà, ne Wèwè wàkayìjingulula ne, ncipròfetà. Patùdì tuwimba apa, Mukalenge, wikalè mu mwoyi yètù, twètù pèètù, patùdì twimba ne: “Netwèndelè mu Bukènkè ebu.” Bìikalèku nàнку, Mukalenge.

Eci's m'Bukênkè bulenga. N'Dîyi. N'Kilistò ne mwoyi munkaci mwètù. Kì ncìvwàYe to; cidiYe, nènku, tudi bamanyè ne cyàkadìYe cìvwa cìleeja ànu cidiYe. Nènku tudi tulòmba, Taatù, bwà bantu bùmvwà ne bèndelaku mu Bukênkè bulenga ebu. Tudi tulòmba mu Dìna dyà Yesù.

²⁹¹ Patùcidi bashààle biimànè bwà katancì cyanàànà apa, ndi muswè bwà twètù bwònsò kwimba.

²⁹² Mpindyewu munda emu mùdi ba-Presbytériens, ba-Méthodistes, ne beena Kàtòlikè. Aba's mbatèèleji bacyòmpàkàne, pa bìdi bitàngila cyena màngumba.

²⁹³ Mpindyewu vùlukàayi ne, cìkale cimanyike, ne ncyènà ngàakula cintu nànsha cìmwè bwà kupiisha bantu bàdi mu mabàlakana aa nànsha. Kàdi ndi mucijaadike, ne Bible ne, mmabàlakana. Bu kabiyi nànku to, Kilistò s'ùvwa kwikala munkaci mwà kwenza, mwàkalayàYe bwà kwenza amu. Nwamònu anyi? Kàdi bàdi bàbènga Aci. Nwamònu anyi? Nènku panùdì nufikamù, cinùdì nusangana ncinyi? Byà ne "shààla wa mu èkèleeziyà, ambululà twitabàayi kampànda." Kàdi cidi cìkafika ku cinyi? Ufika ku ndekeelu kwà njila, usangana ne cìvwa mmâyi à bakishi, à mashimi awu.

Kilistò ùdi Dîyi. Yèyè ùdi Bukênkè. Ikàlà ne mwoyi mpindyewu, paùdi mwà kwikala ne mwoyi apa. Udi ne mwoyi bwà cintu kampànda.

²⁹⁴ Udi ne mwoyi bwà cinyi? Mbwà kufwà. Yònsò wa kunùdì, udi ukwàta mudimu bwà cinyi? Bwà kudyà. Udi udyà bwà cinyi? Bwà kwikala ne mwoyi. Udi ne mwoyi bwà cinyi? Bwà kufwà.

Pa nànku bwà cinyi kubènga kwikala ne mwoyi bwà kwikala ne mwoyi? Bwà cinyi kubènga kwikala ne mwoyi bwà kwikala ne mwoyi? Dìbà adi, mùshindù ùmwèpelè ùdi mwà kwikala ne mwoyi nkwitaba Dîyi. Bwalu: "Muntu kààkwikala ne mwoyi ku dyàmpà nkàayadi nànsha," citùdi twenza kaaba aka ne cisululù cyà mu mpàla mwètù, "kàdi ku Dîyi dyònsò didi dipàtukà mukana mwà Nzambi." Mpindyewu Dîyi dyà mukana mwà Nzambi didi munkaci mwà kushìndikiibwa ànu mwaba ewu mene kumpàla kwètù, kùdi Nyumà Mwimpè. Kikala ne mwoyi ku Dyòdi, kì mmwòmò anyi?

²⁹⁵ Mpindyewu ndi muswè, patùdi twimba ewu cyàkàbidi apa, tujúukàayi muntu ne muntu kuulu ànu pa kaaba kèètù apu, twòlolè cyanza tükwate byanza byà muntu kampànda, twamba ne: "Mwanèètù, twèndelè mu Bukênkè ebu," patùdi twimba ne *Kwendela Mu Bukênkè*. Nudi baswè anyi? Sambidilànganaayi muntu ne mukwèndè panùdì bakwàtàngàne ku byanza apu, patùdi tuwimba pàmwe apu; ne mèsù ètù mabwita, ne mwètù mwònsò.

Netwèndelè mu Bukênkè, Bukênkè bulenga be,
Bùdi bùlwa mwaba wùdi mamata à lumuma à
luse àbàlakana;

Tukenkèshìle mu nyùngulukilu mwètù
mwònsò muunya ne butùku, (Nganyi Awu's?)
Yesù, Bukènkè bwà bàà pa buloba.

Mpindyewu twèlàayi byanza byètù muulu.

Netwèndelè mu Bukènkè, m'Bukènkè bulenga
be,

Bulwa mwaba wùdì mamata à lumuma à luse
àbàlakana;

Tùkenkèshìle mu nyùngulukilu mwètù
mwònsò muunya ne butùku,

Kaa, Yesù, Bukènkè bwà bàà pa buloba.

Lwâyi nwênù bansantu bònsò bàà Bukènkè,
nùkòbole, (Nciniyi aci?)

Yesù, Bukènkè bwà bàà pa buloba;

Dìbà adi ngonga yà mu Dyulu neyidilè,

Yesù, Bukènkè bwà bàà pa buloba.

Bwònsò, tùwìmbàayi mpindyewu.

Netwèndelè mu Bukènkè, ne m'Bukènkè
bulenga,

Lwâyi mwaba wùdì mamata à lumuma à luse
àbàlakana;

Tùkenkèshìle mu nyùngulukilu mwètù
mwònsò muunya ne butùku,


Yesù, Bukènkè bwà bàà pa buloba.

²⁹⁶ Ne mitù yètù miinyika mpindyewu. Vùlukàayi ne pàvwà Izàlèlèlè mu lwendu lwàbò, munkaci mwà kudya manà mapyamàpà ditùkù dyònsò, bààkendela mu Bukènkè bwà Dikunji dya Kapyà. Dikunji dya Kapyà adi divwa n'Yesù Kilibò. Bible ùdi wàmba ne ncìvwaDi. Nèku leelù ewu Yéyè ùdi neetù; tudi naaDi. Tudi bamanyè ne Yéyè ùdi neetù, Dikunji dya Kapyà òm̀wèd̀m̀wè adi, wènza bintu b̀m̀wèb̀m̀wè byàkenzàYe pàvwàYe pànu pa buloba apa, bwà kùja Dìyi Dyèndè.

²⁹⁷ Patùdì tuumuka kaaba aka, twàvùlukaayi, bwà kulama musambu awu munda mwà myoyi yètù patùyaaya ku mèètù, pàdì nkàtā yà mashinyi ỳnungana musambu awu. Kumpàla kwà wèwè kudya cyàkudya cyèbè cyà mundaamuunya, inàmijà mutù wèbè ne usàkidilè Nzambì bwà ditùmà dya bukènkè bwà kutwàla byàkudya pa buloba, bwà mubidi wèbè wa misunya. Pashìshe sàkidila Nzambì bwà ditùmà dya Bukènkè bwà Nyumà, Dìyi Dyèndè, bwà Wàmòna mwà kufila Cyàkudya kùdì musùkà. "Bwalu muntu kààkwikala ne mwoyi ànu ku dyàmpà nkààyaadi nànsha, kàdì ku Dìyi dyònsò d̀d̀d̀ d̀pàtùkà mukana mwà Nzambì."

²⁹⁸ Tùngunukàayi ànu ne kudìmbila muyengà ewu, mu nzùbu mwènù, munkaci mwà beena kwènù, ne nwàlukilè bwà kutwilangana neetù kaaba aka lwà ku d̀b̀b̀ isambòmbò ne tusunsa makumi àsàtù, dilòlò edi, bwà twarta twà disambila

ne bikwàbò. Netùnùmònè pashiishe. Too ne dîbà adi, inyikaayi mitù yèù.

²⁹⁹ Nêndombè Mwanèètù Neville bu yêyè mwà kubànda kùneeku mpindyewu, mpaasàtà, bwà kutùtangalaja ne mwâkù wà disambila. 

63-1229M Kùdi Muntu Mwaba Ewu Udi Mwà Kuteemesha Bukênkè
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org